

- INSAIT**
- KI milien bilong ol distrik - pes 3
 - Ol benk woka bai tokaut long straik - pes 3
 - Tok pilai wantaim Kanage - pes 25-26
 - 4 pes wiken spot ripot

Redi long bikpela ren na win

VERONICA HATUTASI i raitim

NESENEL Disasta na Imejensi Sevis i givim tok lukaut long pablik olsem ol i mas redi i stap long ol hevi we taim bilong bikpela ren bai i kamapim long Esia na Pasifik rijen.

Dispela em i bihainim ol senis we La Nina, senis

bilong win bai kamapim namel long Desemba na Februari 1999.

La Nina em i taim bilong bikpela ren bihain long El Nino, o bikpela san i bin kamapim bikpela hevi long PNG na ol arapela kantri long Esia na Pasifik las yia. Long dispela taim, san i bin kukim ol gaden kaikai.

Long Indonesia, paia i kukim bikpela hap bus na smok i bin bagarapim ol ples na dispela i bin kam olgeta olsem long PNG.

La Nina i save kamapim ol hevi ren, taitwara, graun i bruk na ol strongpela win we sampela taim i kamap olsem ol tropikel saiklon.

Long wanpela toksave we

Dairekta Jenerel bilong NDES Ludwick Kembu i salim i go long ol provinsel disasta komiti, em bin tok PNG bai i gat ol bikpela ren na pablik i mas lukaut long hevi bilong ol strongpela win, taitwara na graun i bruk.

Long wankain taim tu, Yunaitet Nesens weda ejensi i givim tok lukaut las wik olsem La Nina weda peten i

ken kamapim ol strongpela win long Australia na Pasifik rijen. Ol kain win bai i gat strong na kamapim bagarap olsem Hariken Mitch we tripela wik i go pinis, i bin kilim dai planti tausen pipel na bagarapim tru ol kantri long Saut Amerika.

Solwara bilong Pasifik i save kamap kol na kamapim La Nina weda peten.

i go moa long pes 3

Nogat skul sabsidi bilong 1999

...Papamama mas baim ful skul fi

WENCESLAUS MAGUN i raitim

OL PAPANAMA na wan wan Provinsel Gavman insait long Papua Niugini i mas painim mani bilong baim skul fi sabsidi bilong ol skul pikinini long 1999 bikos Nesenel Gavman i rausim pinis skul fi sabsidi long 1999 baset bilong Edukesen.

Minista bilong Edukesen, Muki Taranupi i tok namba wan astingting bilong Nesenel Gavman bilong rausim skul fi sabsidi insait long 1999 baset bilong Edukesen Dipatmen em i sut long hevi bilong mani kantri i bungim tude.

Em i tok dispela em namba wan as bilong bringim Edukesen Dipatmen baset bilong 1999 i go daun long K60 milion na i no wankain olsem bilong 1998 we i bin stap antap long K76 milion.

Mista Taranupi i tok long 1999, wan wan skul insait long kantri i mas painim rot bilong ol yet long baim skul fi sabsidi antap long wanem mani Nesenel Gavman i givim ol. Em i askim tu wan wan Provinsel Gavman long painim mani bilong helpim ol papamama na baim skul fi sabsidi.

i go long pes 3



Diro stap insait long pinis bilong turisim kos

• Gavana bilong Sentrel provins Ted Diro (namel wantaim blu set) i amamas long gutpela kos bilong wok turisim insait long provins bilong em. Ol dispela i pinis kos bilong wok turisim.

Win a Coca-Cola SPINBAG
100,000 to be won

80,000 WINNERS ALREADY
20,000 YET TO WIN

Collect from any Coca-Cola Amatil depot by 31/1/99

PLIS RIPO

Madang:

Ol stilman i bin go insait long wanpela supamakot long taun na stilim mani na ronawe.

Dispela i bihainim blekaut long taun long dispela wik Mande taim bikpela ren i pondaun long provins.

Plis ripot i tok taun i bin gat pawa blekaut long Mande inap long Tunde apinun na olsem sampela kriminel i tagetim Modilon Supamakot, tripela bilong ol i hensapim supavaisa na ol i stilim mani bilong supamakot bipo ol i ronawe long ka.

Provinsel Plis Komanda Ben Simanjon i tok plis i save long wanpela long ol stilman bikos em i bin wok pastaim long dispela supamakot.

Enga:

Ol i mekim Enga olsem wanpela "eria bilong pait" o wo zon bihainim ol wanpisin pait we i kamap long hap.

Provinsel Plis Komanda Superintenden Allan Kundi i tok sikipela pipel i dai pinis bihain long ol lain bilong narapela wanpisin i banisim ol long Sopas na kilim dai ol.

Moa trabel na pait i go het long ol arapela hap bilong Enga.

Ol bin salim ol Mobail Plis yunit long helpim lukautim lo na oda long provins.

Ol i kisim ol skwat memba long faivpela Hailans provins. Long las Sarere, ol skwat memba i bin go insait long wanpela ples klostu long Sopas na kisim 22 saspek we i bin stap insait long pait bilong kilim dai sikipela man.

Mista Kundi i tok planti ol paitman i bin kisim tok-save long plis i laik go insait long ples na mekim wok painimaut na ol i bin ronawe.

Tasol em i tok long dispela 22-pela man ol i holim pasim, foapela em ol i strongpela kriminel. Wanpela bilong ol i bin stap long kalabus long 15-pela krismas na nau em i wokim rong gen na plis i holim pasim em gen.

Em i tok sapos pait i go het yet, mobail skwat plis bai karimaut wok bilong ol long holim pasim ol trabel meka inap long lo na oda i kamap bek long komyuniti.

Mista Kundi i putim strongpela toktok i go long pablik bilong noken bagarapim ol samting bilong Sopas SDA Jenerel Hospital. Em bin tok ol plis bai i stap lukautim lo na oda, haus sik, ol woklain na ol samting.

Taurama, Mosbi:

Taurama Supa Seva stoa long las Sarere i bin lusim klostu K1,000 long han bilong ol stilman.

Plis ripot i tok wanpela man wantaim gan i bin hensapim kesia long fudba seksen na stil mani inap long K965 long las Sarere apinun. Em bin karim wanpela pistol taim em i wokim stil pasin ya.

Plis i tok long samting olsem 12.30 biksan, wanpela man i bin wokabout i go insait long stoa na askim strong long mani. Taim em i wokim stil-pasin, em i kwiktaironawe bihainim baret i go olsem long Boroko.

Long narapela, tupela man i holim ol pistol i go insait long Zuki Mode stoa na stilim samting olsem K1000.

Plis i tok tupela i bin stilim wanpela ka ausait long stoa na ronawe long en.

Tripela balus i no pret long birua

MADELEINE AREK i raitim

Tripela ovasis balus bilong Air Niugini we i bin kam insait long kantri bihain long 12-kilok long Mande apinun taim ol memba bilong kontrol tawa (ATCA) i stapim wok bilong ol, i bin putim laip bilong planti pasindia long bikpela birua, Siaman bilong ATCA Peter Kamong i tok.

Dispela ol 3-pela flait em ol Eabas Flait i kam long Manila na Kens namel long 6 na hap pas 6 (6:30) long Mande apinun na Brisben long 12:30 long Tunde apinun.

Mista Kamong i tok em i no save sapos dispela ol balus i brukim sampela lo bilong Intanesenel Ea Trensport Asosiesen (IATA) tasol em i tok ol i bin putim laip bilong planti ol pasindia bilong ol long bikpela birua.

"Taim ol lain long trafik i wok, ol pilot i save kisim bel isi long ronim balus bikos ol i save bai mipela i was gut na kisim ol i kam insait. Dispela wanpela dei mipela i no wok, ol i kisim bikpela taim tru, bikos

olsem wanem bai ol i kisim balus i kam insait na i no bungim birua?" Mista Kamong i tok.

Menesing dairekta bilong Air Niugini Andrew Ogil, i tok Air Niugini bin lusim moa long K1.25 milien bihain long dispela stap wok long Mande apinun. Em i tok tu olsem dispela stap wok i bagarapim ron bilong 91 balus na 4,350 pasindia i painim bikpela taim tru tru.

Ol ATCA memba husat i stat wok gen long wan kilok long Tunde apinun, i bin go long dispela stap wok bihain long Dipatmen bilong Sivil Eviesen (DCA) i no stretim rot bilong ol wokman long Mosbi, Lae, Madang, Tokua, Wewak, Goroka, na Hagen husat i save wok leit.

Na ol i tokim gavman olsem ol bai stapim wok yet i go inap gavman i stretim dipela hevi ol i gat long trenspot.

"Ol wokman husat i save wok let o save kam long nait sif i save painim taim tru long sait bilong trenspot. Panti taim ol raskel i save mekim save long ol. Long Mosbi yet, i bin gat foa o faiv ripot we

birua i bungim ol" Mista Kamong i tok.

Dispela hevi long sait bilong trenspot i no bilong nau. Long Epril 18 1988, ol lida bilong ATCA i bin sindaun wantaim gavman na Dipatmen bilong Sivil Eviesen long toktok long dispela samting. I kam inap nau, Dipatmen i no wokim wanpela samting long stretim dispela hevi.

Minista bilong Sivil Eviesen, Kala Swokin na Minista bilong Woks na Implimentesen, Yauwe Riyong long wanpela ripot, i tok ol i lukim olsem dispela askim i tru stret na i wok long painim yet wei bilong stretim dispela hevi.

Mista Kamong i tok ol i givim pinis ol ka long dispela 7-pela senta na long dispela as tasol ol i stat wok gen long Tunde apinun.

Ol dispela ka Dipatmen bilong Sivil Eviesen i-rentim long Avis Rent a Car long K42,600.

Dispela stap wok i no kamapim wanpela hevi long ol liklik balus olsem MBA wantaim Islands Nationair na ol i wokim yet ol ron bilong ol long Mande na Tunde.



• Buldosa i brukim ol haus long Biliau Poin setelmen long Madang na plis tu i sapot long dispela i mas kamap.

Madang plisman rausim Biliau setelmen

ROBERT KAIA i raitim

OL PLISMAN bilong Madang i sambai taim dosa i brukim daun 70 haus bilong ol setelmen lain long Biliau poin insait long Madang taun na lusim 35 famili i nogat haus stat long Fonde Novemba 19 i go pinis long Fraide Novemba 20.

Ol plisman bilong Madang i mekim dispela bihainim wanpela kot oda las wik we i givim tok orait long wanpela kampani Anoutol Limited husat i kisim laisens olsem papagraun bilong posen 511 laisens namba 193 (NR) bilong dispela Biliau graun.

Ol setelmen lain i kros nogut tru long kain pasin ol plisman i mekim na i tok olsem ol i no bin kisim sampela kain notis i kam long ol plisman o developa bilong dispela graun na ol i guria long lukim wanem samting i kamap long ol.

Mausman bilong ol setelmen lain, John Simbai i tok ol setelmen lain bai kisim tingting bilong ol loya long dispela pasin. Long wankain taim, ol setelmen lain i wokim ol giaman haus bilong stap insait long ol.

Madang Provinsel Plis Komanda, Ben Simanjon i tok ol i bin givim kot oda i go long ol setelmen lain long 1994. Tasol ol setelmen lain i no harim tok na kirap lusim dispela graun. Em i tok long dispela yia ol i bin holim sampela miting namel long developa na ol setelmen lain we em i givim K300 i go long wan wan famili long kirap lusim dispela graun na i go sindaun long narapela hap. Em i tok em i witnessim developa i baim wan wan famili long K300 we Madang Taun Kaunsel i givim ol.

Mista Simajon i tok Gavman i baim dispela graun long ol papagraun long 1970.

Ol setelmen lain i bin askim kot long stapim developa long rausim ol sampela taim i go pinis tasol kot i no harim askim bilong ol bihainim sampela teknikal eria bilong dispela toktok.

Em i givim strongpela tok lukaut i go long ol setelmen lain long noken harim toktok bilong sampela lain husat i giamanim ol na tok ol i sindaun long graun ol i baim pinis. Em i tok sapos ol plisman i painim aut husat dispela man i mekim dispela pasin ol bai putim ol long han bilong lo.

Em i tok tu olsem ol plisman bai holim pas na sasim husat man i sindaun yet long dispela graun sapos developa i kisim narapela kot oda. Em i tok pastaim tru ol setelmen lain i kisim K300 i soim olsem ol i redi long lusim dispela graun na go sindaun long narapela hap. Em i tok sampela lain i go pinis tasol i gat wan wan manmeri i wok long paulim tingting bilong ol setelmen lain lain long stap yet long dispela graun.

Yunien egensim 1999 baset

VERONICA HATUTASI i raitim

OL YUNIEN insait long kantri i egensim 1999 nesene baset.

Ol i tok em i no gutpela baset na gavman i mas kisim bek na lukluk gen long en.

Tasol long Tunde apinun, palamen i go het na oraitim baset. Planti pipel i kolim dispela baset wanpela nogut baset long histri bilong PNG bihain em i kisim independen.

Maski gavman i pasim baset na i leit pinis long wokim senis, ol Yunien i no stop. Ol Yunien lida i bin bung long toktok long wanem samting ol bai i mekim.

Samting olsem 21 yunien bilong pablik na praivet sekta insait long kantri i stap wantaim na Tred Yunien Kongres i go pas long makim maus bilong ol long autim wari bilong ol. TUC i gat sapot long ol barata intenesenel yunien long Australia, Amerika, Jemeni na ol arapela kantri.

Bikpela samting we ol i no amamas long en em gavman aninit long dispela baset i rausim ol ogenaisesen we i save lukautim hevi bilong ol wok manmeri olsem Minimum Wejes Bod, Industri Konsiliesen na Abitresen Traibunel, Opis Bilong Industri Rejistra, Nesenele Traipatet Konsaltativ Kaunsel na Nesenele trening Kaunsel.

Ol i no wanbel na ol i laik bai gavman i glasim bek gen disisen bilong em na kisim bek ol ogenaisesen na ol statuteri bodi we em i laik rausim olsem Nesenele Rises Institut, Ligel trening Institut, PNG Spots Komisin, Medikel Rises Institut, Nesenele

Agrikalsa Rises Institut, Institutu ov Pablik Edministresen na ol arapela moa.

Ol Yunien i egensim tu K1.5 milien we wan wan memba bilong palamen bai i kisim olsem Ruel Eksen Progrem long 1999 bilong ol progrem insait long wan wan ilektret bilong ol. Pastaim ol save kisim K300,000 tasol long las yia, mak i go antap long K500,000.

Narapela samting tu em ol i laikim gavman bai i rausim ikonmik edvaisa bilong em, Hamidian- Rad husat pastaim i wok wantaim Wol Beng bikos ol i tok bikpela mani we gavman i yusim long baim em ol ken yusim long ol arapela wok developmen insait long kantri.

Ol i tok pasin we gavman i wokim long rausim ol industri na statuteri bodi we i lukautim raits bilong ol woklain na tu givim trening long ol manmeri bilong kantriem i rabis tru na kantri bai i lus.

Olsem na long Tunde apinun, moa long 2-3,000 memba bilong pablik na praivet sekta yunien na ol meri grup i wokim wanpela gutpela mas i go long palamen haus na givim ol petisen bilong ol long Prais Minista Bill Skate.

Sampela i wok long karim ol hap pepa we ol i raitim "Baset i sting, Senisim baset long lukautim ol pipel, Antapim Sias fan bilong ol memba i min olsem rausim ol bikpela sevis olsem helt na edukesen, Riviuwim baset na moa.

Ol bin laikim Mista Skate long givim ol gutpela ansa long ol askim bilong ol.

Mista Skate wantaim lain bilong em i wokabout i kam daun long Palamen na tokim ol olsem em wanpela i no inap long wokim disisen tasol em bai i bung wantaim kabinet na givim ansa long ol.

WANTOK

All departments, Phone: 325 2500 - Fax: 325 2579
P. O. Box 1982, Boroko, NCD, Papua New Guinea

Publishing Weekly, Thursday, for
Word Publishing Company Pty. Ltd.

Printed and published by Anna Solomon of Bittern Place,
Gordons, at Allotment 2, Section 209, Spring Garden Road,
Hohola, for Word Publishing Co. Pty. Ltd.

Acting General Manager and
Group Editor in Chief:

Anna Solomon.

Advertising Manager:

Mike Kanin.

Editor of Wantok:

Papers distributed by air
throughout PNG.

Available by air mail
subscription within
Papua New Guinea
and overseas

Advertising deadlines, Display bookings: Tuesday midday.
Camera ready copy: Wednesday midday.
Classified Advertising: Wednesday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.

Wanwan ilektoret bai kisim K1 milien

YAKAM KELO i raitim

NESENEL Gavman i brukim K1 milien long wanwan ilektoret insait long baset. Tasol dispela mani bai i stap aninit long Rurel Developmen dipatmen na i go long wanwan ilektoret, Minista Jimson Sauk i tok.

Mista Sauk i tok bipo ol memba i save kisim Ilektoret Developmen Fan (EDF) long han bilong ol.

Tasol nau ol bai ino inap kisim. Bai ol i mas sindaun insait long miting bilong Distrik Plening Komiti (DPC) we ol bai kamap wantaim ol projek na wok bilong distrik. Ripot bilong ol long kisim mani long projek bai i go long opis bilong Rurel Developmen dipatmen na Minista long skelim pastaim.

Mista Sauk i tok taim em i orait long dispela projek bilong distrik, bai em i givim mani i go long pro-

jek stret na em i no inap givim mani long han bilong ol memba long kisim na i go baim projek.

Jimson Sauk em Minista bilong dispela nupela dipatmen i tok olgeta risit na ripot bai i stap long opis bilong em na nogat wanpela man bai yusim mani long wanpela ausait wok bilong em yet.

Em i tok dispela K1 milien i bilong ol projek na progrom long rurel eria na distrik we bai kamapim developmen long eria,

na i no bilong wanpela man o memba long yusim long wok bilong em yet.

Mista Sauk i tok dipatmen bilong em i gat pawa long tok nogat o tok yes long ol projek we distrik plening komiti i salim i kam long kisim mani.

Tasol ol memba i gat K250,000 we ol i save kisim pastaim aninit long Nesenel Developmen Fan (NDF). Tasol Mista Sauk i tok ol bai bihainim ol sampela nupela rot

we Gavman i wok long kamapim long ol memba i mas yusim stret dispela mani.

Mista Sauk i mekim ol dispela toktok long rausim ol krangki tingting olsem wanwan memba bai kisim K1.5 milien olsem EDF mani bilong ol. Nupela dipatmen bilong Rurel developmen bai lukautim dispela mani na givim long ol distrik bihainim wanem projek na wok ol i askim long en bihainim pepa bilong ol.

1999 baset em bilong Skate, Philemon i tok

PETER MAIME i raitim

Sedo Minista bilong Treseri na Kopret Afeas, Bart Philemon i tok 1999 baset em baset bilong Prais Minista Bill Skate long holim yet pawa bilong kantri.

Mista Philemon i mekim dispela toktok long Tunde taim em i makim maus bilong Oposisen na tok long baset bilong 1999 long palamen. "Sapos yu lukluk gut tru long baset yu bai save olsem dispela baset ol i wokim bai Skate Gavman i stap yet long pawa."

Mista Philemon i tok olsem Gavman i giamanin ol pipel long sait bilong 1999 developmen baset. Em i tok developmen baset i no bilong ol rurel pipel. Em i tok mani gavman i putim long developmen baset em i hait mani bilong baim ol memba bilong palamen bai Mista Skate i ken stap yet long pawa.

Deputi Prais Minista na Minista bilong Treseri na Kopret Afeas lairo Lasaro i tok aut las wik long baset olsem, developmen baset em Pablik Invesmen Progrom bilong Nesenel Gavman. Insait long dispela plen mani i gat kankain projek na progrom we ol Gavman Dipatmen na ol provins bai mekim i ken sut stret long mak na gol bilong Gavman.

Gavman i putim K861.6 milien insait long dispela developmen baset. Mista Lasaro i tok ol eria dispela

mani Gavman bai yusim em praimeru edukesen, praimeru helt kea, lo na oda, agrikalsa na bilong stretim ol kankain Gavman sevis i stap pinis olsem rot, bris na ol haus sik.

Mista Philemon i tok, planti mani insait long developmen baset bai go long lukaut bilong ol memba bilong palamen, wanpela bilong en em Distrik Sapot Grent. Na em i tok dispela i wan kain olsem Ilektret Developmen Fan bilong bipo. Wok developmen bai ino inap kamap taim pasin bilong Ilektret Developmen Fan i go het yet wantaim moa mani insait long 1999 baset, Mista Philemon i tok.

Mista Philemon i tok tu olsem, long dispela taim palamen i no kisim wanpela ripot bilong Pablik Akauns Kominti long ol ripot bilong mani bilong ol yia i go pinis. Em i tok nau yet, i nogat plen o polisi we ol memba bai bihainim na ripot bek long ol mani bilong ol wok insait long distrik bilong ol.

Em i tok dispela baset i mekim rot long planti paol pasin bai kamap long sait bilong yusim mani. Mista Philemon i tok, baset bilong 1999 i no soim wanpela rot long ol liklik manmeri, tasol em bai helpim ol politisen long kamapim planti gridi na paol pasin.

Tasol, long Tude apinun, gavman i no bisi tumas long toktok bilong Oposisen na i bin pasim dispela baset bilong 1999.

Ol benk woka bai skelim straik eksen

OLGETA wokman bilong benk na arapela haus mani bai bung tude long Ela Beach nambis long tokaut long hevi bilong ol egensim Gavman.

Presiden na Seketeri bilong PNG Benk na Fainens Institusen Wokas

Yunion (PNGBFIWU) Tudi Egi na Sebastian Silih i bai tokim olgeta wokmanmeri bilong benk long hevi bilong Gavman baset we ol inap bungim hevi long en long 1999. Bai yunion i tokim ol long ol eksen we Gavman i mekim long rausim sampela

pablik opis na wok we ol i save kisim srong long en long wok bilong ol na tu eksen bilong Gavman long rausim Rurel Developmen Benk.

Bai yunion i toksave long ol memba tu long wanem bekim ol i gat long dispela

baset bilong Gavman na straik eksen bilong Tred Yunion.

Olgeta wokmanmeri bilong benk bai bung long 12 kilok tude na dispela i min olsem sampela benk bai i nogat inap wokman long sevim ol kastoma long tude.

Gavman rausim skul sabsidi bilong 1999

i kam long pes 1

Tasol em i tok dispela i no min olsem Nesenel Gavman i no inap sapatim ol skul long Edministrativ Kos. Nogat. Mista Taranupi i tok long 1998 Nesenel Gavman i bin givim wan wan Provinsel Gavman K38 milien bilong karamapim Edministrativ Kos bilong wan wan skul.

Insait long 1999 baset bilong Edukesen, em i tok, Nesenel Gavman i hapim dispela Edministrativ Kos mani i go antap long K40 milien. Mista Taranupi i tok bikos planti Provinsel Gavman i no bin yusim gut mani Nesenel Gavman i bin givim ol long 1998 bilong Edministrativ Kos, Nesenel Gavman i no inap givim dispela mani i go long ol Provinsel Gavman gen long 1999. Em i tok Nesenel Gavman yet bai holim pas dispela mani na givim i go long wan wan skul.

Mista Taranupi i k long 1999, em i gat bikpela tingting ong yusim K40 milien bilong dispela Edministrativ Kos mani long helpim sampela ol praimeru na vokesenel skul long stretim ol klasrum na haus tisa i bagarap pinis o wokim ol nupela klasrum na haus tisa. Em i tok tu olsem Edministrativ Kos mani bilong 1999 baset bilong Edukesen Dipatmen em i no inap olsem na Nesenel Edukesen Dipatmen i no inap fandim olgeta skul long wankain taim long wanpela yia.

Mista Taranupi i tok em i gat bikpela laik long lukim Nesenel Gavman i apim mani insait long Edukesen Dipatmen

baset long ol yia i kam bihain bai Nesenel Edukesen Dipatmen i ken putim moa mani i go insait long mekim ol Edministrativ wok.

Long sait bilong ol Yunivesiti na Sekenderi skul, em i tok Edukesen Dipatmen i kamapim wanpela spesel Developmen Grent pinis we Nesenel Edukesen Dipatmen i putim sampela mani long sait bilong stretim na wokim ol nupela klasrum na haus tisa. Em i tok dispela pasin bai go het yet long 1999.

Mista Taranupi i tok aninit long edukesen rifom, Nesenel Gavman i putim pinis wok bilong lukautim ol Top Ap skul i go long ol Provinsel Gavman. Long dispela as em i tok wan wan Provinsel Gavman i mas painim mani bilong

glasim ol hevi bilong ol Top Ap skul na stretim.

"Askim bilong mi nau i go long ol papamama long amamas long wanem disisen Nesenel Gavman i mekim. Mi singautim yupela olgeta papamama long wok bung wantaim ol tisa, ol bod ov menesmen na ol edukesen opisa bilong kamapim gutpela envairomen bai ol pikinini i ken skul gut," Mista Taranupi i tok.

Mista Taranupi i tenkim tu Gavana bilong Nesenel Kapitol Distrik Komisen, Philip Taku long putim edukesen olsem namba wan prairiti insait long baset bilong em. Mista Seravo i tok olsem bikos NCDC i putim mani pinis insait long 1999 baset bilong NCDC long helpim ol skul insait long NCDC.

Redi long bikpela ren na win

i kam long pes 1

Ol ripot i tok namel long mun Desemba na Februeri La Nina bai i kamap strong na kamapim ol tropikel saiklon long Australia na Pasifik rijen. Taim El Nino i kamap, solwara long Pasifik Osen i save hot na kamapim taim bilong bikpela san long sampela hap bilong Saut Is Esia, Isten Australia na PNG. Na La Nina i save kamapim bikpela ren, win na ol arapela birua moa.

Ripot bilong wol weda sevis i tok La Nina i wok long kam olsem long sauten hemisfia we ol i ting bai kamapim ol strongpela win na ren long not is

Australia, Mauritius, sampela ol ailan kantri long saut wes Pasifik na Nu Silan.

Ripot i tok ol strongpela win na hevi long rijen bai i kamap na go het inap long mun Epril long neks yia. Ripot i tok yumi lukim ol tok lukaut sain pinis na i moabeta sapos yumi luksave na redi gut nau.

Em i tok long dispela yia, La Nina i kamapim ol hevi ren, bagarap na dai long Indonesia, Saina, Bangladesh, Not na saut Korea, Laos, Mongolia. Na long ol arapela kantri olsem sentrel Afrika, Not Amerika, na saut wes Yunaitet Stets ol i no kisim ren long longpela taim.



Bogenvil na Niugini Ailans nius wantaim VERONICA HATUTASI

WANTOK
NIUSPEPA BILONG OL PAPUA NIUGINI

Skate mas stretim ol yunion

PRAIM Minista Bill Skate i mas mekim gut long ol yunion memba bilong PNGTUC bikos dispela yunion em karapim ol plisman, woda, Telikom, Elcom, Benk, Air Niugini Enjina na Ea hostes, ol sip woka na pablik sevans tu. Praim Minista i promis long lukluk long hevi bilong ol olsem na em i mas mekim gut bikos ol dispela lain yunion i lukautim ol bikpela seksen bilong ol wok we ol PNG manmeri bai kisim strong long en.

Gavman bilong Bill Skate i pasim baset pinis na i leit liklik nau long stretim hevi bilong ol yunion lain. Tasol sapos Gavman i no laik hevi i kamap long kantri, em i mas stretim wari bilong ol lain ya bikos i no longtaim i go pinis, ol wok bilong benk, balus na arapela sevis i bin bagarap taim Telikom woka i bin straik.

Gavman i mas harim tok na sanapim bek opis we i save lukautim olgeta hevi na wari bilong ol woka long sait bilong potnait pe, haus, pinis pe, bos i rausim man long wok na arapela hevi moa. Dispela opis i stap na ol wokman i save gat sapot long wok bilong ol.

Gavman i no ken traim long kontrolim wok bilong ol wokmanmeri na rausim pawa bilong ol long tokaut long hevi na wari bilong ol. Bikos dispela em domokretik kantri we olgeta manmeri i gat rait long toktok long hevi na wari bilong ol. Sapos Gavman i gat dispela kain tingting long rausim strong na pawa bilong ol wokmanmeri long kantri, ating dispela kantri bai bungim bikpela hevi moa i kam. Gavman i mas stretim gut wari bilong ol yunion lain bikos nogut hevi bilong ol i bagarapim olgeta liklik grasrut manmeri long ples husat i save kisim strong long wok bilong ol dispela lain yunion memba. Mipela i pret long benk bai pas, balus bai no inap ron, ol telefon bai ino inap ring, nogat lait long haus, sip i no inap ron na ol arapela moa.

Ol Pjs monita mekim gutpela wok long Bogenvil

OL PIS monita bai karimaut wok bilong ol long Bogenvil abrusim nupela yia long strongim wok long ailan na pipel i ken painim gutpela sindaun.

Bogenvil Afeas Minista Sam Akoitai i bin tokaut long dispela samting bihain long em i kam bek long bung long Brisben las wik wantaim ol kantri we i gat ol PMG memba i wok long Bogenvil.

Samting olsem 300 PMG memba i kam long Australia, Nu Silan, Vanuatu na Fiji i stap wok long Bogenvil long helpim ailan na pipel i kisim gutpela sindaun na tu lukim olsem ol samting we i stap insait long Lincoln na Burnham agrimen i go gut na ol grup husat i bin stap insait long pait long Bogenvil wantaim Nesenel Gavman i bihainim ol dispela agrimen.

Mista Akoitai i amamas long gutpela wok we ol Pis Monitoring Grup i mekim long Bogenvil na tu long lukautim ol bung na toktok namel long Nesenel Gavman na ol ki grup long Bogenvil i go gut.

PMG i bin kirapim wok bilong em long Epril 30 long dispela yia bihain long Nesenel Gavman na ol Bogenvil lida i sainim Sispai Agrimen long stapim pait. Tasol pastaim, Trus Monitoring grup we i bin stat wok long Bogenvil long mun Novemba 1997 i bin stap. Ol memba bilong TMG i bin kam long foapela kantri olsem

Australia, Nu Silan, Fiji na Vanuatu yet.

Mista Akoitai i tok PNG i amamas long gutpela sapot we foapela kantri i givim tasol long wankain taim tu, em i tok dispela helpim bai i no inap long i go i go.

"Dispela helpim na sapot bai i pinis taim ful sivil atoriti i kamap long ailan," Mista Akoitai i tok.

Mnista Akoitai i no laikim ol grup long Bogenvil na ol nesenel ejensi long les long wok bilong kamapim gutpela sindaun na lo na oda long ailan.

"I gat bikpela wok i stap yet long kamapim bek gutpela sindaun," Mista Akoitai i tok.

Ol arapela samting we bung i bin lukluk long en em ol wok progres long bringim bek ol sevis long Bogenvil na karimaut ol pablik aweanes progrem i sut long wok bilong painim gutpela sindaun.

Mista Akoitai bai i bung wantaim ol ki eid dona grup bihain long dispela palamen bung we i go het nau i pinis.

"Mi laik glasim gen ol wok ol bin karimaut long Bogenvil long dispela yia na bihainim dispela, mi laikim bai ol i putim helpim bilong ol long ol projek i go long ol wok we bai i kamapim gutpela sindaun na tu kamapim moa wok long ol yangpela, ol meri na ol BRA na resistens lain", Mista Akoitai i bin tok.

Wes Nu Briten wetim yet skul subsidi mani

WES NU Briten Edukesen Divisen i wet yet long kisim skul subsidi mani long baim las kwata i go long ol skul insait long provins.

Em i wok bilong ol Provinsel Gavman long wokim peimen bilong namba tu na foa kwata taim Nesenel Gavman i lukautim namba wan na tri kwata.

Provinsel Asisten Seketeri bilong Edukesen Joseph Malagisa i tok ol i peim pinis hap mani inap long K14,000 long ol Provinsel hai skul na teknikel skul na ol bai i peim laspela hap long balens klostu taim ol i kisim mani.

Em i tok bikos kantri i gat hevi long mani i sot na olsem Gavman i bungim hevi long mani na dispela i as long ol skul i no kisim olgeta skul subsidi mani yet. Tasol peimen bai i go isi isi, em i tok.

Mista Malagisa i tok ol bai ronim ol skul wantaim liklik mani ol i gat inap long pinis bilong skul yia long Desemba 11.

Ol komyuniti skul insait long Wes Nu Briten i no kisim yet namba foa kwata o las kwata bilong skul subsidi mani.

Mista Malagisa i tok divisen i no kisim yet hamas ol papamama bai i peim long skul bilong ol pikinini bilong ol long neks yia.

Em i tok ol Bod ov Manesmen bilong ol skul wantaim Provinsel Edukesen Bod i save makim ol skul na projek fi bilong ol skul long ol provins.

Em i tok divisen bilong em bai i tokaut long ol nius long dispela samting long mun Janueri bihain long ol grup i bung na redim na stretim mak bilong ol fi.

WANTOK
NIUSPEPA BILONG OL PNG STRET

P. O. Box 1982, Boroko
Telepon namba: 325 2500
Feks namba: 325 2579

**PE BILONG WANPELA
YIA 52 NIUSPEPA**

PLES	AIR
Arapela PNG eria	K52
Ostrelia na Nu Silan	K84 (US\$46)
Esia Pasifik na Japan	K99 (US\$55)
Amerika na Yurop	K172 (US\$95)

Rabaul givim sapot long turisim

TINGTING long strongim wok bilong turisim long Rabaul em i wanpela bikpela eria i stap long plen bilong distrik atoriti aninit long wok bilong long stretim gen taun, Memba Sir John Kaputin i tok.

Bilong lukluk long dispela eria, ol i sanapim Rabaul Turisim Promosen komiti wantaim 7- memba long en.

Sir John i tok turisim bai i pulim moa mani na wok i go insait long ol pipel, distrik na provins.

Bipo long hevi bilong maunten paia i bagarapim Rabaul taun long 1994, provins i save kamap top long pulim ol turis insait long PNG.

Sir John i tok ol eria we komiti bilong en, Join Plening na Baset Praioriti Komitii bai i lukluk long developim em:

- Eria klostu long haba na maunten long baksait;
- Ol pilai na ol arapela eria bilong kisim gutpela malolo olsem swim, pulim pis, raun long bot long lukim ples, wokabaut na ol kalsa samting long ol ples,
- Ol fres fud maket na
- Lukluk long maunten paia na taun we i gat histri long en long taim yet bilong namba tu bikpela pait na ol Japan, Sainaman na Jemeni turis husat i save go long Rabaul long olgeta yia bikos ol lain bilong ol i bin stap long hap bipo na bihain long pait na tu bipo long pairap bilong ol maunten paia.

Em i tok planti kago i wok long i go i kam long Rabaul bris na mak long ol samting i winim 20 pesent moa bipo long dispela em i save kisim taim maunten paia i no bagarapim Rabaul foapela krismas i go pinis.

Sir John i tok maski bagarap i kamap na provins na ol pipel i bin bungim hatpela taim, ol hotel na ges haus i bin stap op na dispela i soim trupela piksa long spirit bilong Rabaul.

Antap long olgeta, Rabaul haba em i winim ol arapela samting long pulim ol turis na mani long provins, Sir John i bin tok. Turisim promosen komiti we Sir John i siaman long en na i gat ol arapela bikman long komiti olsem Distrik Edministreta Isimel Puipui, Tua opereta Meli Paivu, Sir Ronald ToVue, Meya na Presiden bilong Rabaul taun LLG Ephreim Jubilee, Is Nu Briten Turis Buiro Dairekta Nelson Paulias na Ezekiel Burua.

Sir John i bin tok tru ol bagarap i kamap we i rausim ol man long stap na wok long taun, Rabaul i go het long stap olsem tru trupela spirit bilong em.

Em i tok ol indastriem na komesel sekta i sut long bris (port) na hospitaliti olsem ol wok long hotel samting na ol dispela i op na wok nau long Rabaul.

**BIABIA HARIM OLSEM OL I RAUSIM
GAVANA JENEROL NA EM TINGTING I STAP...**



**NAU EM RAITIM PAS IGO LONG PRAIM
MINISTA LONG APLAI...**



**WAN WIK BIHAIN.. BIABIA KISIM
PAS BILONG P.M...**



P.M. I RABISIM EM STRET...



Manus plis bai askim Difens Fos long lukautim solwara

PROVINSAL Plis Komanda long Manus bai i putim askim long PNG Difens Fos long karimaut ol wok seveilens o putim was long solwara bilong Manus long ol sip bilong ausait kantri i save raun long solwara mak bilong kantri.

PPC Joseph Morehari i mekim dispela toktok bihain long wanpela plis patrol long Manus i bin lukim wanpela ovasis sip i tromoi ol 200 lita dram long solwara namel long Manus na ol Westen Ailan grup long Trinde Novemba 11.

Namel long 6 na 7 kilok Trinde nait tupela wik i go pinis, tupela patrol bot we i bin gat 12-pela plisman long en i wok long kam bek long patrol long ol Westen Ailan grup taim ol i lukim wanpela bikpela kontena sip bilong ausait kantri i tromoi ol dram long solwara. Nem bilong sip em Cape Amerika. Taim ol plisman i tok-save long ol lain long sip na ol i laik sekim sip, ol kru i bin sutim paia flea long ol na ol plisman i

bin sut bek long ol. Sip i bin kwik-taim go long bikpela solwara.

Inspekta Morehari i tok ol bin putim ripot long dispela samting i go long Provinsel Disasta opis tasol Wantok i no nap long kisim toktok long ol. Opis bilong Provinsel Edministreta i no kisim wanpela ripot long dispela samting yet. Inspekta Morehari i tok bihainim dispela samting, em bai i putim wanpela askim long ol nevisip long Lombrum PNG Defens Fos beis bilong karimaut ol was na raun long solwara bilong Manus na lukim olsem nogat ol sip bilong ol ausait kantri i kam insait long solwara bilong PNG. Dispela em long stapim ol ausait sip we i brukim lo bilong kantri olsem painim pis long mak bilong yumi o tromoi ol strongpela posin pipja.

Inspekta Morehari i tok insait long tupela mun nau, Manus provins i stap isi tasol wantaim nogat bikpela trabel i kamap

Dusava i go bek long Nesenel Kot

YAKAM KELO i raitim

Long Tunde dispela wik, 5-pela Jas, Sief Jas Sir Arnold Amet, Kubulan Los, Mark Sevua, Bernard Sakora, Timothy Hinchliff i bin skelim gen aplikesen bilong Mista Dusava na larim dispela kot i go bek gen long Nesenel Kot long harim.

Mista Dusava nau i gat sans gen long kamapim kot bilong em egensim ol toktok we i kamap long em na rausim em.

Nesenel Kot bai tokaut long wanem taim bai ol i kamapim dispela kot bilong Mista Dusava.

Dispela bai holim ol pipel bilong Yangoru Sausia i stap klostu wanpela krismas olgeta we ol bai i nogat memba long haus palamen long dispela yia.

Mista Dusava husat em wanpela kandidate bilong Pipels Progres Pati (PPP) i bin kamap Minista bilong Edukesen na Kalsa taim em i winim ileksen na kamap long haus palamen long las yia. Tasol olpela opis em i bin wok long em i skelim Mista Dusava i stap aninit long lo i banisim ol lida (Lidasip Kod) olsem na em i kamap long Lidasip Traibunel, kot bilong ol lida long dispela yia taim em i kamap memba bilong palamen.

OLPELA memba bilong Yangoru Sausia i gat sans gen long kamapim kot bilong em long Nesenel Kot bihain long Suprim Kot i skelim disisen bilong em long Tunde dispela wik.

Suprim Kot i bin sanap yet long disisen bilong Lidasip Traibunel long dispela yia we Jas Tracey Doherty i bin rausim Dusava olsem memba bilong Yangoru Sausia bihain long sampela asua bilong em olsem lida insait long opis bilong Foren Afeas taim em i bin seketeri bilong dispela opis.

Long las mun, Suprim Kot i skelim disisen bilong Nesenel Kot we Dusava i apil long en na kamap wantaim disisen olsem Mista Dusava i mas raus long opis bilong Yangoru Sausia.

Tasol loya bilong Dusava, Greg Sheppard i aplai gen long Suprim Kot i mas skelim gen disisen bilong em bikos sampela poin Mista Dusava i sanap long en em Suprim Kot i no skelim gut na kalapim tasol long wokim disisen.

Pipel ken amamas na-alleluia long baset, Skate i tok

Praim Minista, Bill Skate i ting PNG "ken amamas na tok alleluia" taim em i klaim sampela polisi insait long K2 bilien baset bilong kantri.

Mista Skate i tok dispela baset bilong neks yia em narakain long ol narapela baset bipo bikos baset em bilong ol pipel bilong PNG stret. Em i tok, baset bilong 1999 em grasrut baset we ol wok developmen bai kamap long ol rurel eria.

Mista Skate i tokim ol nuismanmeri long Mande olsem dispela baset we i lukluk moa long rurel developmen bai stapim ol planti manmeri i drip nabaut i go long ol taun, na dispela tu i ken daunim ol hevi bilong lo na oda long kantri.

Tasol Lida bilong Oposisen Bernard Narokobi na ol memba bilong Oposisen i tok baset bilong 1999 "bai i no inap wok." Wanpela olpela Fainens Minista bipo long taim bilong Namaliu Gavman na memba bilong Hagen, Paul Pora i tok Gav nan bilong Skate i no skelim gut na ol i hariap tumas long mekim dispela baset bilong neks yia.

Mista Pora i tok moa long mani Gavman i katim long baset bilong ol Rises Institut long kantri olsem Nesenel Rises Institut, Medikol Rises Institut, Nesenel Agrikalsa Rises Institut na ol narapela. Em i tok Gavman mas putim mani bek

long ol dispela Institut.

Mista Pora i bilip dispela ol skul i stap bilong kirapim ol gutpela save manmeri long kirapim ol wok developmen long kantri.

Memba bilong Mosbi Saut Ledi Carol Kidu, i tok strong olsem toktok bilong baset i no long sait bilong mani o projek tasol. Em i tok, "tok bilong baset em yumi tok long ol pipel." Ledi Kidu i tok ol liklik manmeri long ples mas kisim gutpela sevis long kirapim laip bilong ol. Tasol baset bilong neks yia bai kamapim bikpela hevi long ol pipel bilong ples, em i tok.

Insait long dispela baset, Gavman i apim takis long planti samting long sait bilong ol bisnis na kampani long ol wok bisnis na sevis ol i kamapim. Wanpela nupela lo Gavman i pasim pinis em Veliu Eded Takis (VAT).

Dispela VAT em takis bilong ol kago, ol samting bilong bilas na ol sevis. Bai Gavman i kisim 10 pesen (%) takis long olgeta samting stat long mun Julai long neks yia. Mani i kamap long VAT bai mekim kamap wok na plen bilong 1999 baset. Taim takis i go antap long ol samting, ol turangu manmeri husait bai baim ol samting i pilim hevi long baim bikpela kos.

Gavana bilong Manus Stephen Pokawin tu i no amamas long baset bilong 1999.

Em i tok Gavman bilong Skate na Lasaro i katim daun mani i go long ol Provinsel Gavman. Em i tok, i luk olsem Nesenel Gavman i laik daunim strong bilong ol Provinsel Gavman.

Em i singaut i go long ol narapela Gavana bilong ol provins olsem ol i noken luksave long dispela baset bikos pasin Nesenel Gavman i wokim i no bihanim tingting bilong Ogenik Lo bilong Provinsel na Lokel Levul Gavman Kaunsel. Mista Pokawin i tok olsem Oganik Lo i tok long Provinsel Gavman i mas kisim inap mani long ronim long ol provins.

Palamen i pasim pinis baset long Tunde apinun bihain long 6 kilok 57-32. Gavman long dispela taim tu i bin yusim namba bilong em long votim egens sampela senis long baset Oposisen i karim i kam long floa bilong palamen.

Praim Minista Bill Skate i tok moa olsem taim bilong slip em pinis. Em i amamas olsem kantri nau i kirap bihain long 23 yia olgeta. Em tok nau em taim bilong skulim ol pipel long kisim kat bilong baset. Em i laikim bai ol pipel bilong PNG i mas save olsem baset bilong 1999 em bilong ol na Gavman bilong em bai mekim olgeta samting inap long skel bilong em, long givim gutpela sevis long olgeta pipel bilong PNG.

Japan givim K42,800 long Boram Haus Sik

FIRMIN GABRIEL i raitim

GAVMAN bilong Japan bai baim wanpela nupela ka bilong Boram haus sik insait long Is Sepik Provins long kos bilong K42,800 aninit long gren asistens program bilong grasruts projek.

Dairekta bilong medikol sevis long Boram haus sik, Dokta Edward Waramin i tok, Boram haus sik bai yusim dispela mani long baim wanpela 10 sita bas we ol bai yusim long go aut long ol ples long kisim blut bilong ol manmeri husat i laik givim blut.

Em i tok Boram haus sik i sot

long mani long baim ol medikol saplai olsem na ol i no bin go aut long ol ples long lukim ol sik manmeri na givim ol medikol sevis.

Dokta Waramin i tok namba bilong ol sik manmeri long Wewak haus sik i wok long go antap na long wankain taim ol bek bilong blut na saplai bilong haus sik i sot olgeta.

Em i tok long lukautim na sevim laip bilong ol sik manmeri, Boram haus sik i plen long kisim planti moa blut tasol ol i no gat inap mani long baim ol medikol saplai inap long taim gavman bilong Japan i tok yesa

long helpim ol.

Long makim maus bilong ol pipol bilong Is Sepik na Boram haus sik, Dokta Waramin i tenkim gavman bilong Japan long helpim ol long dispela mani.

Ambaseda bilong Japan long Papua Niugini, Yasuhide Hayash na Dokta Waramin i bin sainim dispela kontrak long embasi bilong Japan long las wik Fraide long Mosbi.

Insait long dispela seremoni, Mista Hayashi i tok gavman bilong Japan bai go het long helpim ol pipol bilong ples long PNG wantaim ol hevi bilong ol.

Ol Sissano pipel nau i gat gutpela wara bilong dring

WENCESLAUS MAGUN i raitim

OL SISSANO pipel insait long Rainbrum, Olbrum, Rowoi na Wipom kea senta long Aitape nau i gat gutpela wara bilong dring. Dispela i kamap bikos wanpela non-gavman ogenaisesen ol i kolim Medecins Sans Frontieres i bin helpim ol.

Medecins Sans Frontieres o MSF i bin yusim samting olsem US\$150,000 klostu K200,000 long putim 20-pela tenk wara bilong kisim ren wara, 6-pela hol wara ol i banisim long simen paip na wanpela spring bokis bilong banisim wanpela gutpela wara we ol pipel i ken yusim bilong dring, kuk, wasim ol samting na

was was.

Projek Kodineta bilong MSF long Aitape, Vancamp Nadia i tok grup bilong em i bin kisim bikpela helpim bilong mani i kam long Karitas Australia, Yunaited Nesens Developmen Program na Nesenel niuspepa. Misis Nadia i tok bikpela hap bilong dispela mani em ol i bin yusim long mekim wara projek.

Em i tok MSF i bin salim tripela memba bilong ol i go long Aitape long Julai 21, bilong glasim hevi na mekim wanpela tri mun imejensi program ripot. Bihain long ol dispela lain i pinisim dispela wok na mekim ripot bilong ol, ol i go bek long kantri bilong ol long Yurop na salim foapela ful taim voluntia i go kisim ples bilong ol. Ol dispela foapela voluntia i gat save bilong mekim wok olsem

dokta, nes, wara projek na Misis Nadia yet olsem projek kodineta.

Misis Nadia i tok stat long taim ol i bin kam long PNG na go long Aitape ol i wok bung wantaim PNG Gavman na helt dipatmen. Ol i mekim bikpela wok long Raihu Haus Sik na long Rainbrum, Olbrum, Rowoi na Wipom.

Em i tok long tingting bilong em tude, i luk olsem ol pipel bilong Sissano nau i stat long wokim ol gutpela haus, na sindaun bilong ol i wok long kamap gut gen. Dispela i mekim ol (MSF) i redi long lusim Aitape na go bek long Beljium wanpela kantri long Yurop we ol i kam long en. Ol voluntia bilong MSF long Aitape bai lusim Aitape long Disemba 2, 1998 na go bek long kantri bilong ol.



• Ol meri Sepik i bilasim ol bilum long ol sel na mekim save danis i stap long opening bilong Roma Helt Senta.

Bisop Dokta Wesley Kigasung em wanem kain man?

JERRY DANIEL i raitim

SAMPELA taim yu sindaun wantaim Bisop Wesley Kigasung na yu no kaikai buai, em bai kolim nem bilong yu na soim basket bilong em na tok, "Buai i stap". Em i save stori olsem sampela lain i bin givim dispela basket long em, ol i givim stia tok long em olsem; dispela basket em i bilong olgeta manmeri.

Wesley Waekesa Kigasung em i wanpela man bilong amamas na lap wantaim pren na wantok. Em i gat bikpela tingting long wanbel wantaim arapela na em i save wok hat long redim na mekim ol wok na toktok bilong en i ken kamap gut tru bai i ken helpim arapela.

God i givim em gutpela save long wok bilong skul. Long taim em i stap long skul, em i save i stap lida bilong ol sumatin. Taim em i liklik yet papa bilong en i wok evanselis long Menyamyama

longpela taim liklik na bihain i go long Siassi. Long Siassi papa bilong em i kamap pasto aninit long wok trening bilong misinari Reveren Kieth Nagel.

Skul

Kigasung i bin skul long Gelem Trening Senta insait long Siassi na bihain pinisim hai skul long Asaroka Luteran hai skul na i go long Martin Luta Seminari.

Long taim em i yangpela, em i no gutpela long wok bilong skul tasol, em i wanpela man bilong pilai spot tu. Bikpela gem em i gat nem long en, em Ruls Futbol.

Dokta digri

Taim em i pinisim pasto trening long Matin Luta Seminari na mekim wok pasto, em i kisim sampela skul moa long Papua Niugini yunivesti. Em i bin wok sampela taim long Kaintiba insait long Galf Provins.

Bihain long dispela em i bin wok na stadi moa yet i go i go na kamap namba wan man long sios bilong yumi na tu long ol


arapela sios insait long Papua Niugini, long kisim namba bilong Dokta digri.

Dispela namba i no isi long kisim. Em i kisim dispela namba long Amerika. Amerika em wanpela bilong ol ples we ol i save skelim wok skul moa yet; na taim wanpela man i kisim dispela namba long Amerika ol manmeri bilong olgeta hap i ken luksave long hatwok em i mekim bilong kisim dispela namba. Bihain Reveren Dokta Kigasung em i mekim wok prinsipol long Marting Luta Semira inap ol i makim em i kamap Het Bisop.

Dokta Kigasung em i wanpela bilong ol nupela lain wokman bilong sios i gat gutpela save long arapela eria bilong wok, kain kain hevi na tok insait long kantri na long ausait tu. Em i stap insait long wanpela liklik komiti bilong gavman em ol i save lukluk i go pas na kamapim tingting long sampela rot long kantri bilong yumi i ken bihainim.

Insait long haus bilong em yet, em wantaim meri bilong em Susi na tupela pikinini meri, Joana na Maureen, ol i save i stap isi tasol na wok na lotu wantaim arapela.

Wesley Kigasung em i wanpela man bilong laikim tru long kamapim gut plaua gaden bilong em na famili.



• Het Bishop bilong ELCPNG Dokta Wesley Kigasung.

Reveren Kigasung i go long Osenia Katolik bisop sinod long Rom

WENCESLAUS MAGUN i raitim

HET BISOP bilong Evanjelikal Luteran Sios bilong Papua Niugini, Reveren Dokta Wesley Kigasung i lusim Papua Niugini long Fonde las wik na i go long Rom long kibung bilong ol Osenia Katolik bisop sinod long Rom. Dispela bung i stat long Novemba 22 na bai pinis long Disemba 12.

Ol Katolik Bisop bilong PNG, Solomon Ailan, Niu Zilan, na ol arapela pasifik ailan kantri bai go long Rom na bungim Pop Jon Pol II na sampela kadinel na ol bisop husat i gat wok long lukautim wan wan kaunsel bilong wok bilong Katolik Sios insait long Osenia rijen.

Jenerel Sekreteri bilong Evanjelikal Luteran Sios bilong Papua Niugini long Lae, Reuben Kure i tokim Wantok olsem insait

long dispela sinod, Reveren Dokta Kigasung bai givim toktok long ministri bilong ol Kristen Sios insait long wol wantaim ol kainkain hevi bilong mani, na politik na wanem kain rot ol Kristen Sios i mekim wantaim ol dispela salens Sios i bungim.

Mista Kure i tok bihain long Reveren Dokta Kigasung i givim toktok bilong em long Rom, em bai go long jenerel sinod bilong Evanjelikal Luteran Sios bilong Bavaria. Insait long dispela sinod, Reveren Dokta Kigasung bai toktok long wanem kain wok Evanjelikal Luteran Sios bilong PNG i mekim long PNG na wantaim ol ovasis patna Sios.

Mista Kure i tok tu olsem, Reveren Dokta Kigasung bai toktok tu long ol arapela bikpela toktok ELCPNG i toktok insait long Kimbe sinod na ol arapela ripo bilong Sios.

Reveren Dokta Kigasung bai lusim Bavaria bihain long dispela sinod na kam bek long PNG long Disemba 12.

Strongpela tok em i wanpela marasin


WANPELA yangpela pasto i kam statim wok bilong em long wanpela liklik taun i stap namel long ol naispela fam na gaden.

Orait, long namba wan Sande, em i sanap long lotu na i bikmaus na i tok strong na i daunim ol manmeri i pilai laki long ol hos i resis. Bihain long lotu, wanpela katekis i kamap long em na i tok, "Pasto, yu no mas mekim strongpela tok i daunim resis bilong ol hos. Planti fama long dispela hap i save groim ol dispela kain spesel hos bilong resis. Ol i bin harim tok bilong yu na ol i kros."

Orait, long neks Sande nau, dispela nupela pasto em i mekim strongpela tok long pasin nogut bilong smokim ol siga na sigaret. Bihain, katekis i kamap gen long pasto na i komplem olsem, "Pasto, planti ol fama nabaut long hia ol i save groim lip tabak tasol long gaden bilong ol. Mipela long dispela hap i gat spesel kain graun bilong groim lip tabak. Na ol fama i save salim ol dispela lip tabak i go long ol bikpela faktori bilong wokim sigaret. Long olgeta Sande ol fama ya i save givim sampela dispela mani i kam long ol lip tabak bilong sapatim yu. Olsem na ol fama i bel nogut long tok yu bin mekim long lotu."

Long namba tri Sande nau, pasto i pairap tru long pasin bilong dringim wiski na ol strongpela dring. Bihain long sevis, katekis i kamap gen na i skulim pasto olsem, "Long taun bilong yumi hia i gat wanpela bikpela fak-

TU MINIT TINGTING



FRANK MIHALIC i raitim

tori bilong wokim wiski. Planti pipel bilong dispela peris bilong yumi i save wok long dispela faktori tasol. Yu tok kros long wiski na dispela i semim ol."

Pasto i harim dispela tok, na nau em i longlong na i askim katekis, "Bai mi inap tok strong long ol pasin nogut bilong ol haiden i stap long Afrika? Ol i stap longwe tru long hia, na ol i no inap kros."

Skul: Sampela Kristen i no laik tru bai pasto o pris i sutim wanpela tok o putim hevi long ol stret, o long pasin bilong ol. Ol i ting, em i wok bilong pasto long givim olkain switpela toktok tasol i save grisim yau bilong ol. Tasol Jisas i no bin mekim olsem. Wan taim em i bin pairap long ol wantok na ol i no laik. Sampela taim strongpela tok em i olsem wanpela marasin yumi nidim.

Sir Michael tok PNG i mas gat gutpela famili long kamapim gutpela kantri

STEVEN KADIKO i raitim

PAPUA Niugini i mas gat gutpela famili long kamapim gutpela kantri, Rijenei Memba bilong Is Sepik, Sir Michael Somare i tokim ol pipel bilong Wes Niu Briten long Galilio ples taim em i witnessim seremoni bilong makim nupela Modereta bilong Yunaited Sios, Samson Lowa.

Dispela seremoni i kamap long

Galilio ples long Novemba 15. Reveren Lowa i kisim ples bilong olpela Modereta, Edea Kidu husat i holim dispela wok inap long 10-pela yia olgeta.

Sir Michael i tok long kamap wanpela gutpela lida insait long Gavman, Sios o praiwet sekta ol man na meri i mas kam long wanpela gutpela famili. Olgeta famili memba i mas wok bung wantaim bai husat memba insait long famili i holim wok bilong lida i ken

kamapim gutpela wok bilong lida man o lida meri.

Sir Michael i ting planti ol famili i bruk bruk tude long planti sosaiti insait long kantri. Tasol em i tenkim ol Sios long mekim planti gutpela wok bilong kamapim na strongim ol famili long holim pas strong ol gutpela Kristen pasin.

Em i tok Papua Niugini i ken kamap wanpela gutpela ples long stap long en sapos ol pipel i tanim

baksait long sin pasin na kisim God i go insait long laip bilong ol. Em i tok ol Sios olsem Yunaited, Katolik, Seven De Adventis, Luteran na ol arapela liklik sios i kam longtaim i go pinis long kantri na skulim ol pipel bilong PNG long save long God na bihainim laik bilong God. Em i tok dispela ol Sios i mekim planti wok long kamapim gutpela sindaun insait long ol famili na gutpela ol pipel long spirit, bodi na tingting.

Enga plis kisim bikpela helpim long Provinsel Gavman

Enga plis i mekim bikpela tok amamas bihain long Provinsel Gavman i makim K2.7 milien long kirapim wok bilong plis long provins.

Dispela mani i kam long Takis Kredet Skim bilong Porgera Join Vensa na Provinsel Gavman i save yusim dispela kain mani long ol spesel proyek.

Provinsel Plis Komanda, Suprintenden Allan Kundi i tok Enga Provinsel Gavman aninit long lukaut bilong Gavana Peter Ipatas i mekim gutpela wok long helpim plis. Em i tok, plis bai yusim dispela mani long wokim ol haus bilong ol plis manmeri na sampela sapot sevis.

Suprintenden Kundi i tok em i gat tingting long putim wanpela dabol stori haus slip bilong ol singel plis manmeri long Wabag na sampela ol haus bilong ol marit. Ol plis long ol distrik tu bai kisim sampela ol haus.

Plis i kisim pinis 4-pela ka aninit long skelim bilong dispela K2.7 milien na Suprintenden Kundi i tok Provinsel Gavman bai givim narapela 6-pela ka gen. Plis tu i kisim ol samting olsem haus sel, jenereta na ol samting bilong slip long kemp na patrol long ol bus eria.

Suprintenden Kundi i tok moa olsem Enga provins em wanpela gutpela ples. Em i tok i gat trabel pait long wanwan hap long provins tasol na i no long olgeta Enga olsem planti lain i save ting. Em i tok ol i nogat raskel pasin bilong stil na bikhet olsem long ol narapela hap bilong kantri.

Nau yet i gat trabel pait long Wabag na Laigam distrik. Plis i stap pinis long ol dispela hap bilong pait aninit long opresen kod, "Opresen Mekim Save." Suprintenden Kundi i tok ol dispela pait i go isi nau.

93 sumatin bai greduet long Holi Trinita Tisa Koles

Holi Trinita Tisa Koles long Mt Hagen bai amamas long lukim 93 sumatin bilong em i greduet olsem tisa long Trinde neks wik.

Ol dispela sumatin bai kisim Diploma long wok tisa long ol komyuniti skul insait long Papua Niugini. Insait long dispela namba bilong ol sumatin,

36 em ol meri. Ol sumatin em ol i kam long olgeta hap long kantri. Dispela greduesen em namba 6 bihain long Holi Trinita Tisa Koles i bin statim 3-ya diploma program bilong ol.

Prinsipol bilong Koles Joe Waka i bin tok, planti papama na ol famili bai bung long dispela taim. Em i tok

Edministreta bilong Westen Hailans, Dokta Thomas Webster bai mekim bikpela toktok olsem ges spika long taim bilong greduesen.

Namba tu bilong Bisop bilong Wabag Diaosis, Pater Arnold Orowe bai go pas long lotu bilong greduesen. Pater Orowe i makim ol bisop bilong

Hailans bikos Holi Trinita Tisa Koles i stap long lukaut bilong ol. Olgeta bisop bilong PNG i stap nau long Rom long holim miting wantaim Pop Jon Pol 11.

Gredusen bai kamap long moning long bikpela hol o haus bung bilong ol long skul yet.



• Praim Minister Bill Skate i toktok wantaim ol manmeri bilong Mendi taim em i raun lukluk long ol bagarap bilong ais na drai we ol kaikai i bagarap. Poto: Wenceslaus Magun.

Mendi haus sik i gat bikpela hevi

Mendi haus sik i laikim wanpela 15 sita bas long ronim wok bilong haus sik.

Haus sik i sot long wanpela bas long trenspotim ol nes, dokta na ol narapela wok manmeri long moning na nait. Sapos ol i kisim wanpela bas dispela tu i ken helpim ol wok bilong edministresen bilong haus sik. Nau haus sik i gat wanpela ambulens tasol i mekim olgeta wok.

Sief Eksekutiv bilong Mendi haus sik, Dokta Joseph Turian i tok ol raskel i hansapim draiva long gan na stilim olpela Mazda bas bilong ol long mun Septemba long dispela ya. Dispela birua i kamap arere long Mendi taun tasol na em i namba 6 taim kain hevi i bungim wanpela ka bilong haus sik.

Dokta Turian i tok, ol i tok-save long plis na ol komyuniti tasol ol i no kisim dispela bas bek. Em i wari long sekyuriti bilong ol wok manmeri bilong haus sik na i laik bai ol i kisim wanpela bas hariap. Em i tok,



• Ol lain long Goroka i skelim ol kaikai bilong karim i go long ples.

haus sik i nogat inap mani long baset bilong en long baim wanpela nupela bas.

Dokta Turia i tok, em i bin raitim wanpela pas i go long Edministreta bilong Sauten Hailans na bekim bilong en i gutpela, tasol dipatmen tu i nogat inap mani long baim

wanpela ka bilong haus sik. Em tu i raitim pas i kam long Nesenel Helth Opis long Mosbi na ol i save long hevi bilong ol.

Ol narapela stori, Dokta Truia i tok, planti samting long haus sik i bagarap na ol i laikim olsem K200 tausen long

stretim ol dispela hevi. Em i tok ol haus na wod bilong haus sik em ol i wokim long ya 1974 na planti samting i sting pinis. Dua bilong haus sik mog tu i bruk na ol i save taitim wantaim draipela ston o plang long pasim dua taim ol i putim bodi bilong ol daiman insait.

Pamuk vidio kot bai kamap long Desemba 2 na 3

YAKAM KELO i raitim

Pater Robert Lak, Gavana bilong Westen Hailans provins bai kamap long kot long Desemba 3, 1998 long kot bilong wokim pamuk vidio. Long Desemba 2, bai Regina Pera Gibolo husat em plis i sasim tu long wokim dispela pamuk vidio bai kamap long kot bilong em.


Kot bilong Regina long Desemba 2 bai soim klia sapos em i brukim lo bilong kantri long wokim pamuk vidio na kot i mas sasim em o nogat. Sapos kot i kisim inap evidens na painim tru olsem Regina i stap long dispela pamuk vidio, bai em i kalabus mak olsem 6-pela mun. Dispela em i las kot bilong harim kot disisen bilong Regina Gibolo.

Kot bilong Westen Hailans Gavana Pater Robert Lak i no bin kamap long Tunde dispela wik bikos loya bilong em Moses Murray wantaim loya bilong plis Thomas Eluh i pasim toktok wantaim sinia mejistret Allan Kopi na ol i surukim taim bilong kot i go moa long Desemba 3.

Plis i sasim Pater Lak long wokim pamuk vidio wantaim Regina Gibolo taim Regina i yangpela meri tru we lo i tambu long kain yangpela meri olsem i mekim pasin pamuk wantaim ol bikpela man. Regina i bin gat 15 krismas long dispela taim we plis i ting em i mekim pamuk pasin wantaim Pater Lak insait long vidio. Em i kisim sas bilong wokim pamuk piksa insait long vidio kaset.

Pater Lak i kisim tupela sas. Wanpela em long mekim pamuk pasin wantaim yangpela meri krismas bilong em liklik tru we lo i tambu long en. Narapela sas em long wokim pamuk vidio o pamuk piksa we lo bilong kantri: aninit long Sensasip Lo i tambu long en.

Biknem loya bilong Melsol na ICRAF Powes Parkop i sanap makim Regina long kot na Moses Murray i makim Pater Lak. Thomas Eluh dairekta bilong plis prosekyusen i sanapim makim plis na stet.



Madang Nius

Madang Provinsel Gavman i stretim ol taun rot long kos olsem K332,102.64

WENCESLAUS MAGUN i raitim

KLOSTU olgeta rot insait long Madang taun nau i gat kolta na rot i gutpela bilong ol ka i ron. Dispela i kamap bihain long Madang Provinsel Gavman i putim K332,102.64 long Ogus long stretim ol rot insait long taun.

Wanpela ripot Wantok i kisim long Madang Provinsel Gavman i tokaut olsem projek bilong stretim ol Madang taun rot i stat long namel bilong 1997 aninit long Woks eria bilong Madang edministresen bihainim daireksen i kam long edministreta, Clant Alok.

Long mun Me, Madang Provinsel Gavman i askim Dipatmen bilong Trenspot na Woks long stretim ripot bilong ol dispela wok bilong rot bipo long wok bilong putim kolta i stat. Taim dis-

pela ripot i pinis, Madang Provinsel Gavman i givim kontrak i go long Shorncliffe na ol arapela kampani long mekim dispela wok.

Ripot i tok olsem Shorncliffe i putim kolta long 18-pela rot insait long taun long dispela yia bihain long ol arapela kampani olsem Paragon, Ambesugi, Amri, Pabel, West Traking, na Maborasa i putim karanas na mekim ol arapela rot bilong stretim rot. Madang Taun Interim Komisen tu i helpim long pulimapim ol hol long rot long dispela taim tu.

Long dispela 18-pela rot, Shorncliffe i putim kolta long 6-pela: Yamilong; Tiam; Tilom; Nuna; Yabob; na Mildas. Na i putim kolta gen long 12-pela arapela rot: Kasagten; Nanulong; Kudam; Badaten; Regina Aveniu; Koronesen Draiv; Bauhenia; Ixora; Bogenvil; Nabasa; Kusbau na Lotu.

Ripot i tok planti ren i bin pundaun long pinis bilong

1997 na i go yet long tripela mun long 1998. Olsem na wok bilong putim kolta long Madang taun rot i stat tru long pinis bilong mun April.

Ripot i tok tu olsem wok bilong stretim ol rot insait long Madang taun i bin stat long 1996 aninit long lukaut bilong Madang Taun Interim Komisen (MTIK). Long 1997, Edministreta Alok i rausim wok bilong stretim rot long MTIK na putim long han bilong Kassas Galun bilong Madang Provinsel Gavman long lukautim.

Ripot i tok aninit long lukautim bilong Mista Galun, ol kampani i putim karanas na pulimapim ol hol long rot long stat bilong Septemba las yia. Tasol Shorncliffe i no inap putim kolta long dispela taim bikos long wok bilong ol long putim kolta long Madang-Bogia rot stat long Talidig bris i go olgeta long Mirap bris. Long dispela as, wok i stat long dispela yia.

Madang Asdaiosis opim agrikalsa senta

MOA long 500 pipel i bung long St Benedik Agrikalsa Senta long Danip long Sarere Novemba 14 long witnessim opening bilong namba wan agrikalsa skul insait long Madang Provins.

Madang Asdaiosis wantaim ol arapela pren olsem Yuropien Yunien, Kanada Fan, Misereor (Katolik Bisop Konferens bilong Jemeni), na Tageted Komyuniti Developmen(Gavman-fan) i bungim mani inap long K827,533.40 long wokim dispela senta.

Dispela em i wanpela spesel skul insait long Papua Niugini. Siaman bilong Bod bilong St Benedik Agrikalsa Trening Senta, Paschal Feria i tok dispela senta em i spesel bikos astingting bilong dispela skul em i bilong glasim sampela ol bikpela hevi i kamap long PNG tude olsem: nogat wok bilong ol skul liva, hevi bilong lo na oda, kaikai i sot, kaikai gutpela kaikai bilong lukautim gut bodi, lukautim bodi bai bodi i no ken painim ol kainkain sik, salim ol PNG prodak long ovasis na kisim mani i kam long kantri na ol kain hevi olsem.

Mista Feria i tok bikpela astingting bilong dispela senta em bilong bihainim tingting bilong gavman insait long edukesen rifom bilong skulim ol sumatin ol teknikel save olsem skul bilong wok didiman insait long hai skul na sinia hai skul. Wantaim dispela teknikel save ol pikinini i pinis long skul i ken go bek long ples na mekim wok bilong lukautim ol yet, famili bilong ol, ol arapela na kisim mani na i no go long taun na ol siti ol arapela hap bilong painim wok.

Nau yet dispela skul i gat 40-pela sumatin. Olgeta pikinini man tasol. Senta i gat tripela tisa wanpela senta menesa

Elizabeth Rangan na fam menesa Charles Spong.

Madang Asdaiosis i wokim dispela skul long mun Mas long dispela yia bihain long planti toktok i stret namel long ol papa graun, ol edukesen dipatmen, provinsel na nesanel gavman. Long statim dispela senta Asdaiosis i mas pasim Utu vokesenel skul bilong ol meri long Transgogol na yusim laisens bilong dispela skul.

Mista Feria i tok long 1999 senta bai kisim 80 sumatin na dispela bai bringim namba bilong ol sumatin i go antap long 120. Bihain long yia 2000 dispela senta inap kisim 300 o 400 sumatin. Long nek yia, senta bai stat long kisim ol meri.

Ol sumatin husat go long dispela senta i pinisim gret 10. Ol bai skul inap long tupela yia. Long namba wan yia ol bai i stap long skul. Long namba tu yia bilong skul ol bai spenim olsem 18 wik long ples bilong ol na kirapim na ronim wanpela didiman projek we ol i ting i ken ron gut. Ol tisa bilong senta bai supavaisim ol na senta bai helpim ol long statim ol dispela projek. Taim ol i pinis long dispela senta bai greduet wantaim setifiket insait long tropikel agrikalsa na go bek long ples long ronim wanem projek ol i statim pinis taim ol i stap yet long skul.

Nau yet dispela senta i kisim ol sumatin bilong Madang Provins tasol bikos long tingting bilong salim ol sumatin i go bek long ples na wokim ol projek bilong ol. Tasol long dispel yia senta i kisim wanpela sumatin long Lae Provinsel hai skul na St Ignatius hai skul long Aitape.

Ol tisa na sumatin bilong Madang i kisim tok lukaut long mekim gut wok

KIWURAM KANAKO i raitim

OL TISA na sumatin bilong Madang Provins i kisim strongpela tok lukaut long mekim gut wok bilong ol. Dispela strongpela tok lukaut i kam long bos bilong edukesen long Madang, John Bossi bihain long planti asua i bin kamap pinis long ol skul insait long provins.

Opis bilong Mista Bossi i harim planti komplek olsem ol sumatin i bin pinis skul, ronowe long skul, stap long kalabus, na bungim ol arapela hevi i kam long tisa bilong ol.

Wantok i painim aut olsem sampela yia i go pinis sampela sumatin bilong Raikos hai skul i pait wantaim ol tisa na ol i rausim ol long skul. Long Aiome hai skul, wanpela tisa i tok nogut na rabisim ol sumatin bilong em na tu tambuim ol long sindaun long klas bilong em. Olsem na ol sumatin i belhat na paitim em. Long 1997, wanpela tisa bilong Bogia husat i tis long Brahman i mekim pasin pamuk wantaim wanpela sumatin meri. Nau dispela tisa i stap long Kalabus na dispela sumatin i go long narapela skul.

Long dispela as, Mista Bossi i tokim ol tisa bilong Madang long putim strongpela tingting long skulim ol pikinini na maski long kros long pe, pretim ol sumatin na ronowe o les long tis. Em i tok tu olsem opis bilong edukesen long Madang i luksave long hevi bilong ol tisa na bai stretim.

Mista Bossi i tok ol papamama inap kotim ol tisa sapos ol pikinini i no go skul long wanem ol tisa i les long wok o krosim ol sumatin taim i nogat gutpela as.

"Mi laik mekim strongpela tok lukaut i go long ol tisa long Madang olsem ol i wok

bikos ol papamama i salim ol pikinini i go long skul. Ol pikinini i mas go long skul bikos lo tok. Dispela lo i stap insait long yunivesel rait bilong edukesen. Ol tisa i mas luksave na bihainim dispela lo," Mista Bossi i tok.

Em i tok olgeta papamama i save olsem wok bilong skulim ol pikinini em bikpela samting na hatpela wok. Tasol, ol tisa i mas putim ol pikinini i go pas long ol samting olsem mani na arapela samting. Em i tok ol papamama i laikim olsem ol pikinini bilong ol i mas kisim gutpela save long helpim ol yet na provins.

Mista Bossi i tok em i laik mekim ol skul bilong Madang i kamap gutpela na soim ol skul bilong arapela provins olsem Madang i gat gutpela rot bilong stretim hevi. Em i bilip pasin bilong sindaun, paitim toktok na stretim asua em i gutpela rot.



• Sampela ol sumatin bilong St Benedik Agrikalsa Senta i wok long gaden projek bilong ol long Danip.

Ol Madang viles kot mejistret i laikim sapot

OL MADANG viles kot mejistret i askim Madang Provinsel Gavman long glasim hevi bilong ol na helpim ol. Siaman bilong Madang Viles Kot Asosiesen, Benedict Dick i tok.

Em i tok wok bilong ol viles kot mejistret long ples i bikpela tumas bikos ol i mekim tu wok bilong ol lokol kot na i nogat man i luksave long dispela na traime helpim ol. Em i tok planti taim ol viles kot mejistret i save painim hat long go na harim kot o stretim toktok bikos ol i nogat rot.

Mista Dick i askim long wanpela opis long taun we ol viles kot mejistret inap mekim wok bilong ol taim ol i go long Madang taun. Narapela bikpela samting em i tok i olsem, ol mejistret na pis opisa i no gat gutpela yunifom bilong bilas na soim olsem ol i gat kain wok bilong mekim insait long komyuniti.

"Planti taim mipela i save painim hat long toksave mipela husat tru na wanem kain wok mipela i save mekim. I gat birua tu i bin kamap pinis we ol

sampela lain long komyuniti i bagarapim ol mejistret na ol pis opisa. Em wanpela bikpela asua we i mekim wok bilong mipela i hat moa," em i tok.

Mista Bossi i singaut i go long ol bosman bilong viles kot long luksave long ol mejistret na hapim pe bilong ol. Em i tok moa long 20 yia nau ol viles kot mejistret i save kisim mani namel long K25 na K50 insait long wan wan mun.

Em i tok Madang Provinsel Gavman i mas putim mani long helpim ol bosman bilong viles

kot long go na helpim ol mejistret long ol ples we i stap longwe tru long taun. Wantaim dispela mani ol i ken yusim long ranim ol kos bilong skulim ol viles kot mejistret long pasin bilong holim kot, skelim ol toktok na raitim ol gutpela ripot bilong helpim ol plisman na distrik kot.

Em i tok nau i gat planti save man long ples na sapos ol mejistret i no kisim gut skul long lo, ol save man bai daunim poin bilong ol na bagarapim gutpela wok bilong ol.

Nupela kopi fektori bai op

KENNEDY EDENE i raitim

SENTREL Provins bai lukim nupela kopi fektori long Novemba 26 taim Praim Minista Bill Skate i go opim.

Koiari Developmen Atoriti husat i papa bilong dispela nupela fektori i tok dispela fektori i kos olsem K300,000 long kamapim.

Siaman bilong KDA Garry Imiri i tok kopi em wanpela bikpela kes krop insait long provins na kantri na bihain long foapela yia bai dispela projek i kamapim na pulim mani i kam long kampani na pipel tu wantaim.

Em i tok dispela fektori bai helpim na sevim ol pipel long hap olsem Maunt Koiari na Tapini na hap i go long Kokoda Treil.

Ol dispela lain i save planim Arabika kopi na ol bai kisim servis long dispela fektori we inap helpim ol bihain.

Dispela kopi fektori bai kisim sapot bilong em i kam long Nesenel Gavman insait long baset bilong em olgeta yia long mekim fektori i ron na wok yet long sevim ol pipel bilong Sentrel provins.

Dispela wok painimaut bilong kamapim kopi fektori long Sentrel provins i bin stat long 1994 na inap nau ol bai opim fektori long statim bisnis bilong en.

Tupela balus i pundaun taim nogat wokman long tawa

YAKAM KELO i raitim

Tupela Air Niugini balus i kam pundaun long Jacksons ples balus long Mande nait taim nogat wokman bilong kontrol tawa i stap. Ol wokman bilong Sivel Eviesen long kontrol tawa i bin straik long Mande na i go nabaut taim tupela balus ya i kam long Kens na Brisben i kam pundaun gut long Jacksons ples balus.

Minista bilong Sivel Eviesen na

Turism Kala Swokin i tok long Mande nait, tupela Air Niugini balus i bin kam pundaun long Jackson ples balus.

Long dispela taim, ol wokman bilong kontrol tawa i no wok bikos ol i stap long straik. Tasol pailot bilong tupela balus ya i ronim balus i kam na pundaun gut long ples balus bihain long tupela i lusim Brisben na Kens na i kam long Mosbi.

Mista Swokin i tok dispela em hat taim tru tasol ol wokman bilong

Air Niugini long balus i wok gut tru na kisim balus i kam pundaun gut wantaim ol pasidia.

Bihain long Gavman i stretim hevi bilong ol kontrol tawa woka, 9-pela Air Niugini balus i kirap lusim Mosbi long Tunde apinun dispela wik na i go long wanwan provins.

Wanpela ovasis ron bilong balus i kirap lusim Mosbi na i go long Manila long Tunde apinun.

Dispela 9-pela balus i ron gen bihain long ol wokman bilong kon-

trol tawa i straik long Mande dispela wik bikos ol i nogat ka bilong karim ol wokman i go kam long wok long moning, de taim, 6 kilok apinun na 12 kilok long nait. Dispela i bin wanpela bikpela askim bilong ol bikos ol i save bungim hevi long wok bilong ol taim i nogat ka long helpim ol.

Long Mande dispela wik, ol kontrol tawa wokman i straik na i no wok.

Dispela i mekim olgeta ron bilong Air Niugini balus i stop na ol pasindia i stap bek long wanwan ples balus bilong ol.

Long Mande apinun yet, Gavman i baim sampela haia ka na salim i go long ol wokman bilong kontrol tawa i yusim.

Bai Gavman i baim sampela moa ka na salim i go long ol kontrol tawa woka long Lae, Hagen, Madang, Wewak, Tokua, Goroka, na Mosbi long yusim.

Minista bilong Sivel Eviesen na Turism Kala Swokin i tok Gavman i hariap long stretim dispela hevi bilong ol Sivel Eviesen woka long kontrol tawa bikos wok bilong ol em bikpela samting long ron bilong ol balus na pasindia insait long Papua Niugini na tu long ovasis lain i kam o i go.

Mista Swokin i tok Gavman i kamapim wanpela rot bilong stretim dispela hevi bilong ol kontrol tawa woka long wanpela mun tasol. Bihain bai ol i stretim olgeta samting long stretim laik bilong ol woka bilong kontrol tawa.



Kalserel So!

• Darokomana ples manmeri insait long Rigo distrik i singsing long Kalserel so long las wiken Long Se Jon Gais stedium. Ol planti arapela provins tu i kamap soim tumbuna singsing na danis bilong ol.

Foto: BAE KIMALII

TRUKAI RICE

That's right



SBDC i laik helpim yu wantaim ol liklik wok-bisnis

Dvelopmen beng em wanem samting?

Bipo Dvelopmen beng i join wantaim PNGBC, em bin wanpela bikpela hap we ol pipel i save kisim dinau mani long en. Dispela beng i bin narakain long ol arapela komesel beng long tripela rot na ol em:

- Ol pipel i no save putim mani long en. Olgeta mani we beng i laik givim aut olsem dinau mani em gavman i save givim long en.

- Em bin save larim ol pipel i kisim longpela taim long peim bek ol dinau mani. Dispela i save mekim isi long ol lain husat i wokim dinau. Sampela taim ol i save peim bek long liklik mani mak..

- Beng ya i no bin wari sapos kastoma i gat sekyuriti long lon mani o nogat. Em no bin save gat planti tingting tasol em bin save givim mani long ol kastoma wantaim luksave olsem ol bai i yusim gut long wokim bisnis.

Dvelopmen beng i bin save givim dinau mani long ol lain husat i gat wok bisnis o ol wok fama. Em no bin save givimaut mani long baim pesenel ka, ol samting bilong haus o long go malolo. Olsem nem bilong em i tok, dispela beng i laik helpim dvelopim ol risos bilong kantri. Nau beng ya (dvelopmen beng) i join wantaim PNGBC. Olsem na na mipela i no klia sapos em bai i go het long givim ol spesel sevis we em bin save givim long publik.

Husat moa gen i save givim dinau mani?

I gat narapela tupela rot we pipel i ken kisim dinau long en na ol i save kolim ol long "invisibel borrowing". Ol



i givim dispela nem bikos ol i no kisim dinau mani. Rot long kisim dispela dinau em long yusim ol samting na peim bek long ol bihain.

Haia pejes em i wanpela rot bilong kisim invisibel dinau. Aninit long dispela rot, kastoma bai i kisim ol samting we i kos bikpela mani long en na wokim peimen bihain. Kastoma i ken yusim ol samting tasol ol i no bilong em. Bihain long em i peim mani mak we ol i pasim tok pinis long en, bai em i kisim ol samting. Yusim ol samting na pei long ol bihainem i klostu wankain olsem kisim dinau mani na baim ol samting long en wantaim.

Oposisen tok 1999 baset em nogut

YAKAM KELO i raitim

OPOSISEN i tok 1999 baset bilong Skate na Lasaro Gavman i wanpela nogut baset tru bilong Papua Niugini.

Mausman bilong Oposisen long Fainens Bart Philemon i tok dispela baset i rausim

wok bilong Provinsel Gavman we lo bilong Ogenik Lo aninit long rifom i oraitim. Wok bilong Provinsel Gavman long lukautim na skelim wok insait long distrik level nau i go long han bilong nupela dipatmen we Gavman i kamapim ol i kolim Rurel Dvelopmen opis.

Mista Philemon i tok dispela senis i mekim na baset bilong 19 Provinsel Gavman i go daun long K120 milien. Lo bilong Ogenik Lo i luksave long wok bilong Provinsel Gavman tasol nau nupela dipatmen i kamap na tekova long wok bilong ol, em i tok.

Dispela dipatmen bilong Rurel Dvelopmen bai lukautim olgeta mani na plen bilong ol distrik insait long kantri. Ol distrik plening komiti bai sindaun long Lokol Levul Gavman miting bilong ol na mekim plen na salim i go long dispela opis long brukim mani i kam long projek na wok bilong ol.

Mista Philemon i tok dispela Gavman i daunim mani long planti dipatmen na ol wok we i stap pinis aninit long 5 yia plen. Ol dispela dipatmen na skul o opis i mas kisim wankain baset long olgeta yia long mekim wok bilong ol inap long 5 yia plen bilong ol.

Em i tok ol dispela opis ino pinisim 5 yia plen bilong ol yet na Gavman i sotim mani bilong ol long baset na putim i go long arapela dvelopmen eria olgeta wok bilong givim trening long ol publik sevans long ol wok bilong ol, mekim ol wok painimaut long ol samting i no inap kamap gut

na balens wantaim dvelopmen bilong kantri.

Oposisen i laikim Gavman i mas putim bek ol opis bilong Nesenel Rises Institut skul bilong givim trening long ol wokman-meri bilong Gavman, Medikel Rises Institut ol lain bilong mekim wok painimaut long ol sik olsem malaria na arapela sik long kantri na arapela moa we Gavman i rausim insait long baset plen bilong 1999.

Tasol Oposisen i nogat namba na strong long mekim Gavman i bilip long em long Tunde dispela wik. Gavman i go het tasol na pasim dispela K2 bilien baset bilong 1999 wantaim 57 vot. Oposisen i sot long namba wantaim 32 vot. Bikpela samting em Oposisen bai wanbel yet long larim baset i mas kamap tasol ol samting we em i laikim i no stap long baset bikos Gavman i mekim tasol long save bilong ol.

PNG bai holim kibung bilong painim Yuropien Yunien sapot

PAPUA NIUGINI Institut ov Intanesenel Afeas bai i holim wanpela semina o kibung long pinis bilong dispela mun bilong kamapim toktok long wanem Papua Niugini bai mekim long taim bihain wantaim Yuropien Yunien.

Dispela kibung bai i traim long autim tingting long wanem rot Yuropien Yunien bai i mekim bilong go het long givim mani long kamapim ol dvelopmen projek insait long kantri.

Dispela kibung bai i kamap long 30 de na go inap Desemba wan long dispela yia, 1998.

Presiden bilong dispela nupela Institut Brian Yombon Copio tok olsem dispela kibung bai i kamapim toktok long wanem kain ol senis bai kamap bihain long Yuropien Yunien i kamapim ol projek insait long kantri.

Mista Yombon-Copio i tok ol opisel bai i kam long ol kantri husat i memba bilong Yuropien Yunien na tu long Saut Pasifik

Sekreteriet.

Em tok tu olsem ol mausman insait long PNG tu bai kamap long toktok long dispela kibung.

Mista Yombon-Copio i tok ol mausman bilong Yuropien Yunien Deligesen insait long PNG na tu ol opisa bilong Foren Afeas, Treseri na Plening, National Research Institute, ol NGO na ol saveman bilong Yunivesiti bilong Papua Niugini bai toktok long dispela kibung.

Mista Yombon-Copio i tok tu olsem bihain long dispela kibung bai ol i raitim wanpela buk ol kolim Papua Niugini Journal ov Intanesenel Afeas.

Em tok dispela buk bai i holim olgeta toktok i bin kamap long kibung we ol arapela lain ken ritim na toktok long en.

PNG Institut ov Intanesenel Afeas bai i holim dispela seminar long Pot Mosbi Travelodge.



NATIONAL HEART FOUNDATION OF PAPUA NEW GUINEA INC

PLIS
NO KOKEN!

SAPOS YU SMOK, SANS BILONG KISIM SIK LONG LEWA NA BODI I BIKPELA MOA LONG OL ARAPELA SIK.

STOP NAU

TAIM I NO SOT YET LONG YU STOP NA LARIM LEWA BILONG YU I STAT KLIN GEN.

NATIONAL HEART FOUNDATION OF PAPUA NEW GUINEA

I KAMAPIM NA SPONSARIM

LONG INTERES BILONG PUBLIC HEART HEALTH.

P.O. Box 158, Mt Hagen, Western Highlands Province.

Telepon namba: 542 2199

Feks namba: 542 2384.

Lae Niws

Papagraun i rejistarim graun long Buang eria

Ol papa graun long Buang Distrik long Morobe Provins i rejistarim pinis graun bilong ol wantaim Lens dipatmen. Samting olsem 9-pela ples i bin rejistarim ol tumbuna graun bilong ol.

Ol dispela ples em, Lega, Makov, Masange, Lega Bagalkaja, Valong, Besa, Buna, Salongli na Puling.

Dispela toktok bilong ol wantaim lens dipatmen long rejistarim graun bilong ol i bin stat long 1994 i nap long nau ol i kisim pepa (certificate) bilong ol. Wampela papa graun na man husat i go pas long ol Yanining Busi i tok olsem, long dispela taim yet em i save go daun long Lae na toktok wantaim ol lain long Lands dipatmen na arapela bodi bilong gavman long stretim toktok olsem graun bilong ol i mas rejista gut.

Em i tok olsem ol papagraun long Buang i luksave olsem, raits bilong graun i bikpela samting tru taim i kam long ol divelomen na kisim ol samting long graun.

"Mipela laikim olsem graun bilong mipela i mas rejista so mipela i ken mekim ol disisen long laik bilong mipela yet long ol samting i stap long graun na mipela i ken kisim gupela helpim na tu long bihain taim bilong ol pikinini bilong mipela." Busi i

tok, husat graun bilong em i gat planti timba long en.

"Long mi, em dispela hevi mi karim long planti yias, em kaikai bilong em i kamap pinis we graun bilong mipela i rejista pinis. mi save olsem ol lain long ples bai amamas taim ol i lukim dispela setifiket," em i tok.



• Ol tripela bikman bilong Morobe, Utula Samana, Gavana Luther Wenge na Agrikalsa Minista Tukapela Masani na bos bilong Papindo na Bubia Rises Stesin (lephan). Ol lukluk raun long developmen bilong agrikalsa long provins.

Morobe go het long kamapim wok didiman

FRANCO NEBAS i raitim

TUPELA de woksop long Nawae Distrik long Morobe Provins i lukim i gat planti toktok long kamapim gut agrikalsa ekstensen progrem bilong ol lokal famas.

Dispela woksop em Village Project Services Limited yet i bin kamapim we i pinis long las Fraide. Morobe Agrikalsa na Laipstoks divisen siaman Connie Iguan long dispela taim i bin tokaut long ol hevi bilong agrikalsa.

Mista Iguan i tokim ol lain husat i kamap long dispela kos olsem, ekstensin wok long rural eria i wok

long dai, tasol divisen bilong em i laik long kamapim gut dispela sevis gen we ol liklik famas long peles i gen kisim dispela helpim.

"Maski long bikpela hatwok bilong mipela long Gavman levul, mipela i wok long kisim bikpela hevi long rot i go insait long ol ples we i stap insait stret long bus bilong Morobe we ol ekstensen opisa bilong mipela i ken go na karim aut wok bilong ol" em i tok.

Em i tok olsem tasol, long polisi bilong Morobe Gavman, agrikalsa na ol projet developmen i stap hai long 1999 baset nambawan list, dispela em bai we long helpim ol pipel long rurel eria long Morobe.

Long dispela badset nambawan list, ol bai traime long wokim rot i go long dispela ol hap eria we ol i ken kisim ol samting ol i groim i kam long olgeta komynuniti long viles.

Mista Iguan tu tok aut long olsem em i no amamas long sampela lain peles i save wokabaut long pela hap long kama salim ol kaikai bilong ol long taun.

"Dispela em hap rong tu bilong Gavman bilong de long no luksave long dispela hevi bilong ol pipel." em i tok.

Tasol Gavman bilong Morobe i laik mekim kamap dispela hevi long ol polisi bilong ol long stretim dispela hevi long rural populesen bilong em.

Em i tok em i wanbel long dispela ol toktok kamap long woksop olsem agrikalsa em beksait bun bilong kantri we helpim mas kamap nau long

promotim ol kaikai bilong kisim moni (cash crops) na bilong yumi yet long peles. Dispela bai helpim yumi long stretim gut sindaun na tu kamapim gut gen ekonomik bilong kantri nau yumi wok long bungim.

"Sapos yumi ken putim olgeta tingting long faming, yumi gen mekim bikpela senis long standad bilong sindaun na stap bilong wanwan ol man meri.

Wanem samting yumi groim na salim long kisim mani olsem long kes crops i ken halivim yumi long dispela ekonomik hevi nau yumi i wok long bungim long kantri na kamapim gut gen." em i tok.

Memba bilong Nawae Kennedy Wenge husat tu bin stap long dispela woksop i sapotim dispela wok long kamapim famili plot fam.

"Long senisim laip stail na kamapim gut ekonomik, yumi mas skelim graun long tupela wok wantaim, bilong komisel sel na bilong yumi yet long ples." em i tok.

Dispela tupela de woksop em Village Project Services Limited yet i go pas long. Dispela em nupela agency we wok bilong em long helpim ol liklik famas long peles long Morobe provins na kirapim gut stail bilong wokim gaden kamap gut.

Bulolo distrik i makim mausmeri

ARI-GUG DANDEE i raitim

LONG wampela bikpela kibung bilong ol mama long 5-pela Lokol Levul Gavman kaunsel insait long Bulolo distrik las Fraide, ol i makim wampela meri long kamap olsem mausmeri bilong ol.

Dispela kibung i bin lukim olgeta mausmeri long dispela 5-pela lokal levul gavman eria i kamap na makim wampela meri long karim maus bilong ol long ol bikpela kibung olsem long distrik baset na join plening komiti miting.

Long dispela kibung, ol i makim Misis Yandingo Karo bilong ples Mumeng insait yet long Mumeng Distrik long kamap olsem maus meri bilong ol.

Misis Karo bihain long winim dispela wok i tokim olgeta mama olsem, dispela wok em i bikpela tru na bai hat tumas na em i laikim sapot long olgeta mama long givim long em long dispela wok.

Em i tok, "Yupela olgeta mama mas sanap bihain long mi na givim sapot na bai yupela yet i ken lukim kaikai bilong toktok bilong yupela olsem kraia na askim bilong yumi i no popaia."

Em i mekim wampela singaut tu go long ol man long luksave long ol mama na givim sapot bikos ol mama em bun tru bilong famili. Em i tok, "Long bipo ol man i save lukluk daun long ol meri na tingim olsem wok bilong ol meri em long lukautim haus na kuk tasol.

"Dispela em nogat nau, long tude em man na meri wantaim i

mekim wankain wok na bung klostu wantaim. Ol man i mas gat rispek long ol meri long kamapim gupela wok bung wantaim na ronim kantri long kamapim gutpela divelopen."

Misis karo i tok aut tu olsem em i gat bikpela tingting long lukim olgeta mama mas kisim gut sevis bilong helpim gut sindaun bilong ol. Dispela em long olgeta famili bilong ol i mas luksave long wok bilong mama.

Em i tok wanwan mama long ples na haus i mas save em i wanem kain mama na i mas klia long wok bilong em long helpim gut sindaun bilong famili. Misis Karo tu i gat bikpela tingting long tok pait strong long kirapim na stretim gut sindaun bilong ol mama insait long Bulolo long daunim ol kainkain hevi we ol i save bungim.



LAE URBEN LOKOL LEVEL GAVMAN

TOKTOK KAM LONG LOD MEYE BILONG LAE SITI HON. TOFFAMO MIONZING, LONG HEVI BILONG ROT LONG LAE NA MANI KAM LONG AUSAID LONG STRETIM DISPELA ROT PROJEK.

Dispela em long toksave long jenerol pablik na ol pipel bilong siti bilong Lae long dispela hevi bilong rot nau i wok long bungim yumi we istap long pela taim wetim AUSAID halivim long stretim dispela rot projek.

Dispela toksave tu em long toksave long ol pipel bilong Lae long wanem wanwan gavman bodi husat i save go pas long ol wok bilong stretim rot insait long siti na arapela jenerol wok long rot.

1.1 NESENEL GAVMAN

Nesanel Gavman tru long opis bilong woks dipatmen em lukautim ol dispela rot long siti.

* Milfordhaven rot stat long wof i go long Markam rot maus rot na i go antap long Haiwe.

* Ol rot we ol gavman opis, skul i stap olsem, Yunitex, PTC na Igam Bareks.

*Ananit tu insait long ol toktok ol i pasim long stretim gut rot, nesanel gavman tu mas lukluk long stretim rot long Air Corps rot na olgeta rots we ol bikpela industrail eria i stap na wof.

1.2 PROVINSEL GAVMAN

Provin sel gavman bai lukluk long ol dispela rot,

* Stat long Independence draiv long Butibam ples i go long Busu bridge, Malangan i go long Busu na arapela men rot lid i go long ol ples na bod bilong siti.

1.3 LAE URBEN LOKOL LEVEL GAVMAN

OL rot we Lae Urben kaunsel i lukautim em,

* Em ol dispela rot we ino stap antap long dispela lista na ino stap tu long AUSAID program bilong stretim ol rot.

1.4 JENEROL MEINTENENS BILONG ROT INSAIT LONG SITI NA LONG BODA BILONG SITI NA PLES.

Olsem yupela i bin lukim pinis mipela i bin painim hat long lukautim gut rot bilong yumi long sampela bilong dispela hevi,

i. Long bipo meintenens bilong ol dispela rot ino bin gat luksave long ol we ol dispela rot nau i bagarap olgeta. Long kos bilong stretim gut dispela ol rot long nau i kosim 3-4 pela taim olsem long bipo.

ii. I bin gat liklik o nogat helpim bilong mani i kam long nesanel gavman o provin sel gavman long karim aut ol wok long dispela ol rot, long dispela as rot ya i wok long go moa bagarap olgeta.

iii. Long dispela as tu ol rot we istap ananit long Nesanel na Provin sel gavman ino inap long kisim meintenens long wanem bikpela hevi bilong mani i stap long kantri

iv. Narapela hevi tu em long dispela yia Lae siti i bin kisim bikpela ren long longpela taim we i mekim hat long ol wokman long mekim rot meintenens.

2.0 KATIM GRAS NA JENEROL KLINING BILONG SITI

Long les tripela mun long dispela yia, mipela i karim aut mesa wok long katim gras, klinim barek na arapela jenerol klin ap eksaisis we ino bin kamap long planti yias. Mani bilong dispela mesa klin ap kampaing i bin kam

long 1997 meintenens grent moni kam long Provin sel gavman we ol i bin givim long 1998 provin sal baset i bin stap inap nau.

2.1. SAMTING STAT LONG NAU I GO NUPELA FAINENSOL YIA 1999.

Lukim ol dispela samting we i kamap pinis, tru tumas Lae Eben Lokal Level Gavman bai ino inap wanem samting long mekim long ol bikpela wok meintenens na ol liklik klinap insait long Lae siti inap nupela nupela yia we lukluk bilong i ken kamap gut.

Long nau yet mipela bai gohet long mekim rot na pulapim ol pot-hul inap taim mipela i kisim inap moni long mekim, gutpela wok meintenens.

3.0 STRETIM OL ROT PROJEK INSAIT NA ARERE LONG LAE SITI

Nau yet, ol tru tok mi putim aut i penim ino gutpela piksa long wanem samting i kamap long taim yumi toktok long rot bilong yumi long sait bilong meintenens wok na jenerol klinap wok insait long siti.

Larim mi karim yu nau i go long gutpela sait bilong wanem gutpela samting i kamap long ol bikpela rot insait na arere long siti.

3.1 STRETIM ROT NA RIHABILITESIN PROJEK.

NUPELA BUMBU BRIS -SAINA TAUN - VOCO POIN NA STEDIUM ROT

Wok long stretim gen bris na mekim gut rot na ol barek insait long ol dispela eria nau i bin go long ofis bilong Woks. Dispela interim Woks em hap bilong AusAID moni i go long mekim kamap gut Lae rot projek. Wok long dispela projek i kamap pinis na kos bilong em em klostu K1.5 milien na K2 milien.

INDASTRIAL ERIA ROT KONSTRAKSIN NA APGREDING

Dispela em bikpela Lae rot ol i wok gen long en na stretim gen dispela projek mipela i wet longela taim long en. Dispela kontrak nau i go long Barclay Mowlem Konstraksin Limed long 6th Novemba 1998.

Namba wan hap bilong dispela projek bai karamapim olgeta wok stat long olpela Lae ples-balus i go long Milfordhaven Rot i go long wof eria, Mangola Strit, Air Corps Rot na narapela rot insait na arere long siti

Namba tu hap bilong dispela projek bai kam long narapela hap na bai karamapim olgeta rot we i abrusim Milfordhaven Rot.

Dispela projek bai kos inap long 24.6 Milien Australian dola we bai kam long AusAID.

Taim bilong dispela kontrak bilong projek bai tripela (3) yia stat long deit ol i givim dispela kontrak.

Sampela ol wokman long kontrak i stap pinis long ples bilong wok na wok tru tru bai kirap long stat bilong 1999. Wok long supavais long wok long dispela projek bai kam ananit long tukaut bilong menesing konsaltent husat i wok nau yet em SMEC-QCPP Joint vensa.

MALAHANG - BUSU BRIS (Bek rot)

Dispela rot nau i stap insait long bikpela konstraksin wok i kamap na rihabilitesin eksaisis. Wok yu nau i stap long han bilong Ofis bilong Woks

Dispela projek i kisim halivim i ma long ADB (Esian Developmen Beng)

FOA MAIL -YUNG WARAP HAP BILONG HAIWE

Wok bilong stretim na putim ol narapela samting long statim wok stat long 4-mail long siti i go long Yung wara klostu long Kassam Pass i stat pinis.

Kampani husat i mekim dispela wok em wanpela kampani we i bes long Milen Be em Coecon Pty Ltd na wok supavais i kem long nesanel Woks ofis.

Projek bilong wokim dispela wok i ma long moni i kam long Esia Developmen Beng (ADB), mak bilong en em klostu K6. milien.

LONG PINISIM TOKTOK,

Long ol dispela hevi siti i bungim long dispela yia long rot meintenens na jenerol klin ap progrem na tu long hevi bilong moni na arapela hevi, Siti i kisim bikpela blesing long ol sampela mesa projek long dispela yia na ol pipel bilong Lae i mas luk fowet long gutpela 1999.

Olsem Lod Meye bilong Lae siti mi laik kisim dispela taim long tok tenkyu i go long dispela lain man na organasasen long wok ol i mekim long kamapim ol dispela mesa projek insait long siti long stat bilong dispela yia.

1. Australain gavman long givim fans i kam tru long AUSAID bilong stretim Lae rots
2. Esian developmen beng long ol projek em fandim long Lae olsem, Malahang -Busu na foa mail rot bilong okuk haiwe.
3. Gavman bilong Papua Niugini long stretim rot bilong ol dispela fanding tru long ol dispela egenci.
4. Fred Cook na ol Lae rot projek komiti bilong em olsem, QCPP menesman konsaltan, Australian Hai Komisen, Opis bilong Woks, Siti kaunsel, Opis bilong Sivil Aviatsen, Finanen na Plening Dipatmen, PTC, Elcom, Water Bod na ol arapela gavman na ino gavman bodi husat tu long wanpela rot helpim long awodim kontraks.
5. Ol tradisanel Ahi papa graun long harim na luksave long ol dispela projek long kamap.
6. Las tasol ino las tru, Mi laik tok tenkyu long pipel bilong Lae, em ol bisnis komyuniti long luksave bilong ol na wet isi tasol karim dispela hevi longpela taim inap long mipela i givim kontrak go long dispela ol projek. Long dispela ol toktok mi laik apil long ol pipel bilong Lae long wok bung wantaim ol dispela kontrata na konsaltant long kamapim gutpela wok karim aut bilong dispela kontrak.

Tingim olgeta sektas bilong komyuniti long Lae bai kisim gutpela samting long dispela projek long wanpela we o narapela.

TOFFAMO S. MIONZING
LOD MEYE
CITY OF LAE.

Ol pikinini amamasim pinis bilong Sande skul

ARI GUH DANDEE
i raitim

MOA long 22 Sande skul pikinini long DPI stetsin long Wau i amamasim pinis bilong Sande skul lesen bilong ol long dispela yia.

Ol pikinini ya, i holim wanpela pati long tok gut bai long ol tisa na ol yet long pinis bilong skul dispela yia.

Sande skul tisa bilong ol, Misis Yano Nganing, i tokim *Wantok* olsem, dispela yia i bin wanpela gutpela yia bilong ol pikinini ya, long wanem ol i bin wok hat tru long lainim planti samting long buk baibel.

Long dispela yia i bin gat tupela grup bilong ol pikinini we em i save kisim ol na skulim ol long tok bilong God.

Long grup wan, em ol i gat lesen bilong ol i stat long 1 go long 42 na grup namba tu em, lesen bilong ol stat long 1 i go long 41 bilong buk baibel.

Tasol long dispela yia ol pikinini i bin wok hat tru na pinisim olgeta lesen bilong ol. Dispela i soim olsem ol i bin wok hat tru long lainim tok bilong God.

Nganing i tok olsem, long kamap wanpela

Sande skul tisa tu, em i no isi pela wok long wanem em i wanpela tasol na hevi bilong wok i winim em.

Em i askim sapos Redemer parish i ken luksave long dispela hevi bilong em na kisim wanpela moa tisa.

Nganing i tok, em i amamas wantaim ol papa mama bilong ol pikinini long givim gutpela sapot long ol pikinini bilong ol long kamap Sande skul sumating na lainim tok bilong God.

Em i tok long dispela taim yet i gat planti hevi na birua i kamap nau long dispela graun na i gutpela olsem ol pikinini i mas save gut long tok bilong God na redim ol yet long sindaun gut long bihain.

"Sande skul em i gutpela long wanem bai i helpim ol pikinini long luksave long gutpela na nogut pasin long dispela graun" em i tok.

Long dispela taim yet em i laik tok bikpela tenkyu i go long bosman bilong DPI stetsin, Joe Pieno, long helpim long givim haus long holim Sande skul lesen bilong ol na tu long pasta Maigau long sapotim dispela wok bilong Sande skul.


Finsafen i lukluk long developmen insait long distrik

BUSTIN ANZU
i raitim

FINSAFEN distrik bai i gat gutpela wara saplai na rot insait long distrik.

Dispela em i tingting bilong memba bilong Finsafen, Alfred Pogo, dipatment bilong Woks na teknikal divisen bilong lokal gavman.

Mista Pogo i bin mekim dispela toktok taim em i bin givim K20,000 sek long kamapim wanpela distrik sapot grant. "Mi wok long lukluk long 7-pela rot projek na



• **Sampela pablik sevan bilong Finsafeni sindaun ausait long Spots faundesen klab**


6-pela wara saplai projek planti ol manmeri bai kisim bilong neks yia," em i tok. dispela sevis.

Em i tok, em i festaim tru Maski long kantri i gat hevi

bilong moni we i bin go daun stret long wol maket, em i laik ol pipel i mas kisim liklik sevis, em i tok.

Pogo i tok olsem planti taim tumas, gavman i no save yusim dipatmen ov Woks long mekim ol dispela wok. Tasol ol i save yusim ol praivet kampani yusim i no mekim wok gut.

Em i tok olsem em i laik trenim ol pablik sevan insait long Finsafen distrik aninit long dispela distrik sapot grant. Program ya, bai stat neks yia.



• **Nupela polisi bilong bung bai helpim ol fiseris kampani long salim ol fres pis bilong solwara bilong Morobe**

Kaunsel i lukluk long kamapim nupela fiseris polisi

WOKBUNG bilong fiseris polisi na developmen plen bilong Momase rijen, i wanpela bikpela tok bilong Fiseris kaunsel miting we i bai kamap long neks wik, Mande.

Long dispela namba 5 miting bilong kaunsel bai kamap namel long ol fiseris, program edvaisa na provinsel fiseris bod bilong Is na Wes Sepik Madang na Morobe provins.

Momase fiseris edvaisa, Richard Nagai, i bin tok olsem dispela miting em impoten bilong fiseri bikos long dispela 5-yia developmen plen long Momase rijen.

Bai i gat wanpela praivet kampani menesa bilong Kavieng Fisheries, Andrew Wright, bai stap long dispela miting wantaim sampela ol pepa bilong fis-

eris.

Ol provinsel gavman bilong Momase rijen i amamas long kibung bikos em i bai helpim rijen long salim ol pis i go long ol bikpela fising kampani, husat bai mekim gutpela profit.

Nagai i tok olsem, wanpela gutpela piksa em Lae pis Saplai we salim ol pis bilong en long ol ketaring kampani.

NHC rausim ol man long haus

FRANCO NEBAS
i raitim

NESENEL Hausing Komisen (NHC) i stat ong rausim ol manmeri long Lae siti husat igat dinau i stap we ol ino wok long baim rent na stap nating long haus. Dispela ekksesais i bin kamap pinis long Pot Mosbi we kaikai bilong em i bin kamap gut stret.

Long dispela wik Mande ol statim gen long Lae we ol i rausim pinis tripela famili husat ino stre-tim rent bilong ol.

Tupela lain femili i stap long lokos haus long Buimo rot na wanpela bikpela haus long admin kompaun. Ol i bin odarim ol long muvim olgeta samting bilong ol aut long haus we plis i sambai long dispela taim.

Menesing dairekta bilong Nesenel hausing komisen Ludwig

Maliha na ol wokman bilong em i rausim olgeta samting long haus na ol lain bilong senisim lok i putim nupela lok long dua.

Mista Maliha i salim strongpela tok lukaut i go long ol dispela lain husat ol i rausim ol long haus olsem sapos ol i hambak ol i painim ol insait long dispela banis bai ksim taim long kot long brukim banis bilong arapela man.

Long wanpela miting bilong ol niusman bipo long dispela ekksesais Maliha i tokim ol niusman olsem, as bilong dispela ekksesais em long kisim bek dinau moni bilong ol we samting olsem sampela millien kina na i no long bagarapim ol lain i stap long haus.

"Ol lain stap long hai tasol i gat dinau olsem K4, millien olgeta we ol i no baim moa long planti yias igo pinis." Maliha i tok.

Long Mande, tri-pela haus lain i bin rausim kago bilong ol na

sampela moa bai kamap taim ol i kisim tok orait long kot.

Ol opisals long NHC long Lae i tok olsem, samting olsem 20-pela haus lain olgeta bai kisim taim long dispela ekksesais long taim ol i statim gen long neks yia.

NHC pablik rilesen opisa Tarscesius Muganau i tok olsem dispela ekksesais bilong ol long Mosbi i bin karim kaikai." Ol manmeri i wok long kisim save nau long as bilong dispela ekksesais.

"Toksava bilong mipela i go long ol pablik i olsem, haus em i no moa fri olsem bipo long taim bilong kolonial. Yu mas wok hat long kisim haus nau." em i tok.

Wanpela bilong ol dispela lain husat ol i bin rausim long Buimo rot, Silat Silau i tok em bai kisim NHC go long kot we em i ting ol wokman bilong NHC i paulim em.

Silau, husat bilong Madang provins i tok olsem, em i bin baim

K4,970.10 long Oktoba 10 long het opis bilong NHC long Tokarara, Mosbi bihain ol opis lain bilong Lae i no bin laik long kisim dispela dinau mani bilong em long wanem em i bin lat.

Lae distrik kot i bin odarim em long peim dispela dinau o nogat bai ol i bai rausim em long haus.

"Mi tok long peim dispela dinau tasol ol lain long NHC ino laik long kisim dispela dinau mani bilong mi na ol ino givim mi wanpela dat lain long peim." Silau i tok.

Em i tok olsem em i bin traim hat long baim dispela dinau tasol em i lat na ol i rausim em pinis long haus.

"Nau mi laik askim ol sapos ol inap long salim mi go bek long provins bilong mi?" em i tok.

Long dispela taim tu arapela man husat i no stap long we long em, Andrew Raipa husat i gat dinau olsem K6,620 i tok em i

save olsem ol bai bihainim em long dispela dinau.

Em i bin toktok wantaim kampani bilong em long helpim long baim dispela dinau na rausim long pe bilong em long olgeta fot nait tasol em i bin leit tu.

Maliha i tok ol papa bilong haus yet i rong pinis na ol i noken sutim tok i go kam.

I gat 5-pela famili husat i bin kisim len taitel long NHC long baim gut ol rent bilong ol i kam inap long nau. Ol dispela lain em, Andrew Macuba, Kelly Baro, John Salum, Francis Newland na Akoweda Iha.

Maliha bai bung wantaim ol rijonol na provinsel menesa bilong em long Desemba 14 i go inap 17 long toktok wantaim ol long hevi bilong haus.

Wau soka na Ragbi lig ripot - ARI GUH DANDEE i raitim

Kaindi em nupela sempion long Wau soka

KAINDI soka klab em nupela sempion long Wau soka asosiesen kompetisen bihain long autim St Francis 5-4 long penalti sut aut. Dispela gren fainel i bin pinis long Mande apinun bihain long tupela tim ya i putim strongpela pilai long Sande we nogat tim i kamap wina.

Gem long Sande i bin wanpela strongpela stret we tupela sait wantaim i bin lok long skoa 2-2 inap long ful taim. Referi Paul Pondo i givim ekstra taim long pilai long painim wina tasol nogat wanpela bilong ol i strong long kamapim gol o lukim umben i seksek.

Long dispela as skoa i sanap yet olsem 2-2 tasol ples i tudak na ino inap long lukim penalti sut aut i go het olsem na referi Pondo i askim ol klab opisals long putim gem ya go long Mande.

Bihain long liklik kibung bilong ol, ol i kamap wantaim wanpela tingting long pilai ful 90 minits gen long Mande. Dispela i bin lukim Kaindi i soim tru kala bilong ol na i winim taitel long dispela ya.

Gem long Mande i bin wanpela strongpela pilai wankain olsem

long Sande we gutpela atek na difens stail i bin kamap long tupela tim wantaim.

St. Francis i fes long brukim kiau bihain long longpela taim pilai. Gol ya i bin kamap long stail mangi ya Bafui Bangan bihain long gutpela pilai kam long ol poro bilong em, Gaumin Patak, Roland Daniel na Pogiap Kusunan.

Dispela gol bilong Bangan i mekim ol lain long Kaindi i bel kaskas na ol putim olgeta strong bilong ol long levolim skoa. Ol i pait hat i go na ino long taim wanpela asua i kamap stret long penalti eria bilong St Francis na referi Wesley Koima i givim dairek penalti long kaindi.

Andrew Kapin i kisim dispela penalti na pairapim stret umben bilong St Francis long levolim skoa 1-1.

Dispela skoa i sanap olsem inap i go long ful taim na tu ekstra taim kamap nogat skoa i bin kamap. Long dispela as ol i kisim penalti sut aut na Kaindi i soim em yet olsem ol i namba wan tim long Wau long winim dispela taitel autim St Francis 5-4.

Wau sempion bilong Morobe kantri lig

WAU Golden Gredges i soim tru strong bilong ol long kamap sempions bilong Morobe kantri ragbi lig kompetisen. Ol i bin autim tiket bilong Morobe Kundus 16-10 long Wau ragbi lig oval long las Sande.

Tupela sait wantaim i bin kamapim strongpela pilai long namba wan hap bilong gem tasol ol boi long Wau i i moa strong na brukim kiau long skoarim fes trai.

Dispela trai i bin kamap long samting olsem 15 minit bilong gem we gutpela strongpela pilai i bin kamap long Francis Casper, Paul Koromba, Herman Yak na Kaunsol Allan Joe.

Baga nogut ya Allan Joe bin kisim bal na ron inap long 50-pela mita long kamapim dispela trai. Casper i kisim konvensen kik tasol i popaia na skoa i silip yet olsem 4-0.

Dispela trai i lukim ol mangi Wau i suwim het yet long skoarim moa trai tasol ol Kundus i save yet na putim strongpela difens na holim ol skoa stap yet long 4-0 go long hap taim.

Bihain long sampela strongpela skul toktok long kosa bilong Gredges Dei Wana, ol i go insait na putim kamap strongpela pilai traim long putim moa trai. Dispela hatwok bilong ol i karim kaikai taim stail mangi fulbek ya John Pidik i pundaun stret namel long tupela pos long skoarim namba tu trai bilong ol.

Dispela trai i bin kamap long gutpela pas i kam long Francis Casper bihain long em i mekim sampela brek na setim Pidik long skoa. Casper yet i kisim konvensen kik na apim skoa i go antap 10-0.

Tasol ol mangi Morobe i no wari long dispela trai ya, ol putim olgeta strong bilong ol long pilai na ino long taim em ol i brukim kiau. Jinive Wai, Koike Kone na Wax Wagan i wok long putim strongpela ron we i brukim difens bilong Wau na kamapim dispela trai.

Ol tripela ya i kisim sapot long, Philip Martin, Ricky na Andrew we ol i setim gutpela bal long Wagan long skoarim dispela trai. Em yet i kisim konvensen na skoa i go antap 6-10 lukim ol Wau i go pas.

Long las minits bilong gem, em Wau i kamap wantaim narapela trai gen long John Pidik na Casper i kikim go insait long lukim fainel skoa Gredges 16, Kundus 10 long kamap sempions.

Kosa bilong Kundus Peter Nilkane i tok olsem, Wau i bin gat planti gutpela sans we ol i mekim gut kamap na karim kaikai bilong em.

Em i tok, "Mi amamas tru long gutpela sapot kamap long ol sapotas na tu gutpela pilai long ol pilaias."

Kosa bilong Wau Dei Wana i bin kisim bikpela tok amamas long tim menesa bilong em Ninga Yawa long kisim ol boi i kamap olsem na winim dispela fainel gem.

Long dispela taim menesa bilong Morobe Kundus Biwa Geta i tok olsem sapos olgeta samting i go stret bai ol bai traim lukluk long arapela sentas tu long pilai insait long dispela resis.

Em i tok, "Dispela kain kompetisen bai promotim ol mangi long ples kamap gutpela pilai na tu ol ino ken stap nating na mekim trabel."

Igam Bareks op-sisen soka i stat gen

IGAM Bareks soka asosiesen bai statim gen op-sison soka kompetisen bilong em long dispela Sarere. Dispela em bai namba tu yia bilong dispela kompetisen we bai kamap yet insait long bareks.

Dispela kompetisen i bin karim pinis gutpela kaikai bilong em long dispela yia bihain long ol i makim ol pilaias karim nem bilong Difens na pilai insait long taun kompetisen long Lahi soka asosiesen.

Dispela op-sison kompetisen i bin kamap bihain long ol sampela eksekutiv bilong Difens soka klab i kamap wantaim tingting long ronim op-sison kompetisen. Ol lain husat i bin go pas long dispela em, SGT Augustin Kori, SGT Dick Roy na klab Presiden Mesa Chris Ramenga.

Het kosa bilong Difens soka klab Augustin Kori i tok olsem, as tingting bilong dispela kompetisen em long pulim olgeta yangpela manmeri insait long bareks long kam bung wantaim na amamas long pilai soka.

Em i tok, "Arapela samting tu em mipela i laik makim ol pilaias long karim nem bilong Difens na pilai insait long taun kompetisen long siti."

IGAM BAREKS SOKA RIPOT

Long dispela yia Difens soka klab i bin mekim gut na 4-pela divisens bilong em i go insait long fainels bilong Lahi soka asosiesen. Insait long dispela 4-pela divisens, Anda 19, Wimen 2 na primia men risef i winim taitel long dispela yia.

Primia men tim tasol i no mekim long gren fainel tasol i bin lus long mesa semi fainel. Dispela i lukim tru dispela op-sison soka kompetisen i karim kaikai bilong em.

Long gutpela risalt long Lahi kompetisen, kosa Kori i tok olsem long dispela yia bai mipela i kisim moa nupela pilaias na tu strongim tim bilong mipela long neks yia long bungim ol namba wan tim long Lahi olsem, Sobou, Guria, Telikom na Yunitek.

Em i tok, mipela bai redi gut long dispela op-sison kompetisen bilong mipela na bai strong long winim olgeta taitel long Lahi."

Long dispela taim yet, Kori i kisim maus bilong ol soka eksekutiv bilong Difens na tok

bikpela tenkyu i go long mama asosiesen Lahi long sapotim soka insait long bareks na tu i bin givim referi bilong ol long lukautim ol gems bilong ol long las sison na tu long neks yia.

Em i tok, "Mi laik salim strongpela tok lukaut i go long ol pilaias long bihainim gut lo bilong pilai soka na noken mekim nabaut long wanem mipela bai kisim strongpela sas long ol lain i hambak."

Em i tok tenkyu tu long komanding opisa bilong Igam bareks Lt Col Kavanamur long larim ol usim fil bilong bareks long holim dispela kompetisen bilong ol long dispela yia gen.

Las yia sempions Igam Morans bai traim pait hat gen long difendim taitel bilong ol. Ol bai kisim strongpela salens long Normils, Idols, Fisika na Mix Mates.

Long dispela sison, samting olsem 20-pela tims bilong manmeri bai salens long dispela taitel. Ol klab we bai pilai insait long dispela resis em; Normils, Idols, Igam Morans, Pikus Moran, Panda, Fisika, ABI Warriors,

A.Team, Mix Mate na Kalibobo.

Morobe nemim 25 man skwat

BUSTIN ANZU i raitim

OL opisal bilong Morobe Ragbi yunion asosiesen i makim pinis 25 man skwat long redi long pilai egens Hagen long neks mun. Dispela skwat tu i lukim planti bilong ol lain husat i bin pilai long Singapore 7s' long las mun istap tu long dispela skwat.

Morobe Ragbi yunion Presiden Naka Songake i tok olsem dispela skwat bai ol katim kam daun long 22 man taim long go pilai long Hagen. Dispela wokabout bilong ol i go long Hagen em long bekim dinaw we ol lain long Hagen i bin kam daun na pilai long Lae. Long dispela gem em ol aspies bilong Morobe yet i bin win.

Ol selektas tu tok olsem dispela pilai bai kamap long taim bilong holide tasol sumating bai stap na pilai pastaim bipo ol i go kam long ples bilong ol

RAGBI UNION RIPOT

Dispela long wanem ol opisal na seletas i tok i bai gutpela bilong ol long bihain taim long kisim moa ekprens long ken karim nem bilong kantri.

Ol lain husat i stap long dispela skwat em, Aiem pilakos, David Kamilus, John Kinit (Yunitek), Anthony Agi, Hendrix Kafur, Joe Tolip, John Asimda, Kevin Vitolo, Lukie Kavon, Mark Stewart, Paul Pomoso, Paulis Tabuli, Philemon Hulo, Leo Tau, Michael Balakove (Royals), Edek Gula, Benny Bobola, Bernard Naibano, Chris Bobola, Jacob Gele, Jonathan Tolpare, Norman Tokunai, Samson Wewa, Willie Arthur (Barbarians), Henry Gima, Roland Mitu, Tony Tau (Telikom), Eric Alden, John Tukar, Lukas Watur (Difens), Jack Warkurai, Kwari Tau, Morris Ilaima (Pirates) na Peter Kone (Harlequins).

LAE MEN SOFTBAL RIPOT

Kompetisen lida Eagles bai kisim taim long Gans

FRANCO NEBAS i raitim

BROWN Eagles bai traim long winim Negiso Malangan long Sande long go het wantaim win bilong em long Lae men softbal kompetisen. Dispela em namba 4 raun bilong kompetisen na lata i lukim olsem ol boi long Eagles i wok long go pas long points tebol.

Bihainim Eagles em, Coca Cola Aviat long 6, Karanas 5, Malangan 5, NGI 4, Manalos 4, Burma Raiders Elcees 3, YMCA 1, Bismark 1, Tabaur 1 na Is Hawk 0.

Long gem namel long Eagles na Malangan bai wanpela strongpela pilai stret long wanem Gans bai traim long stopim win bilong Eagles. Tupela tim wantaim i luk wankain long strong long paitim bal na tu strongim difens.

Pitsa bilong Gans Jack Wakurai na ketsa bilong em Joe Kalimet i gat wankain strong long tupela birua bilong ol long Eagles pitsa James Pina na John Tume.

Dispela ol lain bai holim ki bilong dispela tupela tim long win. Wakurai em wanpela strongpela pitsa we tromoi bal bilong em save ron olsem simuk balus ya na sapos ol beta

bilong Eagles ino was gut, save pinis ol ba i kism straike aut (K2) ya.

Wankain tu long arapela poro bilong em, Pina long Eagles. Em tu save tromoi bal longlong ya na beta mas lukaut na paitim bal hariap nogat bai yu kisim taim.

Long sait bilong filding, tupela i wankain tasol asua i mekim em wanpela bai win. Eagles i gat ol gutpela lain long paitim bikpela bal abrusim ol infildas na aut fildas wantaim olsem, Thompson Tavana, Tataga Ngaungau, John Tume, Thomas Buasi, James Taule, Kepas Taule, David Maira na Ray Manup.

Dispela ol lain ya save paitim bal abrusim fil na pundaun klostu long Eriku bas stop ya. So Malangan mas putim gut was long ol. Tasol Gans tu i gat stail mangi bilong ol yet olsem, Theofield Keheno, Joe Kalimet na Jack Wakurai bai i go pas long ol. Ol dispela tripela lain em bai ol Eagles tu mas was long ol long wanem ol i save wokim mejik sapos ol birua ino lukaut gut.

Long arapela gems, em Bismark bai kisim YMCA, Tabaur wantaim Aviat, NGI bai traim autim Is Hawk na Karanas bai nekim Burma Raiders Elcees.

SPOTS WANTED WIKEN

HIRI KAP RIPOT

Hiri Kap redi long stat

MATHEW YAKAI i raitim

OL PIPEL long Sentral provins bai laki tru long i gat wanpela nupela soka tonamen i kamap long Pot Mosbi.

Nem bilong tonamen ya em Sentral Hiri Kap kik resis bai kamap long neks wik na pinis long Disemba 4.

Ol ogenaisa bilong dispela tonameni tok sapos dispela tonamen i ran gut long dispela yia, Hiri Kap bai stap long kalenda na bai kamap long olgeta yia. Samting olsem 24 tim i givim nem pinis. Na ol dispela tim bai stap insait long 6-pela pul

Long pul wan em Babaka, Keapora 1, Gemo, Moukele Gume, Amazon Bay, PMSA.

Pul 2: Kamali, Alukumi, Bau-Fuz, Ep.C.S., moukele Aloau, K.K.B.Ltd.

Pul 3: Makirupu, Keapora 2, Bao-Mitas, Eregabi, EPCJ, MUIAH.

Pul 4: Koupa, Karwa, Dubomunka, Oro Village, Sunset, Veaama.

Planti bilong tim olsem Golo, Verave, Koupa, Babaka, Bau-Futz, Bao-Mitas, Dobo-Omens, Magi Rangers na Amazon Be i save pilai long Pot Mosbi soka kompetisen na dispela bai kirapim tru paia lait taim ol i bungim ol viles tim.

Dispela tonamen em i olsem ol pipel long taun bai skelim strong bilong ol soka bilong ples.

Ol Fisherman Ailan tu bai putim wanpela strongpela tim. Bipo ol i gat wanpela tim ol i kolim Moukele.

MORATA LIG

Jets kukim Talapia long Morata

KOIYANDO OMBURA i raitim

JETS kukim Talapia long paia taim ol i win 6-4 insait long Morata ragbi long Sande.

Tupela sait wantaim i taitim bun stret long winim dispela pilai tasol ol Jets yusim gut beklain bilong ol long win.

Jets winga Joseph Bare pilai olsem biknem pilaia bilong Australian Broncos stail mangi Steve Renouf taim em i putim tupela trai.

Ol sapota i bin lukim dispela pilai na i amamas tru long strongpela pilai bilong Bare.

Bare i pasim het gia na i makim tru stail bilong Renouf taim em i spit na abrusim ol birua bilong em.

Bare i rausim Talapia fowart Topsyen Philip na senta Philip Kuria insait long 15 minits taim em i katim kona na spit i go putim namba wan trai bilong ol Jets.

Bal i bin kam long beklain na taim ol Talapia i slek, Jets kukim stret na salem Bare i go insait long sko.

Ol Talapia i pasim tok na ol i traim long bekim tasol ol Jets i taitim banis bilong ol long stapim ol Talapia.

Talapia traim long mekim ol strongpela ran insait long mak bilong ol yet tasol i no gat gutpela bekap.

Fowart Kei Begemo, Philip Ken, Samiel Philip na Kasen Peter traim hat bilong opim rot tasol Jets strongim banis i go inap long hap taim.

Tupela birua wantaim kamaut strong tru long namba tu hap bilong dispela resis tasol ol Talapia mekim save tru na ol i putim wanpela trai.

Dispela trai i bin kamap taim prop Peter i bin abrusim difenda bilong Jets Abraham Yol na Peter i ron i go putim dispela trai.

Peter i bin brukim difens bilong Jets long namel stret na taim Yol i pas yet long em, Peter i rausim em na spit i go long putim dispela trai.

Senta bilong Talapia, James Sika i kikim dispela konvesin na ol Talapia i stap 6-4.

Tasol ol Jets i belhat tru na ol i pasim tok na salem ol bikpela fowart olsem Tim Kosip, Raphael Mua, Mathew Numi na Paul Molo i go bilong brukim banis bilong ol Talapia.

Ol i kamap strong tru insait long dispela taim na taim ol Talapia i surik, Molo katim stret long arere na putim narapela trai long winim dispela resis.

Long ol narapela gem, Newton Knights na Giburi Raiders i bin dro 8-8, Tigers kaikaim Mutmut 11-0, East Kange beltim Megusa 8-4 na Warriors paitim Hawks 6-4.

YUT TONAMEN RIPOT

PNGFA bai salim anda 17 tim long Fiji

PAPUA Niugini Futbol Asosiesen i pasim tingting long salim anda 17 tim long Osenia taitel long Fiji neks yia.

Dispela tonamen bai kamap long Me 1-9 long biktaun bilong Fiji, Suva. Olgeta tim insait long osonia bai stap long dispela resis.

Presiden bilong PNGFA Peter Mommers i tok em laik givim sans long ol yangpela bikos planti taim ol i no save raun na pilai.

Sapos Anda 17 i go long tonamen, PNGFA bai i no inap salim wimen tim long Saut Pasifik Gems.

Mommers i tok em i save PNG bai win, tasol bai i nogat kompetisen long Guam bikos PNG i save winim olgeta kantri isi tru wantaim bikpela skoa.

PNGFA i bin givim nem long PNG Spots Federesen long salim sinia man na meri tim long Saut Pasifik Gem. Tasol sapos PNGFA i gat inap mani em bai salim tripela tim wantaim long sem-taim.


Mommers i tok em bai wetim toktok bilong PNGSF na bihain em bai wokim disisen long salim tim bilong ol meri o nogat.

Tim bilong wimen i kamap kwin bilong Polinesia taim ol i winim dispela tonamen. Tasol ol i no kisim kap bikos ol ogenaisa bilong Polinesia soka tonamen i askim long kik olsem visita tasol.

Long osonia, PNG i save pinis namba tri bihain long Australia na Nu Silan. Dispela tupela tim i mama bilong soka long rijen tasol long Saut Pasifik Gems, PNG i bosim dispela taitel ya.

Insait long ol arapela stori, FIFA bai traim yusim nupela lo bilong tupela referi na 4-pela lainsmen long ana 17 Wol Kap kwalifaia long Nu Silan. Dispela tonamen bai kamap long Disemba neks yia.

Dispela nupela rul em FIFA Ruls komiti i laik traim. Na sapos olgeta samting i stret, FIFA bai tok



• Spika John Pundari i redi long paitim bal long tonamen bilong em.

orait long olgeta memba kantri long yusim. Nupela lo bilong tupela referi i wankain olsem netbal na basketbal we i gat tupela referi i lukautim gem.

Ol arapela tonamen em Anda 17 wol kap kwalifaia Fiji na anda 23 wol kap kwalifaia long Nu Silan. Wanem tim i win bai salensim namba tri tim bilong Afrika rijen. I luk olsem Australia yet bai salensim dispela tim ya.

Kibung bilong wimen soka bai kamap long Amerika

HENRY MORABANG i raitim

PAPUA Niugini bai salim wanpela mausmeri bilong wimen soka long bikpela kibung bilong ol long Los Angeles, Amerika.

Dispela kibung bai kamap long Century Plaza Hotel long de Julai bilong neks yia.

Presiden bilong PNGFA Peter Mommers i tok olsem dispela miting bilong ol meri em long toktok long wimen soka. Em i namba wan taim dispela kain miting bai kamap na PNGFA bai



• Lorna Mave bilong Yunivesiti i traim long trikim Jinx bilong Telikom long Mosbi soka resis bilong ol meri.

FIFA WIMENS RIPOT

salim mausman o meri bilong wimen soka.

Toktok bilong holim dispela kibung bilong wimen soka i bin kamap long FIFA Wimen komiti las wik. Ol komiti i laik dispela miting i mas kamap long stretim ol toktok bilong wimen soka insait long wol.

Insait long dispela miting kamap long Zurich tu, ol ogenaisa bilong Wimens Wol Kap givim ripot bilong ol.

FIFA wimen komiti i oraitim olgeta ripot tasol tupela stadium


we pilai bai kamap i no gutpela tumas. Stadium long San Jose long California, na Portland i sot liklik olsem na komiti i askim sapos ol i ken mekim dispela senis.

Mommers husat i stap long dispela miting i tokaut olsem FIFA nau i toktok strong long kamapim soka resis bilong ol meri yut. Na ol i laik soka resis ya i mas kamap long dispela ol divisen Anda 17 na Anda 18.

Nau yet i nogat wanpela kantri long wol i gat dispela kompetisen. PNG tasol i gat dispela kompetisen tasol em i stap aninit long skul soka insait long Pot Mosbi na wanwan senta long kantri.

Planti ol senta i save yusim ol yangpela meri olsem long primia divisen. Lo bilong FIFA, dispela em i tambu. Ol meri i gat 18 kris-mas na i go antap tasol i ken pilai long primia divisen.

Mommers i tok OFC bai salim wanpela tokaut long dispela yut soka bilong meri long pinis bilong yia. Em yet olsem presiden i askim pinis presiden bilong OFC Charles Demsey long raitim dispela pas na salim i go long ol memba asosiesen.



Oi
poto
em
BAE
KIMALI
kisir

• Pitsa bilong AB Bears. Felicity Amai, soim stail bilong em na ol i autim All Stars 11-5.

• Lapun na wip yet. Lydia Veali bilong All Stars i wip yet wantaim sofbal.



• Pilaia bilong Bears i saitim stret long hom bes. Kain ran tu ya.



• Mada bilong Wantok i sel kam sua long hom bes. Oi i laki tru long dro wantaim Mazda insait long Pot Mosbi wimens sofbal kompetisen.

NGI bagarapim plen bilong Manalos

PMMSA RIPOT

NGI i bagarapim tru sindaun bilong Manalos insait long Pot Mosbi mens sofbal kompetisen las Sande.

Manalos i tingting long sindaun antap long poin lata tasol NGI i bagarapim sans bilong wantaim gutpela win 9-7. Ol boi bilong Albert Evald na Wesley Pialkolos i tingting long abrusim MSC tasol NGI i stapim ol.

MSC i stap long bai las wik na ol i wok long pre olsem Manalos i mas lus. Tasol MSC i sindaun antap yet long poin lata na Elcom i sindaun namba tu na Manalos namba tri.

I tru olsem Manalos i lus, ol i bosim yet namba tu posisen we i ken soim ol arapela tim olsem ol i gat laik long primiasip ya.

Gazelle i sindaun long namba foa ples bihain long Dolphins i givim hataim long ol. Ol boi bilong Patrick Pilak i win 2-1.

NGI i statim gut dispela win bilong ol long namba wan ining. Ol i skorim 5-pela hom bikos nupela pitsa Nelson Kiap i pits gut. Arapela samting Manalos i mas lukdaun long strong bilong NGI ya.

Tasol pitsa bilong NGI Michael Pukai i bihainim gut toktok kosa Blais Paivu na i no larim wanpela pilaia bilong Manalos i rekotim skoa.

Pukai i kisim gutpela sapot pilai i kam long ol infil pilaia olsem Sam Kepas, Nigel Tata, Blaise Tati na Blais Paivu jnr.

NGI i rekotim wanpela skoa moa long apim namba i go long 6-0. Tasol Manalos i bekim long namba tu ining wantaim tripela ran. Dispela ran i kamap taim Philip Samuel na Robin Lambert i paitim hom

ran.

Manalos i putim 4-pela moa ran long apim skoa i go long 7. Tasol lapun bilong NGI Ilikis Puipui i paitim wanpela baundri long bringim tupela rana na em yet i kam hom long apim skoa i go long 9-7.

Nick Tata, papa bilong klap yet i amamas long ol yangpela pilaia i putim kamap wanpela strongpela pilai egens long Manalos.

Bears i lus long Elcom.

Pitsa bilong Bears Esau Vinarang i no stap na yangpela Joe Avuchulas i kisim ples bilong em long pitsa.

Elcom i winim tos long paitim bal. Yangpela beta Isikel Tovia i paitim wanpela gutpela bal na em i winim tripela bes. Orait Albert Koniel i kisim Tovia i kam hom.

Koniel na Demas Tovia tu i kam hom na skoa bilong ol i go 3-0.

John Campell i paitim wanpela baundri na skoa i surik i go 4-0. Sotstap bilong Bears Lindsay Pulu i soim save stail e em i autim tupela Elcom pilaia long wan raun.

Tasol dispela hatwok bilong Pulu i lus nating. Bears i gat sampela pilaia long bes tasol ol poro bilong ol i no paitim gut bal na ol i stap long bes na aut.

Bears i skorim wanpela ran tasol long Mark Simon.

Na las tri ran bilong Elcom i kam long Allistar Tavol, Tovia na Tony William.

Insait long ol arapela pilai Brown Eagles memeim Hawks 8-1, Tigers waraim stret Malangan 15-0 na Gazelle autim Dolphins 2-1.

Poin lata nau i sanap olsem MSC 6, Elcom 6, Manalos 5, Gazelle 5, NGI 4, Tigers 4, Brown Eagles 4, Bears 2, Hawks 2, Malangan 2 and Dolphin 0.

Mazda dro wantaim Wantok

PMWSA RIPOT

MAZDA Carps i dro wantaim biknem tim, Wantok 4-4 insait long bikipela gem bilong Pot Mosbi wimens sofbal las Sarere.

Insait long ol arapela A gret gem, Norths i winim Gazelle 10-5, Bears i bekim dinau long lus bilong ol las wik na wilwilim stet All Stars 11-5.

Wantoks i lus olsem ol bai lus long Mazda. Dispela Mazda tim em ol yangpela meri husat i stap long PNG junia tim husat i bin pilai long Brisbane long namel bilong dispela yia. Ol i winim spes tu long resis long Wol Kap neks yia.

Mazda i bin kamapim strongpela gem stret long rekotim ol poin insait long namba faiv ining na tu seven ining.

Wantok i brukim kiau taim Kolish Banam i kam hom bihain long Ensie Tovia i paitim gutpela bal tru we ol yangpela Mazda pilaia i no tingting long en.

Tovia i tingting long rekotim narapela skoa gen tasol

em i aut. Helen Bunbun i ketsim na autim em ya.

Mazda i skorim 4-pela poin long namba tu ining bikos ol i paitim gut bal na tu ol infil pilaia bilong Wantok i mekim planti asua long holim bal na tromoi i go long bes ya.


Ol pilaia husat i winim hom bes na skoa em Nicky Simba, Bunbun, Wendy Sogai na Tara ToMangana.

Insait long 5-pela arapela ining, Wantok i putim kamap strongpela banis stret na i no larim ol Mazda i skoa. Yangpela meri Bogia long oufil Wendy Sogae i kamapim gutpela pilai stret long ketsim ol bal ya.

Senta autfil bilong Wantok Sandra Sawaraba i paitim gutpela bal na em wantaim Mal Evald i kam hom long daunim skoa Wantok 3 na Bears 4.

Orait long las ining, Philco Marut i paitim wantaim gutpela bal long kam hom na tupela tim i dro.

Wantok i nap long win tasol ol pilaia long bes yet i laik traime winim bes na ol birua bilong ol i autim ol.



• Philomena Onno (rait) bilong Wantok i pasim ai stret long ron i go long hom bes.

Eagles na Karanas i strong yet

LAE SOFBAL RIPOT

BROWN Eagles na Karanas tasol i no lusim yet wanpela gem bilong ol long Lae sofbal kompetisen.

Bihain long namba 4 raun, Eagles i go pas long poin lata wantaim 8 poin. Karanas i sindaun namba tri wantaim Malangan bikos em i lus las wik long Manalos na em i dro tu long wanpela gem.

Aviat Jets i go sindaun long namba tu ples bihain long em i lus long Brown Eagles. YMCA, Burma Raiders na Manalos i stap long 4 poin na Bismark na Taubar i sindaun aninit long poin lata.

Long gem i kamap long Sande, hom ran bilong Henry Meli long las ining i helpim Jets long winim YMCA 4-3.

Meli i gat tripela bal na tu tupela straik we em i redi long wokabout i go long bes. Tasol arapela tingting tu em sapos em i no paitim gut bal, em bai namba tri straik we em bai aut.

Tasol em i no tingim dispela tumas. Em i putim tingting long pilai na paitim wanpela gutpela bal we i go abrusim mak (baundri) na em i kam hom.

Tupela tim wantaim i kamapim strongpela gem stret ya. Pits bilong YMCA John Kaia i no save tromoi bal hariap tasol em i save mekim ol kain pits we i ken paulim ol

beta ya.

Kaia i poroman gut tru wantaim ketsa bilong em John Dola.

Ol YMCA i no westim taim. Ol i rekotim tupela ran i kam long Daniel Kaputin na Robert Danley taim Misiel Mago i paitim wanpela gutpela bal na i bihainim stret lain ya.

Kaputin i stap long seken bes na Danley long namba wan bes taim Mago i paitim bal bilong Meli

Pilaia long namba tri bes Bevan Tita i rekotim fainel skoa bilong YMCA. Orait ol lain Aviat i bekim taim Martin Samar i kam hom bihain long Kaia i paitim wanpela sakrifais hit.

Ketsa bilong Aviat i paitim wanpela hom ran na bringim em yet wantaim kepten Julius Uvia i kam hom. Na dispela i levelim skoa long 3-3.

Dispela taim nau gem i strong moa. Tupela tim wantaim i no larim ol birua bilong ol i skorim poin.

Tasol i go na Meli i paitim wantaim hom ran long hapim sko i go long 4-3 long las ining long win.

Insait long arapela ol gem Brown Eagles winim Taubar 16-8, NGI nekim Karanas 16-4, Bismark autim Malanga 5-3, Manalos memeim Raiders 13-3.

NGI i soim strong yet long Hailens

MT HAGEN SOFBAL

TIM ran i go pas long Mt Hagen wimen sofbal kompetisen NGI i soim strong olsem em i gat laik long winim primiasip long dispela yia. Las wik NGI i daunim pawa bilong sempion tim Unicats na win 5-2 las wik.

Tupela tim wantaim i kamapim strongpela pilai na i nogat wanpala skoa i kamap inap bihain long 5-pela ining.

Pitsa bilong tupela tim Vince Tirupia (NGI) na Lynetta Maradi (Unicats) i kamapim strongpela pits na i stapim ol pilaia long rekotim ol skoa.

Tasol Unicats i brukim kiau long namba siks ining taim ketsa bilong Unicats Rona Maradi i paitim wanpela hom ran na em wanpela wanpela rana i kam hom. Dispela i apim skoa bilong ol i go long 2-0.

Dispela hom bilong Unicats i kirapim skin bilong NGI long pilai strong tru ya. Orait kepten bilong NGI Maggie Wak, Leonie Wyatt, Damaris Tapas, Sally Wani na Vince Tirupia i traime skoa tasol nogat ya.

Ol pilaia bilong NGI i no rekotim win bikos Unicats i wok long was gut long ol na i no larim wanpela pilaia bilong i kam long hom bes.

Tasol long namba 7 ining, NGI i soim pawa bilong em taim Regina Kaut i bringim tupela pilaia i kam hom taim em i paitim wanpela sakrifais hit. Orait ol i pilai i stap na tripela arapela pilaia Sally Wani, Mariam Tonga, Wyatt na Tapas i kam hom. Dispela i apim skoa i go long 5-2.

Insait long arapela gem, Malangan i winim Royals 4-1. Ol Malangan i belhat long lus bilong ol las wik taim Unicats i memeim ol olsem na turangu, ol meri

bilong ol plisman i kisim taim stret ya.

Poin lata nau i sanap olsem NGI 8, Malangan 8, Unicats 6, Royals 2 na Wantok i no skoa yet.

TOK SAVE

WANTOK i singaut yet long ol man o meri husat i laik sapotim Spots Desk long raitim stori na kisim piksa i mas ringim Spots Edita. HENRY MORABANG long dispela telepon namba 3252500. Fax 3252579 o raitim pas i kam long dispela adres.

Wantok Niuspepa.

P.O. Box 1982.

Boroko, NCD 111.

WANTOK bai amamas tru sapos yu i gat telepon o feks masin, dispela bai mekim wok bilong mipela isi.

GORDON TAS RIPOT

Flat Steelers i autim
stail tim Sharks

LIONEL YOGOMIN i raitim

WANPELA tim insait Gordons Tas asosiesen, Flat Steelers, i wok long wokim nem isi isi bihain long planti ol pilaia bilong em i senisim tim long dispela sisen.

Las wik, ol i kamapim wanpela gutpela na strongpela pilai egens long Sharks na winim ol 18-12.

Gem namel long tupela tim i stat isi tru. Tasol ol Sharks i laik soim strong bilong ol na hapbek John Miva i kikim tupela fil gol.

Steelers i wok long holim Sharks long eria bilong ol yet. Ol i pilai na Miva i kikim wanpela bal na winga Paniki Mairi i putim wanpela trai long apim skoa i go long 6-0.

Kosa bilong Sharks Ken Silovo i no amamas na mekim sampela senis long tim. Em i surikim Tuksy Karu i go long hapbek na Stanley Haru i go huka na John Malabag i go long sekenro.

Dispela nau i kirapim paia na Karu i wok long setim ol pilaia bilong em. Joe Ove, Misima Dai na John Malabag i kamapim gutpela gem tasol difens bilong Steelers i strong tru na ol i no putim wanpela trai.

Sharks i no was gut na senta senta bilong Steelers Jeffrey Aih i putim namba tu trai long apim skoa i go long 12-0.

Orait Sharks i no wari na faiv-et Arthur Albert i giamanim difens bilong Steelers na setim Karu long brukim kiau 12-6.

Steelers i kam putim wanpela trai gen na surikim skoa i go long 18-6. Na Sharks i bekim long daunim skoa i go long 18-12. Sharks i wok long kamapim gutpela pilai long las minit tasol taim i sot.

Ol lain i pilai strong long Steelers em David Mune, Jacob Pap na Hore Kila na Joe Ove na John Malabag i taitim bun long Sharks ya.

WEWAK SOFBAL RIPOT

Wewak i singaut
long afiliesen fi

PRESIDEN bilong Wewak sofbal asosiesen long Is Sepik provins Mathew Muriki i singaut long ol klap i mas baim afiliesen fi na registresen fi bilong ol pilaia.

Muriki i mekim dispela toktok taim WSA i redi long sindaun insait long miting bilong PNG Sofbal Federesen long Kokopo long Sarere. Dispela miting bilong PNGSF bai pulim olgeta mausman bilong wanwan asosiesen.

Muriki i tok K50 bilong klap afiliesen i no bikpela tumas na em i laik olgeta klap i mas baim kwiktair. Na tu registresen bilong ol pilaia em K5.

Ol tim i givim nem long stap insait long resis bilong 1998/99 sisen em Defence, Waterboard, Tarangau, Kreer Sharks, Kreer Heights, United Karanas, Elcom, Gazelle, Tigers, Telikom, Dolphins, Wantoks, Power Bawa, Wewak Eels na Wharfies.

RABAU SOFBAL RIPOT

Talili Gazelle winim
pri-sisen fainel

TALILI Gazelle i abrusim strongpela salens long winim Kikila Cats long winim pri-sisen grenfainel bilong Rabaul sofbal kompetisen las Sande.

Dispela pilai i bin kamap gut we Kikila Cats inap win tasol ol i no tromoi gut bal na wanpela pilaia bilong Gazelle Victor Demas i kam hom.

Skoa i bin sanap 3-4 long sait bilong Cats.

Kosa na biknem pilaia bilong Gazelle Peni Tonga i sanap long namba tri bes. Orait Apelis Taule i paitim wanpela gutpela bal na bringim Tonga i kam hom. Orait skoa i sanap 4-4.

Apelis i kam hom taim sentral infil bilong Kikila Cats Eddie Taule i tromoi bal na abrusim pilaia long namba tri bes na referi Jeffrey Maira i tok Apellis i ken kam hom na Talili i win.

Kikila Cats em i lida long pul tu na Talili Gazelle em long pul wan. Tasol tupela i traime long na win.

Na long gem bilong ol meri, C-Vui i mekim strongpela tok lukaut i go long ol tim taim ol i autim Talili Gazelle 17-0.

Meri go pas long C-Vui em olpela pilaia bilong PNG Kessi Waule na MARY, Waigoga. Taim gem i stat, ol meri long Tavui i no westim taim na skorim bikpela namba bilong hom ran na referi i mas stapim ol long namba 4 ining.

Orait long namba tri na foa ples, Brown Eagles i autim MSC long divisen bilong ol man, na Norths nekim MSC.

Presiden bilong Nelson Paulias i tok olsem dispela prisisen i makim bikpela sisen tru long Rabaul.

Siaman bilong Gems Komiti Peni Tonga i tok sisen propa bai stat long dispela wiken semtair long PNGSF i holim jenerel miting bilong ol.

NGI i soim strong
long hailens

MT HAGEN SOFBAL RIPOT

TIM ran i go pas long Mt Hagen wimen sofbal kompetisen NGI i soim strong olsem em i gat laik long winim primiasip long dispela yia. Las wik NGI i daunim pawa bilong sempion tim Unicats na win 5-2 las wik.

Tupela tim wantaim i kamapim strongpela pilai na i nogat wanpala skoa i kamap inap bihain long 5-pela ining.

Pitsa bilong tupela tim Vince Tirupia (NGI) na Lynetta Maradi (Unicats) i kamapim strongpela pits na i stapim ol pilaia long rekotim ol skoa.

Tasol Unicats i brukim kiau long namba siks ining taim ketsa bilong Unicats Rona Maradi i paitim wanpela hom ran

na em wanpela wanpela rana i kam hom. Dispela i apim skoa bilong ol i go long 2-0.

Dispela hom bilong Unicats i kirapim skin bilong NGI long pilai strong tru ya. Orait kepten bilong NGI Maggie Wak, Leonie Wyatt, Damaris Tapas, Sally Wani na Vince Tirupia i traime skoa tasol nogat ya.

Ol pilaia bilong NGI i no rekotim win bikos Unicats i wok long was gut long ol na i no larim wanpela pilaia bilong i kam long hom bes.

Tasol long namba 7 ining, NGI i soim pawa bilong em taim Regina Kaut i bringim tupela

pilaia i kam hom taim em i paitim wanpela sakrifais hit.

Orait ol i pilai i stap na tripela arapela pilaia Sally Wani, Mariam Tonga, Wyatt na Tapas i kam hom. Dispela i apim skoa i go long 5-2.

Insait long arapela gem, Malangan i winim Royals 4-1. Ol Malangan i belhat long lus bilong ol las wik taim Unicats i memeim ol olsem na turangu, ol meri bilong ol plisman i kisim taim stret ya.

Poin lata nau i sanap olsem NGI 8, Malangan 8, Unicats 6, Royals 2 na Wantok i no skoa yet.



• William Lamur (lephan) bilong Shell givim K50,000 i go long sekretari bilong PNG Sports Federation John Dawanincura.

Shell givim K50,000 long Spots Federesen

MATHEW YAKAI i raitim

BIKPELA petrol na oil kampani insait long kantri, Shell, i givim K50,000 i go long Papua Niugini Spots Federesen (PNGSF) long mekim wok bilong em.

Koperet Afes menesa bilong Shell William Lamur i bin givim sek mani long hetopis bilong PNGSF long Haus Tisa long Waigani long Tunde.

Lamur i tok kampani bilong em i amamas wok bilong PNGSF na tu bikos em i save givim ripot long we em i save tromoi o yusim mani.

Em i tok dispela kain ripot em i gutpela bilong wanem ol spona i laik save tru long wanem rot em PNGSF i yusim mani bilong ol.

Em i tok olsem dispela kain pasin i mas stap yet sapos ol i laik kisim moa sapot long ol na ol narapela spona.

"Spot i save bungim manmeri bilong kainkain hap long kam bung wantaim olsem wanpela famili na kirapim gutpela sindaun," Lamur i tok.

Sekretari jenerel bilong PNGSF John Dawanincura i tok helpim bilong Shell PNG i kamap long rait taim we gavman i no givim gutpela helpim long spot. Aninit long baset o mani plen bilong neks yia, nesene gavman i no givim wanpela mani na i min olsem olgeta wok bilong spot long kantri bai bagarap.

"PNGSF i amamas tru long helpim bilong Shell taim PNG i bungim hevi bilong mani."

Dawanincura i tok.

Shell em i bikpela koporet bodi na i save go pas long kain pasin bilong helpim spot.

Dawanincura i tok wok bung namel long Shell na PNGSF i stat long 1991 Saut Pasifik Gems long Lae na Pot Mosbi we Shell i bin givim bikpela mani stret long sapotim tim bilong PNG.

Na dispela wok bung wantaim i stat long dispela taim i kam inap nau.

Long soim amamas bilong em, Dawanincura i askim Shell PNG long salim tupela mausman bilong ol long Saut Pasifik Gems long Guam neks yia. Dispela em wanpela we long tok tenk yu long ol spona i sapotim PNGSF.

Nupela inkwairi long Suharto

Jakarta, Indonesia:

Bihainim ol protes we planti bagarap na dai i kamap, Presiden BJ Habibie bilong Indonesia i bin odaim nupela wok painimaut o inkwairi long paul wok bilong olpela lida long kantri long moa long 32 kismas, Presiden Suharto.

Presiden Habibie i bin wokim disisen long makim wanpela komisin long karimaut wok painimaut long ol mani na bisnis Mista Suharto, famili na ol pren bilong em i gat siksipela mun bihain long em i kamap presiden long Me 21. Long dispela taim tu, ol strongpela protes na trabol i bin kamap long Indonesia we planti pipel i bin dai, planti i kism bagarap na planti samting long kantri i bagarap.

Wanpela inkwairi ol bin karimaut pastaim i no painim wanpela rong Presiden suharto i mekim tasol wanpela mausman i makim gavman i tok nupela



• Presiden Habibie ... makim wanpela komisin.

inkwairi bai i sekim na glasim ol samting na karimaut gutpela wok.

Hevi na trabel long tupela wik long Indonesia i kamapim dai long 16-pela pipel we 8-pela em ol sumatin plis i sutim ol long dauntaun Jakarta.

Ol sumatin i wok long singaut long kantri i bihainim rot bilong demokrasi na tu long Mista Suharto i sanap long kot bilong wokim pasin nogut (korapsen) taim em i ranim gavman insait long Indonesia long 32 yias.

Ol sumatin na pablik we i wokim protes long ol stri long Indonesia i wok long singaut olsem "hangamapim Suharto". Ami i bin blokim rot bilong ol protes lain taim ol i laik mas i go long haus bilong Mista Suharto. Samting olsem 200 sumatin i bin karimaut wanpela protes klostu long haus bilong Mista Suharto las Sande.

Planti pipel long Indonesia i egensim welt o planti samting na mani we Suharto na famili bilong em i gat bikos ol i bilip olsem em no kism long gutpela rot. Belhat bilong ol i gro moa yet taim kantri i pondaun nogut tru long nogat mani na planti

pipel i nogat wok na i lusim wok tu bikos mani i sot.

Long wankain taim tu, planti handred memba bilong Muslim sios long Indonesia las Sande i bin bagarapim ol Kristen Sios na pipel taim ol i stap long sevis.

Siksipela Protesten Sios memba i bin dai taim ol Muslim lain i atekim ol na kukim sios bilding long las Sande. Ol bin wokim wankain long wanpela Katolik Sios taim ol i holim wanpela marit seremoni na sevis i stap. Ol bin go insait long sios na brukim ol santu samting bilong sios, ol glas windo, salis na statju bilong Mama Maria na tu tromoi nabaut na kukim ol Baibel samting. Ol bin tromoi ston long ol soldia husat i spreim tiages. Ol ami i wok long gat hatpela taim tru long lukautim lo na oda long Indonesia. Indonesia em i wanpela Muslim kantri na liklik lain tasol em ol i kristen.

Loya bilong Clinton bai sanap long kot

Washington, Amerika:

Ripot i kamap olsem Indipenden prosekyuta long kot bilong presiden bilong Amerika, Bill Clinton bai i samonim praivet loya na gutpela pren bilong presiden long kism ol toktok bilong em.

Judiseri Komiti Siaman bilong Wait Haus Henry Hyde i tok planti ol Ripabliken memba i laikim Loya Hyde na Wait haus Kaunsel Bruce Lindsey long kamap long ai bilong kot na givim ripot bilong ol long keis bilong Mista Clinton na meri em i bin prenim na bikpela kot na stori i kamap.

Komiti i tingting tu long kwestenim Daniel Gecher, loya bilong Kathleen Willey, narapela meri husat i sutim tok long wokim prenpasin wantaim Presiden Clinton.

Ol Ripabliken i wok long soim intres long ol tok egens long presiden long sampela bikhet pasin we em bin mekim long taim bilong kempin.

Tupela Ripabliken na pati bilong presiden, ol Demokret i redi tasol long harim ol kot long dispela samting na Mista Starr em bai i sanap long prisemim ol ripot bilong em long dispela samting.

Nupela ripot long dai bilong Prinses Diana tok draiva spit draiv

London, Inglan:

Nupela ripot we jas husat i makim wok painimaut long birua bilong ka we i bin kilim dai Prinses ov wales, Prins Diana long Frans las yia i painim nupela evidens olsem draiva i bin lusim kontrol na birua i kamap long kilim dai Prinses, pren bilong em Dodi Fayad na draiva yet Henri Paul.

Ol ripot i tok long wok painimaut bilong ol saveman, Henri Paul i bin putim gia bilong ka long nutrel taim em i laik kwiktam sloim daunk ka. Na olsem birua i kamap.

Wanpela niuspepa bilong Frans, La Parisien, Paul husat i bin dring pastaim bipo em i draivim Prinses Diana, poroman na bodi gad bilong em i bin lusim tingting olsem meseidis ka ya em i otometik taim em i draivim ka i go olsem long tanel bilong Pont de l'Alma.

Ripot we mansave long ol ka birua Michael Nobodeau i sainim i tok Henri Paul i bin putim giastik bilong otometik i go long niutrel. Mekim na ka ya i spit long 112.6 KPH i go na bam long namba 13 pos.

Ol witness i tok ol bin harim bikpela pairap bilong enjin long dua bilong tanel bihain ka i bin kres.

Ripot bilong Mista Nobodeau i tok Mesedis ya i wok long ron long spit bilong 112.6 kph taim em i bungim birua tasol em i tok em bin abrusim 160 kph mak pastaim.

Jas Herve Stephan husat i go pas long dispela investigesen long ka birua we i bin kilim dai Prinses Diana bai i pinisim oigeta wok na givim fainol ripot bilong em long dispela long mun Janueri neks yia.

Kuantu prisev kamap ples tru bilong ol welpaul



• Piksa bilong ol pisin ol i kolim long "Teal" i pulap sindaun amamas long raunwara bilong Kuantu Netja Prisev long Taiwan, Ripablik ov Saina. Long antap, wanpela mama i helpim pikinini bilong em long lukim ol kain kain pisin we i save pulapim Kuantu Prisev.



• Kuantu Netja Prisev ausait long Taipei, kapital siti bilong Taiwan em i ples we ol kain animel laip olsem ol kain pisin, ol kuka, ol bitels na moa i stap long en. Dispela 55 hekta mangru taiswara em ol i lukautim na i gutpela hap long lukim netja, wallaip na ol pisin. Ol kain pisin olsem ol sparo, fins, walli faul, kinfisa, egret, teal na ol arapela moa i save stap long Kunatu taiswara.

OL RIPOT i tok ol i lukim samting olsem 180 difreh kain pisin long Kunatu Prisev taiswara. Long dispela 20 em ol i save stap long hap na 160 em ol dispela we i save kam long ol arapela hap bilong wol na long sampela taim bilong yia taim ples bilong ol i kol o kain olsem. Em long ol ples olsem Saiberia long rasia, Alaska, Saina na Tausen Ailan long Not Amerika.

Taiwan em i gutpela stopova ples bilong ol pisin ya bipo ol i plai i go long ol ailan sen long Sautis esia na Australia.


Namba wan long ol dispela pisin i save kamap long Kauntu Risev long Ogas. Em ol pisin olsem yelo wegteil, braun sraiks na long Septemba ol liklik pisin olsem danlins, senpaipa na grei wegteil i save pulapim Prisev ya. Oktoba em i mun bilong planti na ol bikpela pisin olsem long hok, ol pato, oo teal long kamap long Kuantu bipo ol i pali i go long ol tropiks

Planti pipel, ol netja lava, ol lain husat i save gat bikpela laik long ol pisin i save kam long Prisev long lukim ol pisin i bung, painim kaikai na sampela taim, pait.

Ol bin sanapim Kuntu Prisev long 1986 bihain long ol konsevesen lain i bin winim pait long dispela hap taiswara long ol indastriel na bisnis lain husat i laik kamapim wanpela komesel pak na beisbal stedium.

Kuantu Prisev em i modol piksa we i soim olsem sapos yumi lusim netja em i ken kamap olsem gutpela pren bilong man we ol kain animel na pisin i kamap planti, singsing singaut na kamapim amamas long ol man na tu ples we ol manmeri na pikinini i ken malolo Jong en.


Piksa na stori i kam long Free China Journal



DYNA

WEIT LIFTING SEMPION

**Strongpela
weit lifta
tru long klas
bilong em**



Toyota Dyna trak i givim yu olgeta samting yu bai laikim, wantaim flet bed, damp trak, na nupela stail ekstra bikpela keb wantaim dairek injeksin disel pawa. Mipela i givim tu planti kain ol Dyna we i gat ol spesel kain wok bilong ol. Taim yu kam long Weit Lifta, yu ino inap tru winim Toyota Dyna. Istap nau long ol getap long Papua Niugini!



PORT MORESBY PH 3229400 • LAE 4722322
 RABAU 9821988 • KOKOPO 9829100 •
 MADANG 8522188 • GOROKA 7321844 •
 MT HAGEN 5421888 • WEWAK 8562255
 KAVIENG 9842132 • KIMBE 9835155 •
 TABUBIL 5489060VA • NIMO 8571254 •
 PORGERA 5479367 • KUTUBU 5496685
 BUKA 9839915 • LIHIR 9864099 •
 ALOTAU 6410100



Bill Skate mas risain

Dia Edita,

MIPELA OLGETA manmeri bilong PNG laikim Bill Skate risain. Na oposesen i mas kisim gavman na ronim dispela kantri gut.

Bill Skate em yet wan man wokim disisen na em laik bagarapim dispela kantri. Em husat na yupela ol memba i go joinim em yet. Yupela i laik kamap raskol wantaim em o olsem wanem.

Wanpela long yangpela sevenpela memba lusim PPP na joinim Bill Skate yupela i laik bekim o egnesis dispela tok welkam long Wantok na amamas long lukim.

Iptowa Yarolopa
KUNDIAWA

Gavana bilong Simbu i no mekim gut wok

Dia Edita,

MI WANPELA mangi bilong Chuave, Simbu provins. Mi laik autim tingting bilong mi i go long Simbu gavana.

Mi mangi long Kapu Teine insait long Is Elenbavei. Mi givim ful sapat long Simbu gavana. Mipela kisim rot na em win na taim em i go long haus palamen em i no tingim votas bilong em.

Long wankain em kisim gutpela ka na gutpela haus olsem na em lusim tingting olgeta long mipela. Long neks ileksen em laik kam na Kepen yupela noken givim vot long en.

Em save mekim bikipela wok long Morobe sait na em save givim baksait long Simbu pipel olsem na husat man o meri yu laik sapatim mi yu rait i kam long *Wantok Niuspepa*.

Stanley Mondo
SIMBU

Ol memba hangre long pawa na mani

Dia Edita

MI WANPELA grasrut man long ples. Mi laik autim wari bilong mi long Wantok niuspepa bai ol arapela grasrut olsem mi yet i ken lukim.

Wari bilong mi i go olsem. Yumi grasrut manmeri long ples yumi save pilim pen na karim hevi wantaim. Yumi save givim vot na dispela i save kamapim ol memba i go long palamen. Ol i kamap bikman na ol i givim baksait long yumi ol lain long ples. Olgeta promis bilong ol i no save kamap. Ol i win pinis yumi no lukim ol moa long ples. Ol pilai ap long mani na gutpela kaikai ol i stap olsem long heven.

Ol i no sot long wanpela samting. Pipia maus bilong yumi kamapim ol bikman. Nau ol i bagarapim yumi pinis na yumi bai i dai nabaut olsem ol pik na dok. Ol i go kamap mani man long han bilong yumi ol pipel long ples.

Nau yet yumi harim kankain nius i kamap long palamen we ol memba i pait long pawa. Ol i no pait long yumi. Taim ol lain long Gavman i pasim tok long wanpela bil olsem Velu Eded Takis o VAT olgeta memba long Gavman sait i vot long en. Wankain long 1999 baset na ol arapela bikipela toktok bilong kantri.

Moa yet Gavman i givim ol memba moa mani insait long Rurel Eksen Progreim i go antap long K1 milion long wan wan yia. Mi no save sapos ol memba bai yusim gut dispela mani long bringim sevis i kam long mipela long ples.

Mi laik save tu mani bilong PNG i go we na Gavman oltaim i save tok i nogat mani. Plis inap Gavman tokaut long mipela ol grasrut dispela samting. Em tasol na mi bai amamas long lukim sapat o egnesis bilong pas bilong mi.

Jack Walne NIPA

Sapos yu laik salim ol pas bilong yu i kam long dispela niuspepa, salim i kam long dispela adres:
THE EDITOR
WANTOK NIUSPEPA, P.O. BOX
1982, BOROKO, NCD.

Daunim pe bilong ol lida

Dia Edita,

MI LAIK autim wari o bel hevi bilong mi i go long olgeta manmeri bilong PNG skelim.

Long laip bilong yumi tude yumi stap olsem wanem.

Tude long PNG yumi pesim bikipela wari long mani bikos ol lida bilong PNG ol paulim moni long kankain rot. Ol lida i no yusim mani gut long gutpela wei bilong lukautim kantri olsem na nau yumi hat taim bilong bungim.

Mipela ol grasrut i no inap long baim wanpela bikipela samting bikos mani i no inap.

Lukluk na skelim olsem mipela wanwan manmeri em mipela skelim

olsem mipela bai stap long hat taim bilong mani na olgeta samting long stoa bikos prais bilong kaikai idia tru mipela ol grasrut i no inap baim wanpela samting. Dispela hevi bai stap yia?

Wari bilong mi olsem katim daun pe bilong ol lida long mekim wankain long kamapim gutpela sindaun bilong ol manmeri bilong PNG.

Ol lida mekim kantri i bagarap olgeta. Husat yu laik agensim o sapatim rait tasol long niuspepa na mi lukim tenkyu.

Nips Kemmeth Gimbo
MADANG



Gutpela taim nau long planim kaikai!

• Ol manmeri i stat long planim kaikai gen bihain long san i bin stap longpela taim long kantri. Ol lain long lsten hailans i stat long planim poteto gen. Foto: Sape Metta.

Katolik Helt Sekreteri bilong Aitape i no wok gut

Dia Edita,

MI LAIK rait na sapatim tru pas bilong brata ya Milkisiter Mawi i bin kamap long *Wantok Niuspepa* long 15/10/98.

Mi laik tok tenkyu tru long yu brata Mawi long rait na autim dispela hevi o wari. Dispela wari o hevi i bin i stap long taim tru, mi ken tok tru olsem dispela daiosisen helt sekretari em i no save wari long ol nes i wok long bas, em i no save i go aut na harim ol wari bilong ol, o givim sampela kain ol long ol. Mi talks askim daiosisen helt sekretari olsem. Inap yu kam aut na tok klia long mipela ol nurse long wanem em wok tru bilong yu.

O wok bilong yu em olsem bos tasol bilong olgeta samting long Raihu, olsem lukautim edministresen, lukautim ol wokman long Raihu.

lukautim ol muvmen bilong ol ka o lukautim ol nes blong Raihu. Mi ting dispela i no stret. Wok tru bilong yu em long lukautim na harim ol hevi bilong ol insevis kos. Nau yet planti ol helt sabsenta long bus i sot long ol nes, olsem na sampela wok olsem.

Go aut wokim patrol (MCH) na wok bilong skelim ol mama i gat bel i no save kamap long wanem nes i sot. Rong i stap long husat. Ol nes o helt sekretari. Maski long sindaun long opis na akting bik bos tasol. Mi ting dispela pas bai i helpim yu long senisim pasin bilong yu long wok bilong yu. Husat i laik sapatim o agensim rait tasol long *Wantok Niuspepa*, tenkyu yu.

Michael Soma
NUKU

Ol gavman mas rispektim ol asples WNB

Dia Edita,

MI WANPELA mangi bilong ples. Nau mi i stap long Bialla setelmen na mi laik autim wari bilong mi long Wantok Niuspepa na ol pablik manmeri i ken lukim.

Long Wes Niu Briten provins ol raskol kilim indai wanpela asples man na ol katim mani bilong ol blok man inap olsem K40,000.00. Na mi no amamas tru. Rong bilong wanpela man na kisim olgeta blok man. Gavman mas lukluk long dispela kain man na kalabusim. Na ol lain bilong em mas baim kompensesen bilong dai man. Na sapos olgeta man i baim kompensesen ol dispela kain man bai kilim man olsem yet.

Ol Wes Niu Briten asples manmeri ol gutpela lain stret, tasol yumi save mekim nogut long ol na ol tu laik rausim yumi. Olsem na yumi yangpela mas yusim het bilong yumi, na i stap isi. Tok bilong God em tok olsem. Yu wok hat bai painim kaikai bilong em. Na yu les em bai yu no inap long painim kaikai. Em tokim yumi stret. Em tasol liklik wari bilong mi.

Yu husat brata o susa yu laik agensim mi o sapatim mi em ol rait tasol. Rait tasol long Wantok na mi lukim.

Mista Kundip Hinge
BIALLA

Enga em i namba wan provins long PNG

Dia Edita

MI LAIK sapatim Gavana Peter Ipatas long toktok bilong em i bin kamap long Wantok niuspepa namba 1220.

Ol pipel bilong Enga ol i no longlong na i save kirap pait nating na kilim ol man i dai. Nogat. Taim ol i pipel i pait namel long ol yet, ol i save mekim pasin moka o sigan na warbel na bringim bel isi bek.

Pasin bilong laikim narapela na sekan na hamamas em i stap long Enga. Sapos yu stap wantaim wanpela man long Enga bai yu kisim olgeta samting isi. Long hailans i gat faipela provins tasol long pasin bilong laikim narapela narapela na sekan na givim rispek na hamamas em i save kamap ples klia long Enga.

Tenkyu tru na bikipela hamamas i go long *Wantok Niuspepa* bilong PNG stret.

Epetami Ango
Sirunki Tabubik



PNG HIT PARADE

1998

Sponsors - TRADEWINDS

W/B	L/W	T/W	SONGS	ARTISTS
1	1	1	Boen Sarere	Feedback
7	2	2	Sore Daddy	Patti Doi
5	3	3	Madang	Demas Saul
13	9	4	Mighty Love	Kool Roots
9	6	5	Samarana	Vatdoro
2	4	6	Rumarua Te Mou'a	New Generation
3	5	7	Amari Ute	Patti Doi
4	7	8	Fenua No Te Penu	New Generation
8	8	9	Hau Bai Yu Save	Lista
6	10	10	ToDes	Quakes
0	0	11	Lutu Na Yakava	Kabani
18	18	12	Wairaone	Kevin Hoire
12	12	13	Mama Bilong Mi	Lista
0	20	14	Kekeni	Noel Asi
15	15	15	Altape Mi Wari	Kabu Rita
15	16	16	Takere Medley	Originals Sirois
17	17	17(6)	Rabaul	Patti Doi
14	14	18	Kalo Beach	Azzimbah
19	19	19(5)	Sissano	John Wong
0	0	20	Meri Ailan	Demas Saul

IN: Lutu No Yakava Kabani
 Meri Ailan Demas Saul
 OUT: Halfie Lista
 Yu Kirap Dirty Beggars Band



PNG FM PTY. LTD.
 Trading as
 NAU FM
 and
 YUMI FM

P.O. Box 774,
 Port Moresby
 Papua New Guinea
 Ph: (675) 320 1996
 Fax: (675) 320 1995

Sebas singim tok-piksa bilong

"Liklik Meri Bukawa"

JAMES KILA
i raitim


SAPOS yu wanpela sapota tru bilong lokal PNG musik, traim baim na skelim nupela stail kaset bilong Willie Sebas. Yes, dispela resa musikman bilong Is Sepik i stori gut long "Liklik Meri Bukawa". Noken tingting planti tumas. Dispela singsing em i olsem wanpela tok-piksa Sebas raitim na stori long gutpela bilas bilong Morobe provins. Em i stori long maunten bilong Labu i go bung wantaim Salamaua na tu Wara Markham i go miks wantaim solwara na ol gutpela samting i stap insait long provins. Yes, wanpela samting tu em taro bilong Bukawa em i wanpela switpela kaikai tru. Planti pipel husat stap long Lae na tu ol narapela husat i save raun i go long Lae bai ken tok stret na sapotim dispela tok. Hap ves bilong song i go yet na olsem: "Dispela liklik meri Bukawa i mekim mi tingim yu yet Morobe....." Willie i tok olsem: "Mi mekim song ya long stori long gutpela ol samting i stap insait long provins we i save pulim planti manmeri long laikim tru Morobe olsem ples bilong ol," Pacific Gold Studio (PGS) long las wik i go pinis i bin putim aut tripela nupela kaset bilong en we i gat bilip olsem ol dispela kaset i kam wantaim kik stret. Wanpela bilong ol dispela nupela kaset em bilong bagaros ya, Willie Sebas na taitol bilong dispela kaset "Em i Kam Gud Ya" Planti manmeri husat i save laikim lokal musik bilong Papua Niugini bai ino inap lus tingting long Sebas. Man ya i gat stail bilong em yet long singsing na kirapim filings na tu mekim ol planti lain i skih kirap long tromoi lek na danis. Yes, Sebas i save pilai olsem fran-man bilong Sagothongs, wanpela

grup we i save kamaut wantaim ol pawa singsing bilong ol we i save

nupela solo kaset bilong Willie Sebas, em i tok klia olsem em i no

olsem "Kaspa" we i stori long wanpela fani lapun man long Wewak

Lae. Ol i save tingim yet kain pasin bilong raun long strit. "Mipela ol mangi i stap long Lae i save olsem dispela ples i gat swit bilong em," Sebas i tok. Em i tok klia olsem namba tu song long sait A, "Mi gat Laik" em singsing bilong wanpela brata musikman bilong Mendi, Noan Wale, husat i bin givim em long singim. Turangu Noan i bin dai insait long wanpela ragbi gem sampela yia i go pinis. Narapela song "Pupulu" em wanpela olpela singsing bilong bipo em ol stringben i save pilaim. Sebas i tok em i singim dispela song long bringim bek memori i go long ol lapun, husat sampela bilong ol em lain bilong hatim skin stret long danis long stringben musik bipo. Insait long dispela nupela "Em i Kam Gud Ya" album bilong Sebas em i kisim ol memba bilong Feedback, husat i save mekim musik long PGS long halivim em. Ol musik-poroman em Richard Mogu (besgita), Douglas Lamo (kibot), Austin Waira (lid-gita) na John Hakalitz (dram). Sebas i salim bikpela tok amamas bilong em i go long ol lain husat i bin halivim em long kam long Mosbi long mekim dispela rekoting. Ol lain ya em Frank na Theresa Labu (Manu Autoport), Jimmy Paulus, Chris na Jacinta Kenewi long Murray Bareks, Kosi Ella na lain long Wewak, ol KDM mangi long Kreer skul setelmen na meri bilong em Anne na ol pikinini bilong em Shaddrack, Natasha na Layla long Lae.



"Dispela liklik meri Bukawa i mekim mi tingim yu yet Morobe....."

winim tru lewa bilong planti manmeri. Ol kain song bilong ol i save pairap gut tru na mekim yu hariap tru long laikim dispela ol singsing. Dispela nupela singsing bilong Sebas em i gutpela na i gat ol song we i ken kamap olsem reveret bilong planti ol yangpela. Sebas i stap yet olsem franman na lid gitaris bilong Sagothongs taim ben i bin stap long 1984 taim ol i bin katim namba wan kaset bilong ol wantaim PGS. Insait long dispela

laik long bagarapim maket bilong Sagothongs. Em i laik traim mekim ol singsing long stail bilong em yet na larim maket bilong grup bilong em i stap yet. Sebas i tok tu olsem grup bilong em Sagothongs bai go insait long rekoting long PGS long neks yia long mun Epril o Me. Em i tok olsem taitol bilong dispela nupela kaset bilong Sagothongs em "Sepik Pori" Dispela nupela kaset bilong Sebas i gat sampela ol gutpela song

taun. Dispela bagaros i gat kain stail tok-pisin bilong em we i ken mekim yu i lap na tu mekim yu i sem. Narapela ol song tu em "Wewak" we Sebas i stori long gutpela nam-bis na kala bilong Wewak taun. Narapela gutpela song bilong Sebas tu em "Morobe" we em i stori long bilas bilong Morobe yet. Sebas i tok olsem planti ol yangpela manmeri husat i stap na bikpela long Lae siti na bihain go long narapela hap i no save lus tingting long

Neks wik Wantok bai givim stori bilong nupela kaset bilong KANAI PINERI. Taitol bilong album em "Wok Masin:"



TOK TRU



**Oposisen Lida
Hon Bernard Narokobi**

Plen bilong Gavman long pulim mani long 1999 i sanap olsem K1,761.9 bilien taim ol i skelim wantaim K1,555.3 bilien bilong dispela yia 1998. Dispela em K206.6 milien moa long 1998. Antap long mani i kam long grens (K461.3 milien) na gren total bilong K2.981. bilien. Dispela namba bilong mani i antap moa long 1998 we i sanap long K2731.7 bilien. Dispela i min olsem olgeta mani bai i kamap long 1999 em K249.4 milien moa long mani i kamap long dispela yia 1998.

OL ASKIM

Sapos i olsem, bilong wanem na Gavman i katim ol bikpela sevis na opis o institusen olsem Medikel Rises Institut, Nesenel Rises Institut, Nesenel Kwarintin Atoriti, Spot Komisin, Smol Bisnis Developmen Kopresen, Nesenel Traipatait Konsaltativ Kaunsel na ol arapela?.

ANSA

Ansa i stap, tasol i no stap long Gavman ripot, tasol i stap long ol pepa we i soim klia. Hia em em ol tok tru:

1. Gavman i laik salim Papua Niugini, stil long Peter na baim Paul husat ino ken kisim pe.

Dispela bai kamap olsem wanem?

Dispela bai kamap long salim:

- a) Stet asets, olsem PNGBC benk, Air Niugini, PTC na ol arapela we i kamapim mani olsem K65 milien,
- b) Daunim o rausim mani long Agrikalsa, Fiseris, Forestri, Yunivesiti, Spot, Sains na Teknoloji, Edukesen na givim i go long ol memba. Dispela em rot Gavman i bin mekim.
 - 1) Rurel Developmen Fan - K91.00 milien.
 - 2) Distrik Sapot Gren - K54.50 milien.
 - 3) Wanwan Komyuniti Developmen Program - K15.00 milien
 - 4) Rot Mentenens - K70.00 milien
 - 5) Treseri na Kopret Afeas - K18.2 milien - Rikaren K101.73 miien, - Misalenius K746.779.9 milien, K866.711.9, - bekim ol dinau, Total - K1.097.411.9 bilien.

BILONG WANEM NA PANISIM PNG?

Olsem profet Job, yumi askim wanem asua yumi mekim long kisim dispela hat taim long baset bilong Skate na Rad Gavman?

Bilong wanem panisim PNG na daunim Lens Dipatmen na mekim PNG i stap long-we long arapela kantri bilong wol taim Gavman i katim ol wok bilong Foren Afeas?

- a) Ansa i no hat long painim. Wantok bilong Skate i kisim K7 milien long wok bilong em we i bagarapim yumi.
- b) Mani bilong wanwan memba i lusim K300,000 na i go antap long K1 milien.
- c) Gavman i tok invesmen bai i go antap i no tru tumas. K70 milien bilong rot mentenens i no inap go olgeta. Bai Gavman i was na

holim bek sampela mani yet.

WANEM ANSA NAU?

1. Olgeta memba bilong palamen i mas egensim dispela baset. Em i daunim mani bilong ol Lokol Level Gavman na Provinsel Gavman.
2. Gavman i mas senisim gen dispela baset. Baset i mas senis long putim bek olgeta mani bilong ol bikpela wok.
3. Sapos sampela moa mani i mas kam, d ispela mani i mas kam long:
 - a) Praivetaisesen na salim ol asets,
 - b) Konsesenel din:au,
 - c) Daunim mani bilong RAF na Distrik Sapot Gren long 25 %,
 - d) Daunim ol mani bilong rot mentenens (long K10 milien) na
 - e) Daunim diskreseneri fan bilong Treseri.

WANEM ROT I STAP HET?

Rot bilong kantri i bihainim i stap pinis long 8 Poin na 5 Nesenel Gol na Dairektiv Prinsipol. Yumi mas raitim ol gut na bihainim wanwan program bilong ol. Bikpela samting yumi mas sut long ol dispela samting:

1. Intagrel Humen Developmen:

- a) Givim sapot na strong long ol manmeri
 - b) Kamapim ol liklik wok bisnis na projek bilong ol manmeri long bai nogat man i sot long wanpela samting.
 - c) Ol meri na developmen
 - d) Kamapim rot i klia long ol yangpela.
- #### 2. Nesenel Sovereinti na Self Rilaiens:
- a) Stretim gut: wok lidasip
 - b) Strongim humen raitis na ol sosel wok
 - c) Strongim wok bilong pulim mani
 - d) Strongim wok bilong kamapim moa prodak
 - e) Gutpela rot bilong kamapim ol kaikai na abus bilong mipela yet.
 - f) Strongim wok agrikalsa, pis, fores prodak na turism na kamapim bilong ol manmeri yet i ken yusim na kisim na tu salim long ovasi s maket.
 - g) Kamapim gutpela wok bilong maining na petroleum indastri.
 - h) Gutpela pasin poroman long ovasis wantaim tred na komes wok bung.

3) Ikwality na Patisipesen:

- a) Wankain pe long wankain wok
- b) Developim pawa bilong ol man na meri
- c) Promotim gutpela famili sais na mak bilong mani long pe i mas bihainim wanwan nuklia famili long K2,000 long yia 2010.
- d) Kirapim gut ol sevis long ples long stapim ol manmeri i stap bek long ples.
- e) Kamapim gutpela sait bilong ol taun na siti
- f) Holim yet na strongim ol at wok, kalsa, musik na literesi wok long helpim olgeta lain.
- g) Promotim sosel oda long komyuniti polis na komyuniti kot.
- h) Strongim famili level bilong ekonomi long wok bilong ol na welfea. Stretim lo bilong

non fomol sekta.

4. Konsevesen na Envaromen:

- a) Promotim eko-turism
- b) Ol wok wantaim bikpela masin i mas go wankain wantaim plen bilong lukautim na banisim gut ol samting bilong bus, graun, solwara na win.
- c) Kamapim bikpela hap bilong raun lukluk olsem nesenel pak na gaden.
- d) Ol samting long solwara i mas stap gut long wok bilong sains na komesel.
- e) Gutpela na stretpela rot bilong daunim wok bilong katim diwai na kamapim daun strim prosesing we ol asples i ken mekim wok tu long en.
- f) Promotim ol frut, flawa na diwai o gras, ol binatang na pisin long wok bilong sains na komesel bisnis.

5. Ol pasin bilong Papua Niugini

- a) Strongim ol pasin tumbuna na nupela pasin wantaim long kamapim gutpela sindaun na pasin.
- b) Promotim gutpela na nupela laip long ples insait long plen bilong rurel riform.
- c) Promotim na strongim ol PNG ats na kraf wantaim ol bikpela kalsa de olsem sosio ekonomik prodak.
- d) Promotim PNG kalsa stadi long PNG yet na tu long ol ovasis institut.
- e) Promotim gut ol famili level bilong kirapim gutpela ekonomik groa.
- f) Kamapim gutpela level bilong pe we famil i ken kisim, samting olsem K2000 wanwan yia long yia 2010.
- g) Rausim ol kain kain sik we yumi ken stopim, i mas gat 100% imunaisesen, ol mama na pikinini i mas kamap gut na stap laip.

PINISIM TOK

Gavman i mekim bikpela abrus tru long luksave long sanap bilong PNG. Gavman i asua long bilip olsem taim em i givim mani long ol politisen, bai olgeta hevi bilong developmen bai pinis. Dispela i no inap kamap. Aninit long dispela baset, bai i gat sans bilong paulim moa mani bikos long wantok sistem, ol politiks pren na helpim bai i go wansait long sait bilong ol politisen tasol long winim namba na vot. Ol lain i nogat gutpela sindaun bai kisim bagarap yet na ol lain i gat planti mani bai gat planti mani yet wantaim bikpela pawa. Long rausim Research Institutions na i no makim mani bilong skul sains, teknoloji na edukesen, Skate bai lokim PNG long level we PNG bai i no inap gat moa save long mekim ol wok long save na strong bilong em yet. Dispela em bikpela hevi tru long dispela baset bilong Skate na Rad. Em i lokim yumi we yumi bai i stap rabis, nogat pawa na bai yumi kisim strong yet long ol arapela lain.

Bai yumi go we nau?

MARTIN MADEN
i raitim

MI WANPELA tarangu mangi long Papua Niugini; mi stap rabis tru, i nogat wok, nogat kaikai, i nogat ples slip, nogat papamama na i nogat brata susa o wantok.

Yu husat i ritim dispela stori bilong mi; ating yu tasol yu tumbuna o tumbuna bilong tumbuna....bilong mi.

Mi no kamap yet, tasol bai mama i karim mi long yia tri tausen na eleven (3011). Long dispela yia taim mama i karim mi, olgeta hap bilong graun i stap nogut tru.

Nogat pasin tumbuna o kalsa, na i nogat lo na oda; i luk olsem nogat God tu ya long wanem ol manmeri i wokim samting long laik bilong ol yet.

Bikpela hangere na pret mi pilim nau yet long bel bilong mi i mekim mi rait nogut. Mi hop bai yu klia nau bilong wanem as na mi no rait gut. Long olgeta de mipela save i gat kros na pait namel long mipela yet.

Pasin nogut

Mipela ol kain kain lain i save stap long dispela strit hia i pulap long pipia na pasin doti. Kain pasin nogut i bin stat bipo yet na i nogat pinis bilong em.

Ol kar bilong ol lain sekuriti i save i go i kam long nait na san wantaim, na sapos mipela ol asples Papua

Niugini i no was gut, planti bilong mipela bai i dai nating long hia long han bilong ol dispela sekuriti lain.

Pastaim mipela i bin poromanim gut tru ol kongkong (ol lain Esia) na nau ol i tanim bek na i kamap olsem ol bos bilong mipela.

Mi bin ritim long ol buk olsem long taim bilong yupela, ol ausait lain i bin grisim na givim mani wantaim ol kain samting long ol lida na bikman bilong yupela, olsem bai ol dispela lida i bihainim tingting bilong ol ausait lain na larim ol i stilim ol gutpela samting i stap long bus, graun na solwara bilong yupela.

Bikpela bel

Long taim bilong mipela nau, i nogat moa ol patpela (bel solap) memba bilong gavman, nogat "ekting biksot" wokmanmeri bilong gavman o kampani, na i nogat bisnis manmeri; mipela olgeta i stap kakoboi tasol.

Mipela i stap tarangu na rabis tru antap long graun bilong ol tumbuna papa bilong mipela kain olsem ol trip lain husat i nogat graun bilong ol.

I gat tupela kain asples lain i stap nau: wanpela em ol lain husat i save bihainim stret lo na inapim skel o tingting bilong gavman bilong tude- ol dispela lain, gavman i banisim ol i stap insait long ol kem o kompaun bilong ol yet.

Na ol namba tu lain, em ol i no inapim tingting na skel bilong gavman (mi yet i stap insait



• Praim minista Bill Skate, olupela rijinol memba bilong Simbu, Pater Louis Ambane, Minista bilong Defens, Peter Waieng, olupela minista bilong Komunikesen na nau gavana bilong bilong Simbu, Simon Wai i go glasim ol hevi long wanpela ples long Simbu long taim bilong bik san las yia. Foto: Wenceslaus Magun

log dispela lain) na ol dispela i wokabaut tasol long ol kona bilong strit bilong taun na painim ol pipia kaikai samting nambaut long inapim bel hangere bilong ol.

Mipela i save stap na slip tu long ol strit na ai bilong ol stoa na haus nambaut long taun.

Mi harim olsem yupela i bin gat graun bilong yupela yet, we yupela i bin save wokim gaden na planim ol kain kaikai.

Mi harim tu olsem yupela i bin gat ol traipela bus, graun, wara na solwarai pulap tru long ol pisin, binatang, pis, na olkain abus na kaikai nambaut.

Ol dispela stori mi bin harim, ol i tru ah? bikpela tumbuna stori tude i olsem: long taim

bilong yupela, Papua Niugini i bin stap wanpela naispela na nambawan kantri stret i winim olgeta kantri long dispela graun....tasol tude (wan tuasen yia bihain long taim bilong yupela) dispela naispela kantri i senis na i

na i kamap long nambis bilong Eia (Eia Beach). I gat planti pipia plastik i stap long hap em mi ting yupela yet i bin tromai nambaut long taim bilong yupela; solwara na nambis i pulap tru long ol kainkain plastik. I luk

mipela i laki, mipela i save i gat inap kaikai liklik olsem bai mipela i ken skelim wanem kain kaikai mipela i ken kaikai.

Tasol long olgeta arapela de em i no olsem long wanem, kaikai mipela i painim

ol tumbuna pikinini bilong yupela i kisim bikpela taim nogut antap long en.

Olsem na mipela i save ranawe i go long taun long wanem mipela i ting bai mipela i painim gutpela sindaun long hap.

Tasol yupela i save wanem? Mipela i save i dai nating olsem ol dok o binatang long ol hap kona nambaut long taun.

Yupela ol tumbuna papa i mas skelim na i mas sem long kain gridi pasin yupela i mekim na bagarapim tru sindaun bilong mipela.

Toksave bilong edita

• *Dispela stori i bin kamap long pes 26 bilong Post Courier niuspepa long 1 Novemba 1996. Mr Martin Maden i bin raitim dispela stori long tok Inglis (het tok bilong dispela stori em "Future Child").*

Wantaim tok orait bilong Martin, mipela i bin tanim stori ya i go long Tok Pisin na i mekim sampela liklik senis long en, olsem bai planti moa pipel long Papua Niugini i ken ritim.

Ating dispela stori bai i gat gutpela skul we i ken helpim yumi wan wan long skelim gut ol kain pasin yumi save mekim tude.

"Yu husat i ritim dispela stori bilong mi, ating yu tasol yu tumbuna o tumbuna bilong tumbuna bilong tumbuna....bilong mi."

bagarap olgeta long wanem yupela na ol lida bilong yupela i bin mekim dispela asua taim yupela i aigris long mani na ol samting bilong ausait.

Dispela stori em i tru ah?

Sampela taim mi save painim pipia kaikai i go olgeta

olsem taim yupela i bin save go waswas o piknik long nap, yupela i tromoim nambaut ol pipia, na i no wari olsem ol dispela pipia i wok long bagarapim nambis na ol solwara wantaim ol pis, rip na olgeta samting i stap long hap.

Taim mi lukim ol dispela plastik, mi save daunim spet nating long wanem, mi ting bai mi painim wanpela gutpela samting insait long wanpela plastik na kaikai, long inapim bikpela hangre oltaim mi save pilim long bel bilong mi. Tasol sori tru i nogat kaikai.

Bikpela wari

Bikpela wari bilong mipela ol asples Papua Niugini bilong tude em long kaikai. I luk olsem wari bilong yupela i narakain olgeta: ating yupela i bin save wari tasol long mani.

Mipela nau i sot tru long kaikai na i stap hangere olgeta de long laip bilong mipela. Wan wan de tasol sapos

long pipia dram em i liklik tumas na mipela i kaikai wantu tasol.

I bin kain olsem long taim bilong yupela tu ah? Yupela i bin save painim kaikai long pipia dram tu?

Nau yet sindaun bilong mipela ol asples Papua Niugini i bagarap olgeta. Olsem na mi no save nau; i luk olsem mi mas westim nating taim bilong mi long raitim dispela stori bilong mipela, bikos taim yupela i ritim bai yupela i wokim wanem long helpim mipela?

Yupela i no bisi o wari long mipela ol tumbuna pikinini i kamap bihain long yupela.

Olsem na mipela olgeta nau i no wanbel liklik, na i sutim stret tok long yupela, long kain taim nogut mipela i bungim nau yet.

Mipela i sutim tok long yupela tu long dispela rabis stingpela hap graun i nogat gris long en, em yupela i larim i stap bai mipela



• Katherine Mal, bos bilong WYID i skulim ol mama long kuk long Madang

KANAGE

"Em nau, narapela wik bilong mi ken"



■ Kanage ron long PMV long Drekkia i go long Wewak taun. Ol i ron i go na Kanage i wok long singaut na tromoi han long ol meri long rot i kam. Ol i ron long rot i go na draiva i kirap na putim hat brek na Kanage flai i go fowet na holim susu bilong wanpela pasindia meri long fran sit. Meri ya belhat na kros long Kanage taim ol plisman i kam. Meri ya stopim plis ka na tokim ol long hevi i kamap. Olsem na polis i tanim na askim Kanage sapos i tru. Na Kanage i tok, yes tasol i no mi mi wokim, em rong bilong ka long putim ful brek na mi hetwin i go long fran.

Polis askim meri ya gen na em i tok, mi no bilip bikos em i kalap stret na holim susu bilong mi. Kanage kwiktai tokim ol plisman, mi no holim tru, mi presim tasol.

REECE LAKUN MAPRIK

■ Kanage i bilong Buang na em i save lukautim wanpela meri sipsip long Bulolo taun. I no longtaim na dispela meri sipsip i gat bel. Planti manmeri i stat long tok beksait bikos i nogat sipsip man i stap long meri sipsip bai bel. Olsem na Kanage i kisim tingting nogut bilong ol lain pinis na em i tokaut olsem nogat wanpela man inap mekim olsem long enimol na bai enimol i gat bel. Tasol ol manmeri long Bulolo i strongim rong tingting bilong ol. Bihain ol i tok, maski yumi wet na lukim sipsip i karim pikinini pastaim. Ol i wet na sipsip i karim pikinini. Tasol olgeta pikinini sipsip em sipsip stret. Kanage i kirap na tokaut, yupela lukim a, mi tok wanem. Em ol sipsip stret. Olgeta manmeri i daunim het na sem nabaut. I no longtaim wanpela bebi sipsip i kra, pa-pa, a-a-a.

HATCHZ BAOM BULOLO

■ Kanage stailim em yet na sindaun klostu wantaim ol meri long PMV ka. Ol i ron long rot i go na rot i nogut na mekim ka i kalap kalap. Draiva i no isi tu. Em i givim siksti na ol manmeri i kalap kalap nogut na holim ol hap ain nabaut. Wanpela yangpela meri i sindaun klostu long Kanage na em i painim samting holim tasol nogat. Olsem na Kanage i kirap sanap na tokim meri ya, yu ken holim lek bilong mi na mi bai sanap. Meri nogat toktok bikos em sans hap bilong holim na sindaun strong. Olsem na meri ya i raunim tupela han bilong em long lek Kanage na holim strong. Taim ka i kalap kalap gen, meri ya bai holim tait lek bilong Kanage na pasim het bilong tu antap long lek bilong Kanage. Kanage i kisim bikipela filings tru na i go. Taim olgeta manmeri long PMV i lukim, ol i lap nogut tru na Kanage i kirap na tokim ol, nau em taim nogut olsem na holim strong wanem hap yu holim. Kanage i kisim filings tru olsem na em i sanap long Lae i go inap long Madang.

DAVID DOA MAPRIK

■ Wanpela bikipela miting i kamap long Bulolo na ol i makim Kanage olsem bos bilong sekjurit. Olsem na Kanage igo antap long gren sten na mekim toksave long olgeta manmeri i kam long miting. Kanage i holim spika na tok, yupela olgeta manmeri i kam long miting, sapos yupela i laik tromoi basket-



bal, i gat tupela basketbal kot istap yupela i mas go tromoi stret ring. Noken tromoi nabaut nabaut long arere. Sapos mi bengim tos na lukim wanpela man o meri long arere, bai mi tokim em long rivesim wanwan bal i go bek stret long hap ol bal i kam long en.

HATCH BAOM BULOLO

■ Kanage em Sande skul tisa. Wanpela Sande em stori long stori bilong Moses. Kanage stori olsem Moses i kisim ol lain bilong em na ol i go long deset na nogat wara. Olsem na em apim kopi stik bilong em na tromoi long ston na wara i kamap na ol i dring. Bihain ol i go gen na solwara i pasim rot bilong ol. Olsem na em apim kopi stik na tromoi na kolta rot i kamap namel long solwara na ol i go long en. Kanage i stori i go na i no klia long nem bilong ples ol lain bilong Moses bai kamap long en. Olsem na em i tok, ol i go, ol i go, ol i go yet. Kanage i paul yet long nem bilong ples olsem na em i tok gen, Moses i kisim lain bilong em na ol i go, ol i go, ol i go, ol i go na ol i go yet. Wanpela liklik boi i sindaun na harim na les pinis na bikmaus, tisa, mi save. Ol i go na kamap long Kenan. Kanage harim na tok, laki tru na yu kolim ya, nogat bai ol i go yet na nau 1998 bai ol i go yet.

KANAGE FAN LAE

■ Kanage em wanpela hetman bilong haus lotu. Wanpela taim em i tingting long putim wanpela tok piksa wantaim drama long Sande lotu. Olsem na long Sande, taim olgeta manmeri bung long haus lotu na harim lotu pinis, Kanage go antap gen na autim liklik tok tasol bilong strongim olgeta toktok ol i harim pinis. Em nau Kanage i tokim olgeta manmeri, taim yu mekim gutpela pasin long narapela manmeri, bel bilong yu bai i klin na waitpela olsem. Em poinim han long waitpela laplap em i pasim long dispela de. Em nau em i tok gen, na sapos yupela mekim pasin nogut long narapela manmeri, bai bel

bilong yupela i bilak nogut olsem. Em i mekim guria long lek na waitpela laplap i lus go daun long floa. Tasol em i mekim strong nois na blakpela laplap long insait tu i lus na pundaun long floa. Turangu Kanage i sanap nating wantaim ret-pela andapens na ai bilong olgeta manmeri long haus lotu i go tudak olgeta.

PETRUS KAMBU BIALLA

■ Kanage i bilong Simbu na i lusim Kundiawa na go lukim poroman bilong em man Bundi na em i save wok long haus kakaruk long Nii ini Table Bird long Lae. Kanage i go na tupela i stap na wantaim taim man Bundi i kisim stik bilong tarim marasin bilong dram wara na askim Kanage, pren, ol i kolim dispela em wanem?. Na Kanage tok, ol i save kolim Medikesen. Bundi harim na belhat long Kanage i winim em long tok Inglis olsem na em i tok gen, Kanage, ol i no save kolim Medikesen, ol i save kolim Medidesen. Kanage harim na bel bilong em pen olgeta tasol em i les long daunim poin bilong pren bilong em olsem na Kanage i tok, em stret, yu rait ya. Mi lusim skul tripela krismas pinis na ol Inglis tu i wok long lusim het bilong mi ya.

KU NAVA KUNDIAWA

■ Nogat kaikai long haus olsem na misis Kanage i go long gaden long painim kaikai. Em ino kam hariap na Kanage wantaim ol pikinini i hangre nogut tru. Kanage sekim kapot na painim wanpela las plastik rais i stap olsem na em boilim long sospen. Taim rais i kuk pinis, em i skelim long ol pikinini na tambu meri tu. Ol i kaikai i stap na papa bilong misis Kanage i kam. Kanage i lukim tambu na tok, o sori tru, tambu, liklik rais tasol na mi sutim long ol pikinini pinis. Lukim tambu meri em mi sutim, ol bubu tu em mi sutim ol na nau mi sutim as bilong sospen i stap. Sapos yu kam hariap, bai yu sutim yu tu. Tambu i harim na sem nogut na ronawe i go bek long haus bilong em.

LAYTONS WOMANDUO WEWAK

■ Kanage wantaim pren bilong em i wokim katapel na go raun long painim palai long bus. Tupela painim palai i go na bungim wanpela palai i sindaun long diwai i stap na tupela mekim save long sutim i stap. Tupela sutim i go na olgeta ston i pinis. Olsem na Kanage tokim poro long wet na em bai go antap na ronim palai i kam daun. Taim Kanage igo antap long diwai, trausis i bruk na tupela wil bilong Kanage i lus kam daun. Poro i lukim na lap nogut tru. Tasol Kanage i ting poro i lap long narapela samting olsem na em i go het na ronim palai antap long diwai. Palai j ronawe karangu na kam namel long tupela bilong Kanage na hangamap long tupela wil bilong Kanage. Turangu Kanage pundaun olsem wanpela hap diwai i kam daun long graun na kaundim star. Poro bilong Kanage lukim olsem na ronawe igo olgeta long ples na larim Kanage hap indai istap.

CLAY YAMARI WEWAK

■ Kanage bilong Karkar na em i save prenim wanpela meri Wali kantri. Long wiken tupela pasim tok na go long danis long Yabob. Kanage i dring planti bia na hot staf na het bilong em i paul olgeta. Kanage wantaim prenmeri i kilim skin long danis na kirapim das i go. Em nau Kanage kirap na askim gelpren bilong em, daling, yu bilong wanem hap tru. Gelpren i kirap na tokim Kanage, mi bilong aspies ya, meri aspies. Kanage harim na bek, em orait, mi bilong taun ya, manki taun. Manki taun na meri aspies i bung em rait olgeta. Kanage tok olsem na tupela mekim save long danis i go tulait.

LOTAU MALUF MADANG

■ Kanage i go raun long wara long Kavieng na em i lukim sampela yangpela meri wok long kukim kaikai arere long wara na waswas i stap. Em nau Kanage i giman go sindaun klostu long na putim skin

long tok pilai na ol meri i lap i stap. I no longtaim sampela yangpela meri moa i karim ol kango kumu i kam. Taim Kanage lukim olsem em i bikmaus long ol olsem, bipo mi planim yupela, yupela planim mi tu a?. Olgeta meri i harim na lap indai olgeta long tok pisin bilong Kanage. Samting tru em Kanage i laik tok, bipo mi planim dispela kango yupela helpim mi tu a?.

KANAGE PREN KIMBE

■ Kanage i man bilong lotu tasol bilip bilong em i pundaun bikos long ol meri tasol. Em i save aigris long wanpela meri long lotu tasol meri ya em strongpela lotu meri tru. Wanpela taim, Kanage i bilas gut tru na wokabout i go long bungim meri ya. Long rot, meri ya i kam na Kanage i na holim han bilong meri ya. Tasol wantu meri i bikmaus, satan go longwe. Kanage tanim na lukluk tasol nogat man long beksait. Olsem na em i go het gen na holim han bilong meri ya. Na meri i kirap na tok, satan go longwe. Kanage i no harim na mekim gen na dispela taim, meri ya i go na sanap na poinim finga long nus bilong Kanage na tok, yu satan go longwe.

Kanage i sem nogut tru na lus long dispela hap.

KEN BOAS KIMBE

■ Kanage i bilong Tambul na wanpela taim em wantaim meri bilong em i go long Hagen so. Kanage em drag bodi man na em karim ol smok mariwana na salim long so i stap. Ol plis i kisim tok-save na i kam long holim em. Tasol Kanage i ronawe na paul nabaut insait long so graun. Ol polisman i painim em i go nogat na ol i putim strong was long olgeta geit bilong so graun. Kanage i save na em i pret nogut tru na tokim meri bilong em, yu haitim mi insait long bilum na karim mi go ausait. Misis Kanage i pulapim Kanage olsem bebi insait long bilum na karim em i go ausait. Long geit, ol plisman i stapim misis Kanage na askim em, man bilong yu we. Tasol misis Kanage tok, dispela drag man ya em paol long so graun i stap. Yupela painim em na kalabusim em i go laip yia stret.

Kanage slip insait long bilum na giman kraik olsem ol bebi na tok, mama, mama, tutu, tutu. Misis Kanage kirap na tok, yu slip isi, yumi go ausait orait yu susu. Bos bilong plis i sori long misis Kanage na tokim em, yu wantaim bebi bilong yu i go, yutupela i no rong. Tasol papa bilong yupela bai lek bilong em i bruk na em bai go kaikai braun rais stret. Isi tasol Misis Kanage karim Kanage long bilum i go ausait na tupela lus wantu tasol na stap long ples Tambui.

VINCENT REX HAGEN

Kanage i ron long PMV ka i go na draiva i go putim ful brek stret long rot bikos wanpela pik i brukim rot. Olgeta manmeri long ka i sut i go fran na kam bek. Kanage tu i sut i go fran na holim as bilong wanpela pasindia meri long ka. Meri ya i no amamas na kotim Kanage long polis. Tasol Kanage i tok, em taim nogut na olgeta manmeri i flai nabaut long ka i go fowet na kam bek. Tasol meri ya i tok, em i tru tasol gutpela long Kanage i mas holim fom o hap palang bilong ka na i no as bilong mi. Kanage harim na bekim, sapos meri ya i no amamas long mi holim as bilong em, orait em i ken bekim na holim as bilong mi. Mi no inap komplek. Ol polisman i harim na askim meri long holim as bilong Kanage tasol meri ya i painim hat olsem na em i tok, em orait, han bilong yu i ken amamas bodi bilong yu tasol samting tru bai i hat olgeta long yu. Meri ya i tok olsem na tekov.

CLAY YAMARI WEWAK

■ Kanage em bilong ples Teptep long boda bilong Madang na Morobe provins. Olgeta de em save giamanim meri bilong na stap bek long haus bikos em wanpela les man tru bilong wok gaden. Wanpela taim meri bilong em i kisim tingting na em hait long haus i stap. Long de taim, Kanage i go sanap long verenda na wisel. I no longtaim, olgeta yangpela boi i kam tasol na bung na ol mekim save long stori i stap. Kanage putim ol mauswara bilong em na ol manki i bisi tru long harim i stap. I no longtaim, misis Kanage i kam sanap tasol long dua wantaim traipela diwai na brukim stret beksait bilong Kanage na Kanage lus nating wantaim ol boi. Kanage go sanap longwe wantaim pen na poinim finga i kam bek long meri bilong em na tekov igo lus long bus.

WASU KEPAI MADANG

■ Kanage i save wok wantaim Luteran Siping long Finsafen. Olgeta taim em i save askim pikinini meri na man bilong em long Lae long baim wanpela ka na ol bai ronim PMV long Finsafen. Tasol ol i no harim tok. Orait taim Kanage i risain long Luteran Siping, kampani i baim wanpela ka bilong em long pinis pe bilong em. Kanage i save ronim PMV i long Finsafen i go kam. Wanpela taim pikinini meri na man bilong em ol i kam long holide. Taim sip i kam sua long Buki nambis, pikinini i karim kago na i go tromoi antap long ka bilong papa Kanage. Papa Kanage i tait tasol i kam na tokim pikinini meri na tambu bilong em, husac tok yupra kua long kare borong mi a, em kare borong mi na Luteran Siping ya, kuan olgeta go daun. Pikinini meri sem nogut tru na rausim ol kago na painim narapela PMV na go long ples.


KELLY GIA MOROBE

■ Kanage i bilong ples Afimi na em i raun long Kiunga taun long wiken. Em i raun i go na go insait long wanpela seken han kolos stua. Em i lukim tupela anda pens na em i laikim olsem na em i kisim i go long baim. Tasol Kanage i tanim anda pens ya na prais bilong tupela pens ya i slip apsait daun. Meri long stua i laik paitim prais bilong anda pens tasol em i no lukim gut olsem na em i askim Kanage long tanim pens na em bai lukim prais na paitim long til. Tasol Kanage i no harim gut toktok bilong em. Olsem na meri i tokim em gen, tanim pens na bai mi lukim gut prais. Taim Kanage harim olsem em i tokim meri ya, yu ting yu inap. Aste tasol mi kam long ples ya. Yu bai traime i go na yu bai ino inap. Bikos mi em kristen man ya. Ol manmeri long stua i harim na ol i lap nogut tru. Kanage i lukim ol manmeri i lap nogut long em na em lusim tupela anda pens long stua na ronawe i go ausait olgeta.

ULA CLEMENT KIUNGA

■ Kanage em wanpela gutpela wokman tru bilong Westpac benk long Mosbi. Em i save wok olsem ti boi na klina bilong oois. Olgeta wokman i save laikim em tru bikos em i save mekim gutpela wok tru. Wanpela Kanage i spak long nait na long moning, em i go leit long wok. Kanage i sem olsem na em i go long beksait dua na i laik go insait. Taim em i opim beksait dua, bos i lukim em stret na kirap nogut na askim em, Kanage, why are you late. Are you sick?. Na Kanage tok, no Im not from Sepik. Bos harim na paul na askim em, Are you okay?. Tasol Kanage tok, very close, Im from Okapa. Bos harim na les long askim moa kwesten na larim Kanage i go mekim wok bilong em.

R CHANIS



KANAGE



WAIGANI

■ Kanage i bilong Saidor long Madang na em i gat tupela pikinini Patrick na Grace. Wanpela taim ol lain bilong meri askim em long baim pe bilong meri. Kanage harim na bel kaskas stret na i go insait long haus nokim meri bilong em nogut tru na em hap dai. Taim ol lain bilong meri harim ol i kam gen na nokim Kanage long mak bilong matmat stret. Olsem na viles kot mejistret i kirap na stretim toktok bilong ol. Em nau Kanage i tok, taim mitpela i pret yet, watpo yupela ino laik askim long pe? Nau yupela i wet inap pikinini i kamap na yupela i laik kisim pe long meri na kisim profit long pikinini wantaim. Tasol mejistret i tok, em i lo bilong tumbuna long baim meri olsem na yu mas baim yet. Kanage harim olsem na belhat na tokim ol lain tambu, yupela kisim pikinini meri bilong yupela na go wetim mi. Bihain mi gat mani ora't bai mi kam baim. Em tok olsem na tekov i go long haus pulapim kago bilong er. na tekov i go olgeta long ples bilong em.

SAILAS FEWAT MADANG

■ Wanpela taim Kanage i raun long Kimbe taun long wiken na lukim wanpela yangpela skul meri bilong Kimbe Hai Skul na saitim em. Meri ya i lukim Kanage i saitim em na em askim, yu laikim wanem samting?. Na Kanage bekim, inap mi wok long opis bilong yu o nogat?. Meri ya i kismi mining bilong toktok gut na em bekim, sori

nogat wok. I gat spes tasol long ol jenerel menesa i aplai. Kanage i nogat tok na save olsem edukesen bilong em i no inap long jenerel menesa olsem na em lus nating long Kimbe taun.

ADAM JING KIMBE

■ Kanage i wanpela bikman bilong ples long Bogia. Em i save pait long kamapim skul long ples bilong em na wanpela taim edukesen dipatmen i wanbel na ol i statim nupela

skul long ples. Kanage i go kisim skul inspekta i kam na ol i opim skul. Long opim skul, Kanage i mekim toktok, mi wanpela gret 6 man na skul i no wansait long salim mi go long hai skul bikos save bilong mi em midium. Em nau Kanage givim liklik hap tok Inglis gen, what for this opisa here open this school?. Ol manmeri long ples i harim na ol i paul. Olsem na Kanage i tanim gen long tok pisin, wanem as na dispela skul i op?. Wanpela lapun long ples i sindaun na skelim mining bilong dispela tok tok na em bekim, yes, as bilong skul i op bai yumi subim ol pikinini i go insait, em tasol.

HUGO CONUINE BOGIA

■ Bikpela brata bilong Kanage i dai em na Kanage kisim balus na go pundaun long ples na krai nogut tru. Em i krai i go na em tok, sori brata, mama i karim yu pas na bihain ger: mi karim mi gen. Olgeta samting papa i planim na groim bilong mitupela bai mi bai papa bilong yu. Olgeta manmeri i harim na lap i kilim ol nogut tru long bruk bruk tokpisin bilong Kanage.

IPISSI RUP VANIMO

■ Kanage i bilong Sepik na nau em i stap long Kamkumu - Lae na em i save wok long Namalu Coffee. Wanpela avinun em i go wetim ka bilong pik ap tasol ka i no kam hariap, em stap i go 4 kilok na ka i kam pikim em. Taim em pinis wok na kam bek long nait na meri bilong

em i askim em wanem taim tru ka i pikim yu. Em kirap na tokim em, I've been at the road at 4 kilok and until 2 kilok I was pick up. Meri bilong em harim i no stret na askim. Kanage taim i save rives ah, Kaange kirap nogut na tok em samting bilong kilok yet i wokman taim ya.

Eddie Leo LAE

■ Kanage i bilong Wes Kos bilong Wewak. Em go salim tupela bek kopra long Wewak taun. Na em spak longlong na go long ples long ka. Taim ka i lusim em arere long haus em stat singsing Yambunawi meri bilong em i harim em i singaut strong oi oi oi ol moni we ol moni. Kanage i stop na singaut strong what you want, I the give you the money or you the gerout you the doing nothing for ever amen. Meri bilong em ken i tok aiomanaio you the school or I the school, you home leaver. Taim Kanage harim em belhat tru na tok a you stupuk girl, you Father is a frog, he died like a frog na nau em stap amamas wantaim frog, yu no save a?

Niawave Leo WEWAK

■ Kanage i bilong Enga, planti boskru bilong sip MV Rita i save gut long em. Long Fraide Kanage kisim sip MV Rita i go long Wewak. Sarere moning ol kamap long Wewak, taim ol i go klostu long bris kepten i tokim ol boskru olsem, ol boskru, yupela tromoi enaka i go daun. Ol boskru kirap holim pas trangu Kanage na tromoei em i go daun long solwara. Kepten i no tokim ol long tromoi man enaka Kanage. Nogat Kepten i tok long Enga tru bilong sip. Rong pinis Kanage i go daun olgeta long solwara. Kot bilong Kanage i paul, kepten o boskru.

Benny Lemot ANGORAM

■ Long las mun Septemba Kanage lusim bikples Madang na kisim sip i go long KRX ailan, em i

go spenim indipendense wiken wantaim poroman bilong em long ples Kurum. Orait taim Kanage wantaim poroman bilong em stori long haus i stap na papa bilong poro bilong em tokim tupela olsem, nau avinun bai yumi amamasim indipendens pati, olsem na bai yu tupela i wetim ol pik long avinun. Taim ol kam bek long ples. Orait bai yutupela holim wanpela pikman, orait tupela wet i go na long 7 kilok ol pik i kam long ples na yu save Kanage i no werim trausis, em pasim laplap na em i no werim liklik anda pens, orait poro bilong em wok long brukim drai kokonas na wok long givim ol pik, na Kanage i redi long kalap antap long pik. Taim pik i kam klostu Kanage i kalap na silip antap long pik na holimpas tupela yau bilong pik, orait taim pik i krai, papa bilong poro bilong em i singaut sekim. Pik man o pik meri, na yu save em tudak pinis, orait poro bilong em i laik sekim na suvim han i go, em tasim stret wil bilong Kanage, na poro bilong em tokim papa bilong em olsem em pik man. Na papa singaut ken, sekim gut nogut pikmeri? Na namba tu taim em pusim han i go em pinim wil bilong Kanage nogut tru na Kanage guria nogut tru na lusim pik na pik tek op i go long bus.

Peter Bewa MADANG

■ Kanage em bilong Vanimo, Sandaun provins. Wanpela taim em i go wok long moning na em bagarap tru long smok. Na em go askim bos bilong em wanpela kong kong. Em i askim em, bos whats your name, na bos i tok John, na em laik tok what is your other name? Tasol maus i karangi liklik na em i tok, your other name are who? Na bos i tok Wong. Orait em i laik askim em long smok. Em laik tok can you give me one sigaret, tasol maus i karangi yet na em i tok can you give me one sigaret for my me, bos lap indai stret na kisim sigaret na givim long em, Kanage isi tasol kisim smoke na lus nating long bos bilong em na go insait long ples bilong wok. Bikos em tromoi rong Inglis long bos bilong em.

Texas Pes Nogus AITAPE

■ Kanage em wanpela o brata insait long ples Yeropina hap long Sauten Hailens. Wanpela taim long monin Kanage wantaim meri bilong em Aliwia-takato tupela i go long gaden. Namel long rot ol i singaut na i tok "kasen bilong Kanage idai, Aii-ee papa-ah, Epenekomena yah? Plis kasen bilong husat yah? I tru "o" giaman? Kanage kwik taim em i tainim na givim sikti na meri bilong en tu i bihainim em. Kanage putim lek antap long graun i wel nogut tru na em i pundaun karangi na planim sotpela nus bilong em long graun malmalo, na em i kisim taim nogut! Meri bilong en i sori na askim em" olsem wanem Kanage? Nogut! Mi sori long kasen yah na rapim graun malmalo long pes tasol. I no long taim tupela i kam kamap long haus krai. Kanage i no givim senis long ol, ma-an em singaut nogut tru na kari. Em i bisi long krai na em i no lukim sem bilong en i hangamap long bruk trausis bilong en. Ol meri i lukim dispela na i start pingarim naapela narapela. Ma-an meri bilong en i lukim dispela na i sem stret, na i painim hat long tokim en, olsem na i painim sampela adia i go nau! Na i tok "o" ee-ee hangamap i stap! Tasol em i leit pinis long haitim sem bilong en, olsem na em i bekim krai bilong meri bilong en" na i tok, ee-ee larim em hangamap "o" ee-ee larim em hangamap "o". Meri bilong en i harim dispela na i bel hat nogut tru na i tekop i go long haus.

Benjamin Ckosnugzsy POT MOSBI



Nem: Silla Mokai
 Krismas: 18 (meri)
 Adres: Mt Kamund CRC Church, PO. Box 1757, Mt Hagen - WHP.
 Save laikim: Mi save fromoi hook long wara na danis.

Nem: Ellis Tepra
 Krismas: 20 (meri)
 Adres: PO. Box 1757, Mt Hagen - WHP.
 Save laikim: Pilai gita na singim lotu singsing.

Nem: Jacob Makop
 Krismas: 20 (man)
 Adres: PO. Box 1757, Mt Hagen - WHP.
 Save laikim: Ritim baibel na harim gospel singsing.

Nem: John Pati
 Krismas: 19 (man)
 Adres: PO. Box 1757, Mt Hagen - WHP.
 Save laikim: Pilai ragbi tas, pilai volibol na swim long wara.

Nem: Wakson Rose
 Krismas: 20 (man)
 Adres: PO. Box 1757, Mt Hagen - WHP.
 Save laikim: Tok pilai na lukim EMTV.

Nem: David Lo
 Krismas: 18 (man)
 Adres: PO. Box 1757, Mt Hagen - WHP.
 Save laikim: Pilai basketbal na skulim Sande skul pikinini.

Nem: Lydia Thomas
 Krismas: 19 (meri)
 Adres: PO. Box 283, Buka Island, North Solomon Provinces.
 Save laikim: Pilai basketbal, volibol, ritim buk na tok pilai.

Nem: Francis Kusom
 Krismas: 17 (man)
 Adres: Mora Mopa Technical School, PO. Box 23, Hoskins, WNPB.
 Save laikim: Pilai spots, harim musik, serim samting wantaim ol poroman, tokpilai nambaut, lukim pepsy fizzes, ritim pas na go long haus long wiken taim.

Nem: Charlie John
 Krismas: 18 (man)
 Adres: Mora Mopa Technical School, PO. Box 23, Hoskins, WNPB.
 Save laikim: Pilai spots, harim musik, kisim potu, mekim pani wantaim ol soul mates na go piknik.

Nem: Benedict Sevi
 Krismas: 19 (man)
 Adres: Mora Mopa Technical School, PO. Box 23, Hoskins, WNPB.
 Save laikim: Tolpilai, raitim leta, lukim TV na harim musik.

Nem: Cletus Ageno
 Krismas: 25 (man)
 Adres: Polilamba Pty Ltd, Kamiramba Division, PO. Box 46, Kavieng, NIP.
 Save laikim: Go lotu long Sarere, harim ol lotu singsing o gospel musik. Ritim ol lotu buks, harim reclo na televisen nius na niuspepa na raitim pas.

Nem: Jerry Kane Suba
 Krismas: 20 (man)
 Adres: Maina Gol Trading, PO. Box 531: PH: 723426, Goroka, EHP.
 Save laikim: Ritim niuspepa, raun wantaim pren na stori nabaut, was long vidio. Na laik tru long pilai volibol.

Nem: Warea Nabato
 Krismas: 28 (man)
 Adres: CI- PO. Box 458, Kimbe, WNPB.
 Save laikim: Wok long sekyuriti, go long lotu na tok pilai stori wantaim ol yangpela man-meri na tu wan wan taim wantaim ol lapun meri.

Nem: Peter Koiyo
 Krismas: 28 (man)
 Adres: C/- Numndo Plantation, PO. Box 438, Kimbe, WNPB.
 Save laikim: Raun long rot, singim song, go long lotu, ritim baibel, pilaim gita, raitim pas long ol wantok.

Nem: Luke Ruka
 Krismas: 19 (man)
 Adres: C/- Numndo Plantation, PO. Box 438, Kimbe, WNPB.
 Save laikim: Pilaim gita, harim ol pop musik, ritim ol niuspepa.

Wanpela wail man i kamapim klen



LONG bipo tru i gat wanpela wail man i save stap long hul bilong diwai. Wanpela taim ol man long ples Kudjip laik go painim wail pik na kapul long bus ol i lukim dispela wail man. Em i ronawe tasol ol i hait long rot bilong em na holim em.

Taim ol i lukluk insait long hul bilong diwai, gras bilong kapul i pulap insait wantaim ol kaikai we em i haitim i stap. Dispela em long ol nupela kapul. Ol i painim baga man ya na kisim baga em i kam long ples. Ol i go long bes na wokim bikpela paia na kukim kapul. Tuhat bilong paia i kisim em na em silip i dai olgeta. Bihain ol rausim na givim wail man na em i habusim taro wantaim long en. Em i pilim wit moa.

Bihain ol i kisim man ya i go daun long ples Kudjip na givim em wanpela meri long maritim.

Wail man ya em i no save long toktok so ol wokim aksen tasol long em long tokim em olsem dispela em meri bilong em. Ol i tokim em tu olsem meri ya bai kuk bilong tupela i stap na karim pikinini

Tupela i stap i go na tupela i karim foapela pikinini boi. Dispela ol mangi nem bilong ol em namba 1 ol i kolim long Komenka, namba 2 em Akila, namba tri em Konts na namba foa em Aika

Ol dispela mangi i stap i go na



ol i wok long krosim namba 3 manki, Konts. Tasol em i tok yumi ol brata ya. Yupela i wok long wokim kain nogut pasin long mi olgeta taim. Mi mas i go stap longwe long yupela. Na em em tekop long i go long Jimi.

Tripela tasol i stap na ol i marit. Ol i karim pikinini na ol dispela pikinini meri ya i karim moa pikinini en na ol i wokim moa mak long namba bilong famili. I no longtaim ol i kamapim wanpela klen o wanpisin. Klen ya i gat 3-pela wanpisin long en. Namba tri boi em kamapim narapela wanpisin bilong em yet long Jimi eria we i gat Kurumul ti long en.

Na dispela klen nem em Kissu.

Bul Bal Tony long Kurumul Tea eria insait long Westen Hailans provins i raitim.

Kasen bilong mi gat wari na i laikim helpim



Dia Laiplain,
 Inap yu helpim kasen bilong mi? Mi wok long was long en bikos em i raun wantaim wanpela meri we famili i no laikim. Meri ya i bilong wanpela ples klostu long mipela tasol nau mipela i stap long taun.

Meri we kasen bilong mi raun wantaim nau i bin marit pas-taim. Tasol man bilong en em i usim em bihain long em i painimaut olsem em i save slip wantaim narapela man. Tasol nau yet em i save lukim fes man bilong em.

Taim meri ya i nogat mani, em i save kam na slip wantaim kasen. Bihain em i save go bek long olupela man bilong en.

Kasen ya i gat tripela gelpren na em i gat narapela gel long ples. Mi no klia watpo em i laik prenim dispela rabis meri. Ol papamama bilong meri ya i

laikim bai pikinini bilong ol i maritim kasen tasol ol lain bilong kasen i egensim meri.

Inap yu givim sampela gutpela stia toktok long dispela samting?

Upset

Dia Pren,

Mipela i no nap tumas long wokim samting long helpim kasen bilong yu olsem yu askim long pas. Kasen bilong yu tasol i ken luksave long situesen bilong em na sampela taim, em i no nap long lukim dispela long wankain ai olsem yu tokim mipela long en. Olsem na mipela i no nap tokaut long wanem samting em i ken mekim.

Tasol long pasin kastam bilong Melanesia, marit em i wanpela samting we famili na hauslain i go insait long en. Olsem na wari long kasen bilong yu em i wari bilong yu tu. Bai mipela i givim yu sampela tingting we mipela i ting olsem bai helpim yu mekim disisen bilong yu.

Marit em i bikpela samting na yangpela man na meri i mas mekim bikpela disisen long futja laip patna bilong ol. Em i wanpela disisen we bai i bosim laip bilong man na meri. Ol yangpela wantaim inap tingting bai i wokim disisen long marit bihain long ol i glasim na skelim ol wok ol i gat na

we ol bai i mekim long marit laip.

Long gat gutpela marit laip, tupela marit i mas laikim na gat luksave long wanpela arapela. Bai marit i wok gut moa sapos ol famili bilong tupela i laikim na luksave long wanpela arapela.

Long pas bilong yu, i luk olsem yu no gat luksave long meri kasen bilong yu i prenim. Sapos meri ya i gat dispela pasin we yu tokaut long en long pas bilong yu, pasin bilong em i no gutpela. Tasol mipela i no klia sapos yu save gut long en. Ating yu wok long harim tasol toktok bilong ol arapela, ol nogut samting we i no tru?

I luk olsem kasen bilong yu i laikim meri ya na em i mas save gut long en. Yumi mas luksave long olgeta man na meri olsem ol i gat gutpela sait, wankain wantaim dispela meri.

Mipela i askim tu sapos wankain toktok i ken go long kasen bilong yu. Sapos em i save amamas long kisim na slip wantaim meri ya taim em i kam long en na bihain go bek long olupela man bilong em, i luk olsem kasen bilong yu i no wari long pasin bilong slip wantaim meri. Tru meri i ken selfis o laik amamasim em yet sapos em i kam long kasen bilong yu long mani tasol i luk olsem em (kasen) tu i wokim wankain pasin sapos em i wok long raun wantaim ol arapela

meri long taun na em i gat nara-pela long ples.

Yu tok olsem famili bilong meri i laikim tupela long marit tasol sait long kasen bilong yu tasol i no wanbel. Yu givim sampela tingting tu olsem sapos kasen bilong yu i laik maritim wanpela gutpela meri, papamama bilong em i ken no laikim yu?

Sapos tupela ya i luksave long pasin bilong wanpela na ol i wanbel long en, i luk olsem ol bai i gat gutpela marit. Tasol yu ken toktok isis long kasen na autim wari bilong yu long dispela samting, watpo yu ting olsem em i wokim mistek long laik maritim dispela meri. Tasol yu mas was gut taim yu toktok long meri na noken mekim ol nogut toktok bikos nogut yu hatim bel bilong em (kasen) na em bai no nap harim samting yu laik tokim em.

Inap yu poinim long em olsem laik bilong em long maritim meri ya i afektim famili na i moabeta long em i harim gut tok bilong papamama. Yu ken traime na helpim em long luksave na soim rispek long ol meri olsem ol pipel na i no long yusim ol tasol long amamasim em yet.


Tasol sapos em i no wanbel wantaim yu na maritim meri ya, inap yu lus tingting long ol pasin bilong em pastaim na pinis long egensim em. Yumi olgeta i save wokim asua na yumi wan wari i laikim helpim long daunim ol rong



Bik Bro REBO



IGO MOA NEKS WIK!



SIPAK MAIKY



IGO MOA NEKS WIK!



Pablik Notis

Kopi Industri insait long Papua Niugini em i wanpela bikpela industri ausait long maining eria we i save kisim moa mani i kam insait long kantri. Em i save givim wok na mani long moa long tu milion pipel bilong kantri. Kopi Industri bai i stap yet bihain long laip bilong olgeta main i pinis.

Kopi Industri Koporesen i amamas long tokaut i go long ol pipel bilong PNG olsem long 1998 kopi sisen (em long Oktoba 1997 i go inap Septemba 1998), PNG i salim 1.2 milion bek kopi o 72,000 ton bilong kopi. Dispela i soim olsem namba bilong kopi PNG i salim i go antap long 11 pesen moa long 1996 na 1997 kopi sisen. **Wanpela bikpela samting moa i olsem dispela em i bikpela level tru insait long rekot** bilong Kopi Industri bilong salim kopi long 1988 na 1989. Long dispela taim Kopi i salim 1.3 milion bek tasol mipela i no bilip tumas long rekot bilong dispela.

Long sait bilong mani, industri i kisim klostu K410 milion i kam insait long kantri long salim kopi tasol. Dispela i olsem K94 milion o 30 pesen moa long mani industri i kisim long 1996 na 1997.

I no bin gat ol bikpela hevi tu long sait bilong kwaliti bilong kopi long dispela taim. Ol lain bilong mipela husat i save baim kopi long ovasis i tok ol i amamas long kwaliti bilong kopi ol i save baim long PNG na gutpela ol kontrak wok bilong salim kopi i go long ol.

Na tu, industri i baim K31.2 milion i go long Nesenel Gavman long bekim dinau bilong Kopi Prais Sapot Lon. Koporesen i tingting long bekim narapela K16 milion long Disem a 1998. Dispela bai bringim dinau i go daun long K56 milion long pinis bilong dispela yia.

Ol Bod na Menesmen bilong Koporesen i laik tenkim na amamasim ol kopi groa, prosesa na lain i save salim kopi insait long kantri long hatwok bilong ol long kopi sisen. Ol groa bilong mipela i go het long kamapim kopi maski El Nino i kamapim bikpela san long 1997, wanpela bikpela disasta long kantri bihain long 50 yia. Em i soim olsem ol kopi groa bilong mipela, em ol manmeri bilong wok husat i ken sanap agensim taim nogut. Na kain ol taim nogut we mipela i no kolim tu kain olsem i nogat gutpela rot, bris, ples balus bilong kisim kopi bilong ol i go long maket na salim, na hevi bilong lo na oda i bagarap insait long ol ples. Ol kopi groa i no sindaun nating na wet long kisim samting fri. **Nogat. Ol i kamapim mani bilong ol yet na bilong kantri. Tenkyu ol kopi groa bilong PNG!**

Koporesen i amamas long tokaut tu olsem namba bilong ol pipel i gat laik long planim kopi long ol provins we i no bin stap antap i wok long go antap. Dispela ol provins em long Sentrel, Milin Be, Niu Ailan, na Oro. I no long taim i go pinis Sandaun Provins tu i soim bikpela laik long go insait long kopi bisnis, we Gavana bilong ol yet i tokaut olsem em bai sapotim kopi bisnis long provins. I no longtaim i go pinis, Gavana

bilong Enga i putim K1 milion i go long kopi na kadamon developmen insait long provins bilong em. Koporesen i go het na paitim toktok wantaim ol arapela Gavman long wanem kain rot ol i ken developim kopi long wan wan provins.


Kopi prodaksen long Is Sepik i kamap gut tru insait long las tupela yia. Las yia, prodaksen long dispela provins i go antap long 35 pesen moa long yia i go pinis. Dispela i mekim Is Sepik Provins i kamap olsem namba foa bikpela provins bihain long Westen Hailens, Isten Hailens na Simbu Provins. Dispela provins nau i gat foapela mil ol i rejisterim pinis bilong prosesim kopi. Resis namel long ol dispela mil bilong prosesim kopi i ken kamapim gutpela prais bilong kopi tude na i no olsem bipo we ol i save kisim. Ol groa long Sentrel na Oro provins i mas hop tu long kisim gutpela prais nau bihain long ol i wokim tupela nupela kopi fektori long namba wan taim insait long dispela tupela provins. Koporesen i sekim ol dispela fektori na i amamas long ol na olsem ol i ken statim wok bilong ol long Januari 1999. Ol groa long ol provins klostu long dispela tupela provins i ken kisim helpim long dispela tupela fektori.

Koporesen i laik askim ol Provins Gavman bilong ol Provins antap long go het wantaim gutpela wok ol i statim pinis. Ol kopi groa long provins bilong yupela i redi long wok. Sapos i gat gutpela rot, bris, ples balus na sapos yupela i daunim hevi bilong lo na oda, ol kopi groa long provins bilong yupela inap bringim moa mani i go insait long lokol komyuniti bilong ol. Na dispela i ken min tu olsem ol inap bringim moa mani i go insait long provinsel baset bilong yupela insait long Derivesen Grant long Nesenel Gavman.

Kopi Industri Koporesen i pasim tingting long lukautim dispela industri wantaim pasin bilong givim ekstensen edvais na dinau mani i go long ol groa. Wantaim dispela, Koporesen bai sapotim ol groa wantaim ol saveman bilong mekim wok painim aut long ol kwaliti na sik bilong kopi long olgeta level bilong maket insait long kantri na tu promotim kopi bilong PNG long ovasis. Koporesen i gat bikpela wok long lukim olsem ol kopi groa bilong PNG i kisim gutpela prais insait long wol maket prais, insait senis bilong Kina wantaim mani bilong ol arapela kantri long kain ol samting olsem. Taim yumi lukluk i go het long narapela sisen long neks yia, sapos yu wanpela kopi groa, mipela i askim yu long amamas long yu yet na go het long mekim gutpela wok bilong yu. Yu ken stap laip long strong bilong yu yet. Yu wanpela man o meri bilong wok. Yu gat gutpela wok.

Tingim: **Yu Lukautim Kopi Na Kopi Bai Lukautim Yu.**

**PUGMA KOPI
PNG CIC BOD SIAMAN**



Lek i plai long netbal



■ Wing atek bilong Coca Cola i banisim gut birua bilong em na rausim ball long em. Coca Cola i bin pilaim Steamships insait long Praivet Kampani netbal resis long Mosbi. Dispela wiken bai lukim ol las gem long raun wan.



■ Antap lephan: Golkipa bilong Yunivesiti i sevim gutpela kik bilong Blu Kumul las wiken. Yuni win 3-1.

■ Antap raithan: Spika bilong Nesenel Palamen John Pundari wantaim Placer Team One husat i winim Speaker's Golf Cup salens long las wik.

■ Raithan: Spika bilong Palamen John Pundari i masta mak long golf tonamen bilong em long Pot Mosbi golf klap las Fraide.

■ Aninit: Mama was gut long han bilong yu. Em i taim bilong soka na i no tas ragbi. Dispela kain stail i save kukim stret EPC tonamen ya.

Ol poto: BAE KIMALI





Wiken Spots Dro

EPC LADDER								
MEN								
Pool A	P	W	D	L	F	Agt	Pts	Ptn
Baniara	4	1	0	3	5	11	2	6th
LSC Gold	3	1	1	1	1	1	3	5th
Hikabo	4	2	1	1	9	3	5	2nd
Gordons Utd	3	2	0	1	6	2	4	3rd
G/Youth 2	4	0	0	4	0	13	0	7th
Gaina One	4	3	0	1	10	5	6	1st
Simla 1	2	2	0	0	5	2	4	4th
Pool B								
Kuhoma	3	0	0	3	1	2	7	7th
Suau United 23	1	0	2	5	10	2	6th	
Anuki	4	2	0	2	7	7	3	3rd
Torabwaga 1	4	4	0	0	15	4	8	1st
Defence MB	3	1	1	1	4	4	3	4th
Mix Mates	4	2	1	1	6	3	5	2nd
Duau	3	1	0	2	3	6	2	5th
Pool C								
Baniara Pom	4	1	0	3	1	9	2	7th
Tawala	3	1	2	0	4	1	4	3rd
Suau United 14	0	2	2	2	7	2	6th	
Ambo	3	1	0	2	2	2	2	5th
Agaun	4	2	1	1	4	2	5	2nd
Dodoegu	3	1	1	1	6	1	3	4th
Cellnet	4	2	2	0	5	1	6	1st
Pool D								
Galea 2	4	2	0	2	7	6	4	3rd
Simla 2	3	1	0	2	1	4	2	6th
ECR	4	2	1	1	4	3	5	1st
Torabwaga 2	4	2	0	2	5	4	4	3rd
Maiwa	4	1	1	2	1	7	3	4th
Yabwau	2	2	0	0	9	2	4	2nd
Kula	3	1	0	2	1	3	2	5th
Pool E								
Yawala	3	1	2	0	2	0	4	2nd
G/Youth 1	2	1	1	0	3	1	3	5th
Kabutuvalu	3	1	2	0	3	1	4	3rd
LSC Silver	5	0	2	3	1	6	2	6th
Tamarox 2	3	0	1	2	1	7	1	7th
Cape Vogel	4	2	2	0	6	0	6	1st
Koigebu	4	2	0	2	2	3	4	4th
Pool F								
Uni Mills	1	0	0	1	0	1	0	7th
CYF	4	0	3	1	0	2	3	4th
Oyabia	2	2	0	0	3	0	4	3rd
Gowadu	4	0	2	3	1	3	2	5th
Suau East	3	0	1	2	1	9	1	6th
Lagimu	4	3	1	0	8	0	7	1st
Nim	4	2	1	1	3	1	5	2nd
Pool G								
Badili Bros 2	2	1	0	1	1	2	2	4th
Wagu	2	1	0	1	1	3	2	5th
Nibu Baewa	4	2	0	2	6	4	4	3rd
North Kiriwina	3	3	0	0	6	3	6	1st
Naniu	4	2	0	2	7	6	4	2nd
Kutu	3	1	0	2	2	4	2	6th
North East	4	1	0	3	3	6	2	7th
Pool H								
POMIC	3	0	0	4	1	7	0	7th
Badili Bros 1	4	4	0	0	13	1	8	1st
Ohai haba	4	3	0	1	6	3	6	2nd
Tamarox 1	4	0	2	2	0	4	2	5th
S/Saeas	4	2	1	1	6	3	5	3rd
Collin Woods	2	1	0	1	2	3	2	4th
Lavahi	3	0	1	2	0	6	1	6th
WOMEN								
Pool A								
LSC	2	1	1	0	2	0	3	3rd
Bodoegu	3	2	1	0	5	0	5	1st
Gordons Youth	4	1	3	0	2	1	5	2nd
City Strikers	1	0	1	0	1	1	1	4th
Pool B								
Cape Vogel	2	1	0	1	2	2	2	4th
CYF	2	1	0	1	1	1	2	3rd
Badili Sisters	1	1	0	0	1	0	2	2nd
Suau United	1	0	0	1	0	1	0	6th
Kula	3	1	1	1	2	2	3	1st
Tawala	1	0	1	0	0	0	1	5th
Pool C								
Nim	3	1	2	0	4	1	4	1st

Torabwaga	2	1	1	0	1	1	3	2nd
Kabuluvalu	2	0	2	0	1	1	2	4th
Gerehu Youth	0	0	0	0	0	0	0	6th
Tamarox	4	0	1	2	0	5	1	5th
Naniu	1	1	0	0	2	0	2	3rd
Pool D								
Mix Mates	2	1	1	0	1	0	3	1st
Yawala	2	0	0	2	0	2	0	4th
Cellnet	2	1	1	0	1	0	3	1st
Galea	2	0	2	0	0	0	2	2nd
Kuboma	2	2	0	0	3	1	0	3rd

CENTRAL CUP SOCCER TOURNAMENT
OFFICIAL PROGRAMME
 Monday November 30 - December 4, 1998.
 PMSA - Bisini Soccer Park

9am: Official Opening
 Team parade with uniform
 PMSA: President - welcome message
 Provincial Government: Rep
 MP: Finance Hon: D. Yagabo

11.00 B1	Babaka vs Keapara 1
11.00 B2	Kamali vs Alukuni
12.00 B1	Gemo vs Moukele Gume
12.00 B2	Bau-Futz vs EPC Seniors
1.00 B1	Amazon Bay vs PMSA D Squad
1.00 B2	Moukele Aloau vs KK B United
2.00 B1	Makirupu vs Keapara 2
2.00 B2	Koupa vs Karawa
3.00 B1	Bao-Mitas vs Eregabi
3.00 B2	Dobo Murika vs Oro village
4.00 B1	EPCJ vs Muiah
4.00 B2	Sunset v Veama

Tuesday December 1, 1998.

8.00 B1	Gemo vs Amazon Bay
8.00 B2	Kamali vs EPC Seniors
9.00 B1	Keapara 1 vs PMSA
9.00 B2	Alukuni vs KKB United
10.00 B1	Babaka vs Moukele Gume
10.00 B2	Bau-Futz vs Moukele Aloau
11.00 B1	Makirupu vs Eregabi
11.00 B2	Koupa vs Oro village
12.00 B1	Keapara 2 vs Muiah
12.00 B2	Karawa vs Sunset
1.00 B1	Bao-Mitas vs EPCJ
1.00 B2	Dobo-Murika vs Veama
2.00 B1	Babaka vs PMSA
2.00 B2	Kamali vs KK B United
3.00 B1	Amazon Bay vs Moukele Gume
3.00 B2	EPC Seniors vs Moukele Aloau
4.00 B1	Keapara 1 vs Gen
4.00 B2	Alukuni vs Bau-Futz

Wednesday December 2, 1998.

8.00 B1	Makirupu vs Muiah
8.00 B2	Koupa vs Sunset
9.00 B1	Eregabi vs EPCJ
9.00 B2	Karawa vs Dobo-Murika
10.00 B1	Keapara 2 vs Bao-Mitas
10.00 B2	Oro village vs Veama
11.00 B1	Babaka vs Amazon Bay
11.00 B2	KKB United vs Bau-Futz
12.00 B1	PMSA vs Gemo
12.00 B2	EPCS vs Alukuni
1.00 B1	Keapara 1 vs Moukele Gume
1.00 B2	Kamali vs Moukele Aloau
2.00 B1	Makirupu vs EPCJ
2.00 B2	Koupa vs Veama
3.00 B1	Muiah vs Bao-Mitas
3.00 B2	Sunset vs Dobo-Murika
4.00 B1	Eregabi vs Keapara 2
4.00 B2	Oro village vs Karawa

Thursday December 3, 1998.

8.00 B1	Amazon Bay vs Keapara 1
8.00 B2	Kamali vs Bau-Futz
9.00 B1	Babaka vs Gemo
9.00 B2	Alukuni vs Moukele Aloau
10.00 B1	PMSA vs Moukele Gume
10.00 B2	KKB Utd vs EPC Seniors
11.00 B1	Makirupu vs Bao-Mitas
11.00 B2	Koupa vs Dobo-Murika

12.00 B1	EPCJ vs Keapara 2
12.00 B2	Karawa vs Veama
1.00 B1	Muiah vs Eregabi
1.00 B2	Sunset vs Oro village

First Knockout Top 4 in each pool
 3.00 B1 Winner of P1 No. 1 vs Winner P2 No. 4 (G1)
 3.00 B2 Winner of P1 No. 2 vs Winner of P2 No. 3 (G2)

Friday December 4, 1998.
 4.00 B1 Winner of P1 No. 3 vs Winner of P2 No. 2 (G3)
 4.00 B2 Winner of P1 No. 4 vs Winner of P2 No. 1 (G4)

Quarter Finals

11.00 B1	Winner of Game 1 vs Winner of G2 (G9)
11.00 B2	Winner of Game 3 vs Winner of G4 (G10)
12.00 B1	Winner of Game 5 vs Winner of G6 (G11)
12.00 B2	Winner of Game 7 vs Winner of G8 (G12)

Semi Finals

1.30 B1	Winner of G9 vs Winner of G10
1.30 B2	Winner of G11 vs Winner of G12

3.00 B1 Losers Finals For 3/4
3.00 B2 Winners Finals For 1/2
5.00 Official Presentation

PMSA SOCCER GRAND FINAL
 Saturday, November 28, 1998.

Bisini Two

9.00 U19	Telikom vs ICF Uni
11.00 W1	Telikom vs ICF Uni
1.00 P/Reserve	Rapatona vs ICF Uni
3.00 First	Cosmos vs Coecon Ela Utd

Sunday, November 29, 1998.

Bisini 2

10.00 W2	WM1 Togelu vs Cyclone
12.00 Second	Bau-Futz vs YM 2

2.00 Entertainment Dancing Group
 (Sivitana) Village
 Tarangau Pipe Band

3.00 Premier Rapatona vs ICF Uni
5.00 Official Presentation

PEPSI NCD PUBLIC SERVANTS SOCCER
 Saturday November 24, 1998.
 Week Two

UPNG TOA 1:

08.30 M1	Works vs Harbours
09.50 W1	NBC vs Harbours
10.50 M2	Police vs ICPNG
12.10 W2	ICPNG vs Fisheries
13.10 M1	PMGH vs BPNG
14.30 W1	DAL vs Diwai
15.30 W1	Dwai vs IRC

UPNG TOA 2:

08.30 M2	A/General vs Elcom
09.50 W2	Commerce vs Elcom
10.50 M1	Air Niugini vs NPF
12.10 W1	Air Niugini vs DCA
13.10 M2	Health vs Fisheries
14.30 W2	Health vs A/General
15.30 M1	DAL vs NBC

Byes: DCA (M1) and Cellnet (M2)
Sunday, November 29, 1998.

UPNG TOA 1:

08.30 M1	NCDC vs Teachers
09.50 W1	NCDC vs Transport
10.50 W2	PNGBC vs IRC
12.10 M2	Transport vs Defence
13.10 W1	Education vs Teachers
14.30 W2	NSO vs BPNG
15.30 M1	Education vs NSO

UPNG TOA 2:

08.30 M2	Commerce vs PNGBC
09.50 W1	NPF vs Defence
10.50 W2	NCC vs Cellnet
12.10 M2	POSF vs NCC
13.10 W1	UPNG vs Telikom
14.30 W2	PMGH vs POSF
15.30 M1	UPNG vs Telikom

Byes: Works (W1) and Police (W2)

GORDONS TOUCH
ROUND EIGHT
 Saturday November 28, 1998.

"C" Grade

8.00	Warriors vs Bulldogs
8.40	Dragons vs Panthers
9.20	Magpies vs Lae Biscuit Heelers
10.00	Raiders vs Eagles
10.40	Eels vs Rabbits

"B" Grade

11.20	Tigers vs Sharks
12.10	Magpies vs Lae Biscuit Heelers
13.00	Warriors vs Bulldogs

"A" Grade

13.50	Dragons vs Panthers
15.00	Storms vs Steelers
16.10	Rabbits vs Eels

Sunday November 29, 1998.

"C" Grade

8.00	Storms vs Steelers
8.40	Sharks vs Tigers

"B" Grade

9.20	Panthers vs Dragons
10.10	Storms vs Steelers
11.00	Raiders vs Eagles
11.50	Eels vs Rabbits

"A" Grade

12.40	Warriors vs Bulldogs
13.50	Magpies vs Lae Biscuit Heelers
15.00	Tigers vs Sharks
16.10	10 Raiders vs Eagles




POINTS TABLE - ROUND SEVEN
A GRADE

Team	P	W	L	D	F	A	Pts
Raiders	7	6	1	-	68	29	12
Magpies	7	5	1	1	93	44	11
Eels	7	5	2	-	62	51	10
Warriors	7	4	2	1	74	51	9
Tigers	7	4	2	1	65	49	9
Heelers	7	3	2	2	53	42	8
Eagles	6	3	3	1	71	54	7
Sharks	7	3	3	1	55	56	7
Steelers	7	3	3	1	54	66	7
Bulldogs	7	2	3	2	78	67	6
Dragons	5	2	2	1	48	25	5
Rabbits	6	2	5	-	40	77	4
Panthers	6	1	5	1	45	77	3
Storms	7	-	7	-	28	105	0

B GRADE

Bulldogs	7	5	1	1	51	27	11
Heelers	7	5	2	2	38	28	10
Steelers	7	3	1	3	33	38	9
Warriors	7	4	3	-	56	25	8
Raiders	7	3	2	2	57	46	8
Tigers	7	4	3	-	41	30	8
Rabbitohs	7	4	3	-	37	34	8
Panthers	7	3	2	2	25	29	8
Eagles	7	3	3	1	36	37	7
Eels	7	3	4	-	45	31	6
Magpies	7	2	4	1	35	37	5
Dragons	5	2	3	-	30	26	4
Storms	7	-	5	2	18		

WANTOK SPOT



Yuni redi long givim gutpela salens long Rapatona

PMSA GRENFAINEL RIPOT

HENRY MORABANG i raitim

KEPTEN bilong Yunivesiti Joe Aisa i bilip olsem grenfainel namel long tim bilong em na Rapatona bai wanpela gutpela gem stret. Dispela gem bai kamap long dispela wik Sande long Bisini.

Aisa i tok Yuni na Rapatona i save pilaim wankain stail. Olsem grenfainel ya bai pulim planti moa man long kam lukim

Tupela tim wantaim i gat ol eksperiens na tu intanesenel pilaia, na dispela i givim wankain strong long tupela tim wantaim.

"Mi no inap daunim Rapatona, tasol ol boi bilong Yuni bai go pilai na amamasim dispela de wantaim soka," Aisa i tok.

Yuni i laik win em i mas was aut long Geoffrey Emang. Emang em i holim stia bilong Rapatona. Sapos em i pilai gut, Rapatona bai win na sapos nogat, sori tumas Rapatona em i dai.

Ol arapela pilaia we Aisa i ting bai mekim sampela nais long fil em Duri Yarawi, Douglas Rivian na Clinton Caleb long beklain na long fowat em Paschalis Atalou na boi Vanuatu John Mark.

Tupela straika ya Paschalis na Mark i save poroman gut long pairapim umben bilong ol birua tim.

I tru Aisa i apim nem bilong Rapatona, Yuni tu i gat ol stail mangi tu ya.

Desmond Waku na Steve Mali i holim stia bilong Yuni. Tupela midfil pilaia bai kisim strong long Robert Cortesi na Batman Furigi.

Long beklain Yuni bai kisim strong long Ben Luluai, Eka na Nouata Inara. Ol tripela ya i bai mas wok ovataim long stapim straika bilong Rapatona.

Rapatona i maina primia. Olsem na ol i laik winim primiasip taitel tu na dispela bai kirapim stret paia long Bisini soka pak.

Yunivesiti i nogat malolo, na i redi gut bikos ol i pilai klostu tri mun na nogat malolo. Rapatona nogat na dispela em wanpela rot we Yuni i ken yusim na autim tiket bilong ol boi Manus.

Wanpela samting tu em pait namel long tupela kosa. Em i namba wan taim bilong John Davani long kosim tim long grenfainel. Kisakiu Posman bilong Rapatona em i lapun na em gat moa eksperiens long fainel.

Kosa bilong Yuni Davani i save luksave long gutpela kosing stail bilong Posman na i tok tupela bai wokim liklik resis ya.

Davani na Posman em tupela gutpren na tu ol i save pilai wantaim long Yunivesiti bipo taim tupela i resa mangi.

Davani i tokim Wantok olsem ol sapota husat i kamap long lukim gem long Sande bai i amamas



• Ol meri Telikom i redi long gren fainel.

long lukim gutpela gem bikos tupela top tim insait long kantri bai brukim bun long fil.

Insait long resis bilong namba wan divisen, Cosmos na Coecon Ela United bai skelim strong.

Cosmos, aninit long lukaut bilong biknem pilaia Joe Turia i redi tasol long autim dispela taitel ya. Turia na raithan man bilong em Francis Kupe i statim tim bihain long Yunivesiti klap i rausim tupela.

Kepten bilong Cosmos na wanpela intanesenel pilaia Roy Karang wantaim Mark Luap na yangpela Songo junia bai go pas long dispela tim.

Coecon em lain bilong Paulus Savo na John Tutumang. Tupela olpela pilaia bilong Westpac tim husat i winim taitel long 1988.

Long wimen divisen wan, maina primia wan i redi tasol long winim IFC Yunivesiti. Tasol lukaut long ol meri Yuni. Cathy Davani, Annette Kora-Aisa na Lorna Mawe bai putim bikpela was long straika olsem Nelly Taman na Margaret Aka.

Telikom i gat planti ol pilaia i stap long nesanel tim na dispela bai helpim tru ol long winim ol meri Yunivesiti.

Insait long ol arapela gren, Rapatona na Yuni gen bai skelim strong long primia riserv, na Telikom bai bungim Yunivesiti long Anda 19 tu.

FIFA RIPOT

Bos bilong FIFA bai raun long PNG

HENRY MORABANG i raitim

PRESIDEN bilong wol soka bodi, FIFA, Seph Blatter bai kam raun long Papua Niugini long narapela mun.

Blatter husat bai kam opim nupela yut soka koles long Auckland, Nu Silan bai kam olsem long Pot Mosbi na go long Nu Silan.

Taim em i stap long Pot Mosbi, em bai givim 250 soka bal na ol rul buk bilong gem na referi i go long PNGFA long givim Bougenvil soka. Pe bilong ol dispela bal inap long

\$US100 i kam long saplai bilong ol, Adidas

PNGFA i bin askim FIFA long givim sampela helpim long sapotim Bougenvil Ristoresen Program bilong em long kamapim bel isi.

Presiden bilong PNGFA Peter Mommers i autim dispela toktok bihain long em i kambek long wanpela miting bilong FIFA Wimens komiti long Zurich, Switserlen las wik

Mommers i tok em i nap long kisim ol soka bal taim em i stap long Zurich, tasol ekting sekretari bilong FIFA Michel Gen Ruffinen i tok Blatter yet i laik givim dispela ol soka bal ya.

Bos bilong PNGFA i tok wok-about bilong Blatter i kam long PNG bai apim tru nem bilong soka. Em i askim olgeta niuspepa na televisen long givim sapot taim presiden bilong FIFA i kam raun long kantri.

Na long helpim bilong Aitape, Mommers i tok em i wetim tasol wanpela miting bilong FIFA long aste. Dispela miting bai tokaut long hamas mani em bai givim i go long Wes Sepik.

Ruffinen i tokim Mommers olsem PNGFA i laki long kisim dispela kain helpim long FIFA. Olgeta de, FIFA i save kisim planti askim tru long ol kain helpim olsem.

Mommers na Ruffinen em ol gutpela pren na tupela i save long ol yet na dispela i helpim PNGFA long kisim helpim isi tru.

Presiden bilong PNGFA i tok olsem em i bin askim long helpim na i no FIFA yet i givim helpim olsem ol toktok i kamap long niuspepa.

I tru UEFA, o wanpela bikpela soka bodi long Yurop yet i laik givim helpim long Aitape bihain long ol bikman bilong UEFA i lukim long televisen.

INSAIT

Ol dro - pes 31

Spots Ekstra

pes 15 - 18

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.